

**NATIONAL ASSEMBLY OF
SEYCHELLES**

Monday 12th April, 2021

The Assembly met at 9am

National Anthem

Moment of Reflection

Mr Speaker in the Chair

MR SPEAKER

Mersi. Bonzour tou Manm Onorab. E bonzour osi nou piblik a lekout ki swiv nou deor. Pou konmanse nou annan prezantasyon dokiman. Madanm Clerk ?

MADAM CLERK

Mersi Mr Speaker. Bonzour Mr Speaker. Tou bann Manm e tou dimoun ki a lekout. Bann Papye ki pe ganny prezante i ;-

Seychelles Qualifications Authority - Annual Report 2020, S.I. 27 of 2021 Business Tax (Amendment of First Schedule) Regulations 2021, S.I. 28 of 2021 Control and Protection of Dogs Act (Commencement) Notice 2021, S.I. 29 of 2021 Control and Protection of Dogs Regulations 2021. Mersi Mr Speaker.

OTHER GOODS AND SERVICES

MR SPEAKER

Mersi Madanm Clerk. Avek sa nou a kontinyen lo *Appropriation Bill, 2021*. E nou annan bann antite ki tonm anba Minister Finans nou ava appel delegasyon ki pe atann silvouple.

Nou a pas dan Staz Komite pou nou antre dan sesyon. Pou avek nou ozordi nou annan Minis Dezinyen Jean-Francois Ferrari ki pe reprezant Minis Finans, Plan Ekonomik ek Komers.

E osi sorti kot Departman Finans Mr Damien Thesee Sekreter Prensipal pou Finans e Madanm Irene Croisee Kontroler Zeneral. Byenveni Minis e bann zofisye Finans.

Avek sa nou pou konmans avek *Appropriation* pou "Other Goods and Services" ki dan seksyon 2 paz 31 e pou en Bidze total R150milyon 174mil. Minis mon ava envit ou pou fer lentrodiksyon pou Bidze.

**THE DESIGNATED MINISTER
JEAN-FRANCOIS FERRARI**

Bonzour Mr Speaker. Bonzour tou Manm Lasanble, PS pou Finans tou bann teknisyen Minister Finans dan lasal

ozordi e tou zofisye Lasanble Nasyonal. Bonzour tou piblik ki a lekout.

Mr Speaker mon'n ganny par Minis Finans pou ranplas li dan Lasanble ozordi pandan sa moman kot Lasanble i antre dan son bann deliberasyon final lo Bidze nasyonal 2021.

Minis Finans i prezant son leskiz e mon swete ki sa travay i deroul byen e ki nou kapab termin sa long prosesiz analiz bidzeter ki depi plizyer semenn pe deroule dan nou dan zot lenstitisyon.

Ozordi Mr Speaker Lasanble pou regard plizyer laliny depans ki esansyel dan lavi ekonomik nou pei. Pli enportan dan sa bann laliny se sa ki'n ganny dekrir konman program sosyal Gouvernman.

Parey dan tou Bidze bann lannen presedan, Gouvernman in fer provizyon pou li desarz son bann lobligasyon sosyal. Sa lannen i pa en leksepsyon avek en provizyon pou en sonm R486milyon.

An konparezon avek lannen 2020 nou pou war ki sa i en pti pe plis ki R1bilyon an mwens aköz anba sa laliny Bidze Gouvernman presedan ti fer antre sa program *FA4JR* pou siport bann saler travayer dan sa peryod pandemi *COVID-19*.

A sa moman ti rezouir leker bokou. An realite tou Seselwa pou war ki lannen pase ler lamannman lo Bidze 2020 ti ganny prezante mazorite dan Lasanble e osi minorite dan Lasanble ti zwenn ansanm dan en sel lavwa pou anmenn sa sipor saler pou bann travayer dan sa lepok pandemi.

Sa ti en gran moman dan listwar nou pei e mon konman *MNA* ki ti pe asiz parmi zot lannen pase, e aprezan konman en Manm sa nouvo Konsey Minis, mon ti ava kontan trouv plis sa lespri linite nasyonal ler i annan bann gran defi ki nou pei i fer fas avek.

Alors ozordi mon pou prezant devan zot sa bann depans pou bann program sosyal Gouvernman. E mon espere trouv sa menm linite. Aköz la deor Seselwa pe veye lekel ki zwe politik e lekel ki senser dan zot parol sipor.

Ozordi sa program *FA4JR* in ariv a son lafen. Mon ganny dir ki plitar ki SS Patrick Payet pou zwenn nou pou donn detay lo sa bann depans, e la aprezan i mon devwar pou demann Lasanble pou met zot lespri ansanm.

E fer ki tou Seselwa ki'n benefisye atraver program *FA4JR* e lezot program asosye. Aprezan annou demann zot pou

zot leve debourye e pran zot responsabilite konman Seselwa pou ganny zot lavi e kontribye dan devlopman nou pei.

Mon krwar sa i en mesaz for ki personnelman mon ti a kontan tande sorti kot Lasanble ozordi, ler nou pe diskrit bann sipor sosyal.

An plis ki bann program sosyal i annan osi devan nou plizyer propozisyon pou asiste bann lorganizasyon tel ki Lakrwa Rouz bann lorganizasyon relizye, politik, komers, lazenes, bann ki lit kont sibstans, lar e kiltir, *Laptop Scheme* plizyer *Trust Tund* eksetera.

Tre enportan osi se larzan ki Gouvernman pe demann zot bann Manm Lasanble pou aprouve pou diferan *Scheme* pou bann mikro pti e mwayen biznes ki pou kapab ganny lankourazman pou demare e grandi.

Gouvernman in fer en kantite travay pou tir pou anmenn en bon zesyon dan sa bann fon e, e la kot in annan labi pou elimin sa bann labi dan sa bann program lasistans.

Alors i esansyel pou zot konnen ki tou Roup, tou sou ki zot konman en Lasanble zot pou donn Gouvernman pou depanse i ava ganny fer dan

latransparans e dan bonn gouvernans.

Mr Speaker ozordi nou pou osi regard bann diferan sibvansyon pou Gouvernman pe demande pou bann lantrepriz piblik, ki ankor merit sipor finansyel Leta.

Parey lepep Seselwa i konnen Gouvernman Larepiblik Sesel anba direksyon Prezidan Wavel Ramkalawan i enn ki krwar tre fortman dan bon performans ekonomik e dan lefikasite tou lantrepriz piblik konman prive.

Me nou osi en Gouvernman ki realis e ki rekonnèt ki parwa pran plizyer lannen pou arive balans tou bann kont piblik.

Nou rekonnèt ki i annan serten servis sirtou dan transpor e dan litilite piblik, ki merit sipor finansyel sorti dan larzan taks ki sakenn antre nou Seselwa nou kontribye.

Pou sa lannen nou pe met plizyer milyon devan zot pou ganny zot sipor pou *SPTC* pou *Air Seychelles* pou *Seychelles National Parks Authority* e pou Servis Lapos.

Minis Finans i swete ki zot fer en bon deba lo sa bann sibvansyon, pou ki tou Manm piblik i konpran e i satisfè pou depans sa bann sonm. Si mon kapab zis dir detrwa pti parol lo

Air Seychelles ki mon'n mansyonnen pli o Mr Speaker, Gouvernman pe met bokou lenerzi pou sov sa lakonpanyen e tou bann servis ki vin avek tel ki *ground handling services* ki en sours reveni tradisyonnelman tre enportan pou nou pei.

Bokou negosyasyon pe deroule dan bann sirkonstans ase difisil, me travay i konmans byen avanse pou sorti dan sa det enorm ki *Air Seychelles* in akimile pandan sa bann dernyen lannen.

Nou pe konmans war lalimyer dan bout sa tinel e la ankor Gouvernman pe demann sipor pei antye atraver Lasanble Nasyonal, pou ariv lo en bon konklizyon.

Ser Manm Lasanble travayer *Air Seychelles* tou travayer *Air Seychelles* pe fer en bout zefor. *Management* osi pe fer son zefor. Menm si pou zot parfwa sakrifis i mwens fermal ki pou bann ki pou ganny mwens.

Me tou dimoun pe ganny demande e tou dimoun pe fer en zefor. Alors *Air Seychelles* pe demann osi sipor pei dan sa moman difisil. Annou alors apros sa sityasyon dan en fason pozitiv e annou rod solisyon ki dirab.

Finalman Mr Speaker nou pou fini avek bann *Development Grants* pou bann lantrepriz piblik, e en vot pou pei kapab ranpli son bann lobligasyon konman en Manm bann diferan lorganizasyon rezyonal e enternasyonal.

Lo sa detrwa mo Mr Speaker, mon swet Lasanble bon deliberasyon e mon rann ou laparol Mr Speaker. Mersi.

MR SPEAKER

Mersi Minis. Mannyer mon konpran ou'n entrodwir tou bann antite ki tonm la dan sa, dan sa lazournen. Me selman nou a konmans pran enn par enn.

Wi *Leader* Lopoziyon ou a dir mon avan ou konmanse ki, kisisa ki ou anvi adres Lasanble lo la silvouple? Plizyer fwa mon'n demann ou poudir mon ki sa ki oule adres Lasanble lo la.

E ou pa'n fer li ou'n kontinyen ou'n fer en stetment. *So please* dir mwan kisisa. Mersi.

HON SEBASTIEN PILLAY

Mersi Mr Chairman. Mr Chairman anba *Order 8* nou *Standing Orders* aköz ou, ou ki ansarz travay Lasanble. Mon oule klarifye en keksoz petet ou a ed mwan pou klarifye.

Designated Minister in lir nou plizyer *heads* ki annan bann lenformasyon ase pertinan ki nou bezwen konnen. Me sa ki mon war li en pti pe drol e mon tre konsernen avek ...

MR SPEAKER

Ou pe fer *statement* la ou. Ou pa ankor dir mon kisisa ki ou pe adrese.

HON SEBASTIEN PILLAY

Nou pa war Minis Finans dan Lasanble pou reponn sa bann kestyon. Me nou war *Designated Minister* ki pe vin dan Lasanble pou reponn sa bann kestyon.

Eski Mr Speaker ou kapab, ou kapab klarifye aköz sa i premye fwa, i premye fwa depi mon dan Lasanble *for the past 12 years* ki en Minis i la i pa dan Lasanble pou fini deba Bidze Mr Chairman.

MR SPEAKER

Onorab Lopozisyon mon'n konpran ou.

HON SEBASTIEN PILLAY

Me sa i iresponsab Mr Chairman - i iresponsab.

MR SPEAKER

Mon'n konpran ou, mersi mon'n konpran ou. Minis

Dezinyen ou kapab eksplike aköz ou la dan plas Minis Finans.

THE DESIGNATED MINISTER JEAN-FRANCOIS FERRARI

Mersi Mr Speaker. Mr Speaker Minis Finans i dan en lobligasyon tre enportan pou, pou finans nou pei e pou lavenir pou balans sa Bidze sa prop Bidze ki devan nou.

Me selman mon ti a kontan reasir *Leader* Lopozisyon ki tou bann kestyon ki i pou demande i pou ganny en repons. Mersi bokou.

MR SPEAKER

Mersi. Bon nou a pran Bidze pou "*Other Goods and Services*" e mon ava envit lentervansyon bann Manm. Onorab Esparon.

HON REGINA ESPARON

Mersi Mr Speaker. Bonzour tou dimoun. Mr Speaker mon ti anvi zis fer en klarifikasyon. Anba "*Other Goods and Services* kot *cleaning services* la i annan en sonm 66milyon 431mil.

Mon ti a zis anvi konnen si sa i pou al anver Korperativ? E parske nou konnen poudir an se moman nou annan nou *Cleaning Corporative* apre nou annan nou *cleaning agency*.

Eski a lavenir sa de, sa de antite pa kapab konmsi tonm anba en sel *heading* olye nou annan *cleaning agency* apre *cleaning services* apre Korperativ. E dezyenmman mon war anba *Home Carer* Sekretarya dan 2019 ti napa okenn alokasyon.

Me selman 2020 nou ti war 1milyon 500mil ki ti ganny *allocate* e la sa lannen nou pa pe war sa alokasyon. Zis en pti lesplikasyon petet Minis Finans i ava eksplik nou, si sa in ganny mete anba en lot *heading* ki i pa pe reflekte la anba "*Other Goods and Services?*" Mersi Mr Chair.

MR SPEAKER

Mersi. *PS Thesee*.

PS DAMIEN THESEE

Mersi Mr Chair. Bonzour Mr Chair e tou Manm Onorab. Pou *cleaning services* anba "*goods and services*", sa i parey ou'n dir i pou bann *cleaners* anba *Cleaners Corporative*. E sa i plizoumwenn pou bann lofis Gouvernman an antye.

Pou bann lezot *outsourcing services* sa nou met pli spesifikman anba sa Minister spesifik. Par egzanp ou pou annan par egzanp anba Minister Ledikasyon *landscape* oubyen *even lasante*.

E sa i pou bann lezot travay an deor dan plas netway lofis. Par egzanp anba *LWMA* i pou netway bann distrik, lavil bann diferan *bin site, bus stop*.

Anba lanvironnman i pou netway bann *rivers and marshes*. Anba Lasante i *extend* pou son bann *grounds*. Ledikasyon osi son bann *outside grounds*. So i en pe diferan li sa de klasifikasyon.

An sa ki konsern *home carer* pou bann lannen avan ti annan en alokasyon, me anvi an 2021 avek nouvo *management* zot pa ankor vremen revwar ki mannyer zot pou get sa zesyon *carer* zot menm.

Zot pou travay lo la e de ki zot in pare la swa *mid-year* swa 2022, nou ava annan en lankadremman ki mannyer nou pou *manage* anba *ASP* i anvi zer bann *home carer*. Akoz *eventhough* nou ti met li la i pa ti vremen pe neserman pe ganny byen zere. Mersi.

MR SPEAKER

Wi Onorab Esparon.

HON REGINA ESPARON

Mersi Mr Chair. Mr Chair petet mon pa konnen si *PS* pa'n tro konpran mwan. Mon ti pe zis klarifye parske an se moman nou war mon parey mon kapab

donn ou en legzanp, mwan parey kot lekòl Glacis nou annan en, en pe travayer ki tonm anba Korperativ e en pe ki tonm anba *cleaning agency*.

Konmsi zot pa ti kapab fer sa tonm anba en sel parasol olye ki nou war nou, nou pe annan korperativ dan en Minister nou pe annan *cleaning agency* tou? Ki zot pe fer menm loubraz mon war sa konman en *duplication* mwan. Mersi.

MR SPEAKER

Mersi. *Panel? PS Thesee.*

PS DAMIEN THESEE

Mersi Mr Chair. Mon pa *aware* Glacis spesifik ki mannyer i ganny ankadre, me solman ordinerman bann *cleaning agency* li pou netway *grounds* lekòl an deor. I pa sipoze annan *cleaners* kot bann lekòl. Si i annan i ava annan enn ki vremen get en pe bann laklas *as such*.

Me i pa pou al deor lo son *grounds*. E si i annan sa laranzman zot pa pou vremen *over step* kanmarad zot. Zot pou konplimant, konplimant kanmarad. Nou kapab get sa bann detay apre midi nou ava klarifye avek ou ki mannyer lekòl Glacis i ganny organize. Mersi.

MR SPEAKER

Mersi *PS*. Onorab Aglae.

HON EGBERT AGLAE

Mersi Mr Chair. Bonzour Minis Dezinyen, *PS* ek ou delegasyon. Premyerman mon ti a kontan petet leklersisman kot i konsern *National Day Celebration* ki mon war poudir pou napa larzan lo la en.

An menm tan i annan sa *national Theme* osi ki mon war zot in met larzan pou 2022 e vi ki sa lannen osi nou pa'n tann okenn tenm nasyonal ki pozisyon Gouvernman petet lo sa size pou nou kapab at least annan en tenm nasyonal a lavenir?

Dezyenm en pe leklersisman petet *PS* Finans ou kapab lo sa size *recruitment* ek *passenger passage expat* la sa 3.6milyon, mon ti a kontan en leklersisman lo sa *ok* sa 3.6milyon kantite ki, ki pe kouver e, egzaktaman kwa sa osi? Mersi.

MR SPEAKER

Mersi. Minis.

THE DESIGNATED MINISTER JEAN-FRANCOIS FERRARI

Mersi Mr Speaker. Mr Speaker lo sa de premye pwen ki Onorab Aglae in fer lo *National Day Celebration* ek *national theme*.

Mon krwar ki i, i tou dimoun i ava konpran ki dan sa lannen 2021 i pa en, en lannen pou ki nou kapab fer en selebrasyon piblik ;- en manifestasyon piblik avek sa pandemi ki ankor pe deroule.

Alors sa i rezon aköz napa okenn vot pou sa lannen. Pou *national theme* an prensip Gouvernman in deside ki i pa en, en koutim ki i anvi kontinyen. Gouvernman pa war li konman en keksoz ki, ki esansyel e ki servi okenn gran *purpose*.

Alors nou pa nou, nou i pa sipoze annan ni pou 2021 ni pou 2022 ni pou 2023. Selman in aparet la 2022, 2023 me selman lenformasyon ki mon annan se ki i pa pou la osi pou 2022 e pou 2023. Mersi.

MR SPEAKER

Mersi i annan lot pwen lekel ki pou adres ki pou kontinyen *PS Thesee* wi.

PS DAMIEN THESEE

Mersi Mr Chair. Anba *recruitment and passages of expatriate* sa 3.6milyon i kouver bann pasaz ek bann *extra luggage* pou bann *teachers* dan Minister Ledikasyon ki ganny santralize dapre zot Kontra. E nou ki zer sa vot anba Minister Finans. Mersi Mr Chair.

MR SPEAKER

Mersi. Wi Onorab Aglae pou klarifye.

HON EGBERT AGLAE

Zis en klarifikasyon. Mon konpran Minis Dezinyen ki ou pe fer resorti. Me selman mon ti a kontan petet ki zot *give a thought about* sa aköz tou pei laplipar pei i adopte i *sort of* en *motivational theme* ki zot vin avek pou donn laspirasyon pep.

Konman en *Leader* ou anvi enspir ou pep pou donn li lespwar so i vin ek en tenm. Parey Sinwan i fer Lenn i fer bann lezot pei osi i fer, petet konsidere.

MR SPEAKER

Mersi Onorab. Minis a note silvouple mersi. Onorab Henrie.

HON GERVAIS HENRIE

Mersi Mr Chair. Pou "*Other Goods and Services*" mon krwar tou bann *headings* i preski kler me selman kot mon anvi en pe leklersisman. Dabor pou *cleaning services* aköz son *amount*.

E mon anvi konn en pti pe a lavenir ki mannyer nou pou apros sa *headings* pou nou kapab fer plis avek mwens

parey nou pe koz lo la depi konmansman Bidze.

Akoz si ou get par egzantp son alokasyon pou 2019 ok annou pran son alokasyon pou 2020. Baze lo lamannman ki nou ti fer apre son *end of year* in mont par preski 6milyon.

E in i lo rikord Lasanble ki i annan dan ladministrasyon avan ki'n ganny dir ki *actually* ler servis *cleaning* in ganny tire avek bann Minister i pe kout pei a lonterm bokou plis pou donn sa servis ler in al anba en *agency*.

Donk mon ti ava kontan *panel* i dir nou par egzantp sa sonm la i reprezant apepre konbyen *cleaners* kote zot été? Dan ki mannyer zot pe ganny partisyonen dan bann Minister?

E ki poursantaz sa larzan i reprezant saler ki pe al pou bann *cleaners* zot menm avek son *management* par egzantp. E finalman ki zefor ki sa *agency* pe fer, pou li kapab osi ganny en pe reveni par *tap into private sector*, olye ki reste lo depandans bidzeter servis donn servis, servis piblik? Mersi Mr Chair.

MR SPEAKER

Minis wi.

THE DESIGNATED MINISTER JEAN-FRANCOIS FERRARI

Mersi Mr Speaker. Mersi Onorab. Onorab mon ava donn ou enpe detay lo sa *head* me selman mon ti a kontan dir plas li dan en konteks.

Ler ti annan reform makro ekonomik an 2009 nou bann partner enternasyonal ti rekomande ki *wage bill* Gouvernman i ganny redwir e ki bann servis ki asosye dan Gouvernman i ganny kontrakte endepandaman avek Gouvernman.

E se a sa moman la ki en kantite travay in ganny en kantite pos in ganny *outsource*. Eski i ankor relevan sa metod oubyen non? Sa i en keksoz ki lo latab ki pe ganny diskite.

Akoz apre 12an sa kalite pratik kekfwa in ler pou remet li lo latab e gete, eski par egzantp nou pou ekout serten lekol par egzantp ki pe dir nou ti a kontan anploy nou prop *cleaner*, nou prop *cleaner*.

E menm parler dan lezot domenn nou prop *maintenance, maintenance person?* Eski nou pou ekout serten, serten kot lasante ki pe dir be kekfwa nou, nou devret pe anploy nou bann *cleaner* nou menm aköz *cleaning* netwayaz dan servis lasante i en travay spesyalize.

E kekfwa i devret tonm totalman anba kontrol Minister Lasante. Donk sa, sa diskisyon i, i *on going* e, e mon, mon ava apresye ki, ki zot Lasanble i donn nou en pe letan pou nou repas lo tou sa bann kestyon.

E byento nou ava kapab, nou ava kapab donn zot en *feedback*. An sa ki konsern bann detay ki ou'n demande Onorab Henrie i annan 619 *cleaner* e zot total i zot total zot saler i ariv R60milyon par lannen.

E zot ava war zot menm zot ki i pa en sonm egzazere par mwan ;- i pa egzazere par mwan akoz i kapab tonm dan en mwayenn R5mil par mwan ki pa ki dan ler ou konpar li avek lezot saler i pa en keksoz ki egzazere.

Lo kote *management* i annan apepre R1.9milyon saler e wi zis saler plis R1.4milyon pou lezot *associated expenses* pou *manage* sa servis 619 travayer.

Donk ou kapab ekspekte pou ou kit 619 travayer fodre ou annan en tim *management* ki, ki konpetan. E donk sa i sa de sonm e ladan mon kapab dir zot ki Minister Lasante se li ki benefisye avek sa bann servis *cleaning*.

E zot pran 250 dan sa 619 ;- 250 i travay avek

Minister Lasante. E, e *community development* i enn ki ase gro osi. Departman Kiltir i enn ki ase gro. Ledikasyon e apre lezot i partaz, partaz en pe, balanse.

Lo ou pwen Onorab ki eski sa lorganizasyon pe ranpli sa manda ki mon krwar zot ti deza promet avek Lasanble a en serten moman, pou zot al get an deor pou gete si zot kapab ganny serten reveni atraver ofer sa bann servis an deor sekter Gouvernman.

In annan en pti zefor ki'n ganny fer me selman mon personnelman mon santi ki i annan plas pou bokou plis ki sa. E bann i annan en group dan sekter prive ki *both full time* ek *part time*, travay dan bann biro ou kapab donn zot enn de legzanp *Deepam Cinema* kot *Hunt Deltel*, *Qatar Airways*, *Pension Fund*.

E sa bann *Petro Seychelles*, *SFA* osi i anploy, i anploy 6. Donk i annan en pe zefor ki'n ganny fer, me selman ou a krwar sa bann zefor in al rod bann, bann lorganizasyon para gouvernmental *close* avek Gouvernman, *SFA*, *Pension Fund* me pa'n dan sekter komersyal li menm.

Kekfwa la i annan en lespas pou zot pou sa bann servis kapab grandi. Donk sa i

mon larepons Onorab. Mon pa konnen si i annan okenn keksoz ki ou ti a kontan konnen. Mersi.

MR SPEAKER

Mersi Minis. Onorab Cosgrow.

HON WALLACE COSGROW

Mersi Mr Chair. Bonzour Mr Chair. Bonzour Minis. Bonzour tou Manm Onorab e tou dimoun ki pe ekoute. Mr Chair o konmansman permet mon eksplik eksprim mon dezapwentman ki lefe ki Minis Finans nou pe, nou pe get son Bidze pou son Minister e i pa prezan avek nou dan Lasanble ozordi.

En keksoz ki parey *Leader* Lopozisyon in dir a mon memwar i pa'n zanmen arive. Mr Chair mon annan de *issue* lo "*goods and services*" *budget*. Premye, premye kestyon i lo "*Government overseas travel*" ki nou war pou 2021 in mont par 5milyon.

Annefe *COVID-19* in montre nou avek tou sa bann restriksyon dan lemonn ki nou kapab fer biznes diferaman vertyelman Lasanble an se moman en kantite bann *meetings* pe ganny fer vertyelman.

Akoz nou bezwen sa kantite *increase* dan Bidze

"*overseas travel*" eski nou pa kapab kit li 5milyon parey lannen pase lannen presedan?

Larzan i kapab ganny servi pou met dan lezot landrwa par egzantp i annan landrwa kot dimoun pe ganny *evict* dan zot landrwa biznes, akoz *IEA* in dir Lasanble pa'n donn larzan pou *rent* ki pa leka.

Dezyenm i annan *professional and consultancy services* ki sorti *end of year* R48milyon ki mont R67milyon. Mr Chair sa laliny la i en laliny ki dan bann Lasanble oparavan, sizyenm Lasanble i annan laliny ki'n toultan ganny diskite en kantite deba in ganny fer lo *consultancy services*.

Mon ti a kontan konnen akoz sa gran *increase* dan *consultancy services* e kwa ki Gouvernman i deside al *contract out* pou 2021? Mersi bokou Mr Chair.

MR SPEAKER

Mersi Onorab. Minis.

**THE DESIGNATED MINISTER
JEAN-FRANCOIS FERRARI**

Mersi Mr Speaker. Mon ti a kontan kekfwa enn fwa pou tou donn en larepons ki mon espere i ava satisfere tou dimoun lo kestyon prezans Minis Finans dan Lasanble.

Mr Speaker sa Gouvernman ki mon servi ladan nou Gouvernman i krwar ki tou Minis i bezwen konpran bann keston bidzeter. I pa en domenn ki rezerve par zis enn. E tou fason Minis ti la pou prezant son Bidze son Minister sa i pa Bidze son Minister sa.

Minister Finans, *Trade, Investment* tousala Minis in ranpli son lobligasyon. Sa nou pe koz lo “*Goods and Services*” e “*Social Programmes of Government*”. So mon krwar ki sa mon, mon konpran Minis ki ou, ou pe *relate* avek sa ki ou, ou’n abitye avek, be sa ki...

(Off-mic)

**THE DESIGNATED MINISTER
JEAN-FRANCOIS FERRARI**

... wi sa ki ou. Wi Onorab ki ou, ou’n abitye avek me sa ki ou’n abitye avek i pa’n neseserman marse. In anmenn nou enta problem! So nou pe sey gete ki mannyer tou dimoun dan en sel lekip gouvnmantal i osi anmenn son kontribisyon lo tou sa bann size.

Alors se pou sa ki Minis Finans i la, i pa la, i annan toultan en dimoun dan sa lekip ki kapab tenir son plas, e ki kapab reprezant li dan en fason akseptab. Mersi.

(APPLAUSE)

**THE DESIGNATED MINISTER
JEAN-FRANCOIS FERRARI**

Lo sa de lot keston lo “*overseas travel*”, mon ava pas avek Minis.

MR SPEAKER

Ki *point of order* Onorab Pillay?

HON SEBASTIEN PILLAY

Mon le fer en pwen klarifikasyon Mr Speaker an akord avek Lartik, Lartik 154 nou Konstitisyon Mr Speaker. Mr Speaker nou Konstitisyon i dir “*Minister means the Minister responsible for Finance and includes the Vice-President. Where the Vice-President is responsible for the Ministry of Department of Finance.*”

Sa i an relasyon avek prezantasyon *Appropriation Bill* devan Lasanble. Se sa ki Konstitisyon i dir. Konstitisyon pa dir poudir i pa enkli *Designated Minister or any other Minister for that purpose.*

So se sa keston se sa rezondet akoz sa keston i kontinyen monte. Se sa ki ganny trouve dan nou Konstitisyon.

E tou largiman lekontrer pa pou sanz sa ki Konstitisyon in dir akoz se sa lespri ki nou

Konstitisyon i fer lentansyon avek.

Si ou en Minis pou Finans ou bezwen dan Lasanble. *Designated Minister* i dir nou Minis pou Finans i annan en langazman enportan. Akoz nou pa ti ganny dir semenn pase, poudir Minis i annan en langazman enportan e i pa pou dan Lasanble ozordi?

Sa i klerman en keksoz ki fek pase e Minis pa kapab la e ankor enn fwa mon dir i irresponsab lo lapar en Minis Finans pou pa la dan Lasanble! Mersi Mr Chairman.

(APPLAUSE)

MR SPEAKER

Well ou kapab gard ou prop zizman lo la Onorab Pillay. Mwan dan mon konprenezon mon'n ganny asire ki i annord pou *Designated Minister* pran plas Minis Finans.

E mon apresye pwen ki Minis Ferrari in fer lo lefe ki lo bann antite ki nou pe konsidere ozordi, se bann antite ki konsider ki konsern Gouvernman an zeneral. Mersi.

Onorab Georges oule adres lo la ou? Wi?

HON BERNARD GEORGES

Wi Mr Chair avek ou permisyon. Mr Chair sa ki

Onorab *Leader* Lopoziyon fek lir avek nou se propozisyon Konstitisyon pou *budget speech*. Se sa se prezantasyon apropriasyon si ou lir 154 (1) sa i kler e mon pou lir li an Kreol.

“Minis” ki'n ganny defini konman Minis Finans eksetera) “ava pa plitar ki trwazyenm zour apre konmansman lannen sak lannen finansyel, prezant avek Lasanble Nasyonal bann estimasyon reveni e depans Gouvernman pou sa lannen finansyel.”

Sa se *budget speech* e sa i kler i pa plis ki sa. Dezyenmman, dezyenmman sa sistenm anmenn Minis devan Lasanble pou *Committee Stage* se nou ki ti entrodwir sa ler nou ti, ler nou ti dan Lasanble! zanmen zot ti fer zot!

(APPLAUSE)

HON BERNARD GEORGES

Sa se en devlopman ki nou, nou'n fer. I pa dan Konstitisyon sa. Se en devlopman ki nou, nou'n fer. Me sa ki mon anvi dir avek lot kote ki'n koze for ki zanmen zot in war sa dan Lasanble premye fwa ki arive, Mr Chair ler Prezidan France Albert Rene ti Minis Finans eski i ti asiz la li? I ti vini i ti vin donn son zizman?

(APPLAUSE)

HON BERNARD GEORGES

I ti vini i ti fer parey 154 i demann li fer i ti prezant son Bidze apre i ti ale zanmen nou ti war li ankor i pa ti reponn okenn kestyon ! Ler-ler...

(Interruption)

MR SPEAKER

Ale annou ekoute silvouple.

HON BERNARD GEORGES

Ler Mr James Alix Michel ti Minis Finans eski i ti vin la pou reponn okenn kestyon li ? Zanmen i ti ! Zanmen, zanmen, zanmen. Li i ti fer son *speech* apre i ti ale parey zot ti fer toultan. Mersi Mr Chair.

MR SPEAKER

Mersi Onorab Georges nou'n konpran ou. Nou'n konpran ou. Nou'n konpran ou. Nou pou kontinyen avek biznes ki devan nou mersi. Lekel ki ti pe al reponn bann kestyon.

HON SEBASTIEN PILLAY

Mr Chairman, Mr Chairman Onorab Georges in *mislead* Lasanble!

MR SPEAKER

Nou'n fini avek sa Onorab Pillay, mersi.

HON SEBASTIEN PILLAY

I pa zis *speech*, i pa zis *speech* Bidze i dir *Appropriation Bill*.

MR SPEAKER

Nou'n fini avek sa.

HON SEBASTIEN PILLAY

I ti *present en estimate*.

MR SPEAKER

Nou'n fini avek sa silvouple.

HON SEBASTIEN PILLAY

(Off-mic)

MR SPEAKER

Onorab Pillay ou pa kapab akiz en Manm la pou koz lalang !

HON SEBASTIEN PILLAY

(Off-mic)

MR SPEAKER

Wii be Onorab Pillay ekout mon ou lenterpretasyon i kapab fer ou fer en konklizyon.

Me sa pa savedir ki nou bezwen aksepte ou lenterpretasyon. Mersi. *PS* Thesee nou a kontinyen, si ou ki ti pe adres bann kestyon.

PS DAMIEN THESEE

Mersi Mr Chair. An sa ki konsern Bidze pou *professional and consultancy*, nou pou war in monte in ariv 67milyon.

Prensipalman akoz devalyasyon Roupri so nou, nou to lesanz ki nou'n fer Bidze 2021 lo la i plis ki *actual recruit* pou Bidze 2020 ki ti dan *average* 14 a R15 pou en Dolar.

E ladan nou annan plizoumwen bann kontra an deviz etranzer ki nou'n pran lasistans avek *World Bank* par egzanp pou donn nou lasistans lo bann serten *financial sector review*, ki pe ganny fer an konzwent avek Labank Santral.

E osi nou ankor pe pey pou serten lasistans pou (*RBM – the Result-Based Management Reform* ki enkli revi ki nou ti fer lo *PPBB* e osi travay ki pe ganny fer la lo *Planning Pillar* avek *the M&E* ;- savedir *Monitoring and Evaluation Pillar*.

Nou osi annan bann peyman ki nou pe pey apepre 15 *expatriate* ki nou met dan bann Minister, bann *QS* ek enzenyer, ki nou pe donn kapasite bann Minister pou nou kapab egzekit zot bann proze kapital ki ti dan defayans dan detrwa lannen.

E sa i *the second main spending* ki nou annan anba sa vot. Dezyenman an sa ki konsern Bidze "*overseas travel*

"nou pou war wi nou'n met en logmantasyon pou Bidze 2021 anvi ki nou espekte ek 2021 keksoz sipoze amelyore avek sityasyon *COVID-19* natirelman i nou *assumption* ki nou pe fer.

E sa i *travel* i ganny santralize dan Minister Finans olye met sa lokasyon avek bann Minister. Kanmenm nou ti met 5milyon dan 2020 pa ti neserman ganny servi.

Ankor la si napa litilite, nou pa pou depanse larzan dan sa vot, akoz i sipoze annan laprouvasyon anba *President's Office* avan *high senior officer, officers* i *travel* dan Gouvernman.

Savedir zis en provizyon e si keksoz i amelyore bann Minister i war li neser pou zot, pou zot voyaze la zot ava fer. Mersi.

MR SPEAKER

Wi Onorab.

HON WALLACE COSGROW

Mersi Mr Chair. Mr Chair zis en pti, en pti *advice* pou *professional consultancy services*. Savedir in kalkil lo en pri Dolar an se moman e si i arive Dolar i desann i ava annan *savings*.

Mon ti a demann Minister Finans apartisyon sa larzan avek *IEA* dan en mannyer i a

kapab ganny *rent* pou larestan lannen. E bann dimoun ki pe *operate* dan *building* leve debourye pa a bezwen kit sa *building*. Mersi.

MR SPEAKER

Mersi *ok* nou a les sa avek Minister Finans. Onorab Pillay ou tour me selman mon ti ava apresye ki nou pas lo sa size ki ou'n leve e konsider li konman *settled*. Mersi.

HON SEBASTIEN PILLAY

Mersi Mr Chairman. Mr Chairman malgre mon annan gran respe pou ou i nou Konstitisyon ki pou reflekte kwa ki pe ganny fer ozordi bomaten.

E mon asir ou si Onorab Ferrari ti asiz la oubyen la, li menm li i ti pou leve i ti pou ale. So annou, annou pa sey anmenn largiman Mr Rene, Mr Michel, Mr ansyen Prezidan Michel. Nou ki la ozordi nou ki bezwen fer pli byen.

Nou ki la ozordi nou ki bezwen fer pli byen. So si, si zot la pa kapab fer pli byen *then* Lepep Seselwa pou ziz zot se sa se koumsa ki i pou ete.

MR SPEAKER

Ok mersi Onorab Pillay. *Move on please*.

HON SEBASTIEN PILLAY

Mon, mon kestyon anba sa "*Other Goods and Services*" *provided* Onorab Minis oubyen PS i kapab donn nou tou leklersisman, sa ki pa'n kler se ki pou arive avek sa sityasyon *cleaning services*? Ki pou arive egzaktaman?

Minis in dir PS in dir mon pa konnen si Minis ki'n dir zot pou annan en lot fason get keksoz. So egzaktaman ki plan Gouvernman avek sa size *cleaning services going forward*.

Eski zot annan en plan oubyen zot pou kit keksoz parey i été, *until such time* ki zot pou revwar. *At least give us a time frame* aköz i annan dimoun ki zot, zot depan sa i zot travay e zot in travay pandan plizyer lannen avek sa korporativ.

E zot ti a kontan ganny serten klarite *as to going forward* ki pou arive avek zot. Mon dezyenm kestyon i konsern *Government overseas travel*. Mr Chairman, mon kontan ki, mon kontan war ki PS Finans in eksplik nou rezondet deryer sa sityasyon.

Me mon oule met lanfaz lo en pwen ki *COVID* in montre nou ki ou kapab *achieve* en kantite keksoz san ki ou depans larzan. Aköz par egzanp ler nou dir poudir R3milyon pa paret en gran larzan pou lamazorite

lepep Seselwa la ater i en gran larzan.

Nou al lo zil pou R3milyon enta larzan me selman nou, nou dir i pa en kantite larzan. So eski i annan, i annan potansyel dan plas lefe ki nou konnen poudir *overseas travel* i en keksoz ki pa posib la, aporsyonn sa larzan la sa larzan i ganny mete dan enlot landrwa.

Kot Gouvernman pe dir i pe fer koupir *but at the same time* 3milyon pou al lo zil nou war nou annan pou nou kapab ed bann dimoun ki dan bann sirkonstans difisil.

Onorab Cosgrow in koz lo, lo *IEA* nou konpran poudir *IEA* pe fer *eviction* nou pa konnen ki bann lezot lenformasyon sa bann dimoun in gannyen ti ava bon nou ganny en pe plis lenformasyon me eski i annan potansyel pou fer sa?

E mon dernyen, mon dernyen kestyon Mr Chairman. I lo sa size *recruitment and passage of expatriate* ki kalite mezir zot pe met an plas *across* bann diferan Departman pou kontrol sa size *recruitment and passage of expatriate* par lefe ki i annan bann *expatriate* ki dan pei la osi i annan bann *expatriate* ki mon pa konnen si Gouvernman i annan plan *recruit*.

So eski Minis i kapab dir nou dan plan Gouvernman ki zot pe al fer an relasyon avek *recruitment and passage of expatriate* ki annan 6milyon anba Bidze pou li? Mersi Mr Chairman.

MR SPEAKER

Mersi Onorab. *Panel* wi Minis.

**THE DESIGNATED MINISTER
JEAN-FRANCOIS FERRARI**

Mersi Mr Speaker. Mr Speaker mon ava reponn sa kestyon lo *cleaning services* e en pti bout lo *recruitment of expatriates*. Sa de lot kestyon ki de lot size ki Onorab *Leader* Lopozisyon in leve, mon pa war okenn relevans avek sa Bidze ki nou pe diskite.

Kekfwa i ava pli bon pou li lev sa bann pwen dan en *press conference* dan en landrwa.

(laughter)

**THE DESIGNATED MINISTER
JEAN-FRANCOIS FERRARI**

Isi i pa i napa nanryen pou fer avek sa isi. Lo *cleaning services* mon'n eksplike Onorab ki Gouvernman i anvi amelyor sa sistenm.

E nou, nou viv dan en sityasyon ki dinamik e ki nou pe toultan sey rod en fason pou nou *improve* sa bann servis. E

pou le moman mon'n fer resorti ki bann saler i ase ba e nou, nou enterese evantyelman pou nou amelyor sa bann saler.

Me dan sa kad ki mannyer i ete la i difisil alors nou bezwen revwar son prensip ki mannyer sa bann servis i ganny, i ganny *manage* e si nou anvi kontinyen annan en, en lorganizasyon santral ki distribye e ki organiz *cleaning services* dan tou bann Minister Lazans e bann Departman.

Sa i enn bann keksoz ki nou pou bezwen regete akoz i annan, i annan 12an ki sa sistenm i an plas e in ler pou nou ganny en *proper appraisal*. *Appraisal* pe ganny fer pou le moman e baze lo sa *appraisal* nou ava anons bann plan *going forward*.

Dezyenmman *recruitment of expatriates* Gouvernman in erit en sityasyon ki dan sistenm servis piblik i annan plizyer *expatriates*. Bokou, bokou *teachers* ki parmi sa bann la.

E parey ou konnen nou, nou pa kapab dizour a lanmen koup sa bann pos, akoz bann zanfan pa pou ganny ledikasyon mannyer zot devret pe gannyen.

Donk nou bezwen viv avek sa e nou bezwen fer provizyon pou bann dimoun ki'n vin travay lo en Kontra Sesel, pou

zot kapab retourn dan zot pei ler zot in fini lafen zot kontra.

Donk sa larzan i bezwen la. I annan en gran zefor ki pe ganny fer par Gouvernman par lokaliz sa bann pos.

E parey ou konnen dernyerman in annan, in annan en lanons ki plizyer dimoun mon krwar en trantenn dimoun ki ti lo *URS* ki'n konmans antre dan sistenm ledikasyon *at the lowest level* pou zot kapab vin bann asistan *teachers* eksetera pou nou kapab *beef up the system*.

Donk sa pe, pe deroule i annan bann *training* i annan bann *reskilling* oubyen bann programm avek Liniversite Sesel pou fer ki bann *graduates* ki pa pe travay i kapab antre dan ledikasyon i annan en kantite sa bann travay, ki pe ganny fer pou nou limit lakantite *expatriates* ki nou bezwen dan nou sistenm.

Donk sa i en *ongoing exercise* e mon krwar ki ou kapab reste byen an konfyans dan ou lekor, ki sak sou, sak Roupri dan sa de vot pou ganny servi dan en fason bokou pli efikas posibil.

Sa de lezot pwen dernyen parey mon'n dir ou sa kekfwa ou ava anvi lev li en lot landrwa. Mersi.

MR SPEAKER

Wi Onorab Pillay ki pwen adisyonnèl.

HON SEBASTIEN PILLAY

Mersi Mr Chairman. Premyèman lo sa, lo sa 30 dimoun ki pe antre dan ledikasyon *from URS*.

Nou, nou war sa konman en bon nouvel. Akoz i en keksoz ki nou'n lager kont Gouvernman lapros ki i ti pe pran. Akoz si nou ti'n ekout zot, zot ti pou'n met tou sa bann dimoun deor.

Dezyenmman, dezyenmman Mr Chairman lo mon de pwen presedan mon krwar i kler ki *l'homme* dan *l'opulence* i bliy son nesans.

Akoz si ozordi ou Gouvernman i konmans koz R3milyon i pa en kantite larzan, mon *wonder* ankor dan 6mwan kwa ki pa pou kout en kantite larzan.

Konmsi pou mwan, mon war sa drol e mon pa krwar poudir personnelman ou dakor avek sa sityasyon Onorab Minis mon pa krwar ditou, mon pa krwar ditou.

Me selman ou, ou'n bezwen vini pou vin, pou vin reponn kestyon dan Lasanble. E mwan, mon krwar poudir ou konn tre byen poudir sa i en *statement* ki ti iresponsab pou

fer dan letan kot dimoun pe, pe trimouse nou tou nou pe ganny demande pou fer sakrifis.

E mon, mon kestyon ti baze lo "*overseas travel*" ki mannyer nou kapab koup sa bann depans ki nou pe war ki konmans vin bann depans ekstravagans. Kot la ozordi nou napa en Minis dan Lasanble nou pa konnen kote i ete.

Nou pa kapab ganny dir kot i ete ki i pe fer me selman nou, nou sipoze pey son saler konman Minis. So mon kestyon. Pa bezwen ankoler.

MR SPEAKER

Lo "*overseas travel*" Onorab Pillay. Eskiz mon en pti kou. Ekout mwan, lo "*overseas travel*" mon'n konpran ou pwen ou'n dir Minister Finans gete si i kapab met sa larzan en lot landrwa.

Me Minister Finans in fer son Bidze, in anmenn son Bidze koumsa savedir in fer sa konklizyon ki in deza la. So annou kontinyen silvouple.

HON SEBASTIEN PILLAY

Mr Chairman mon konpran ou tre byen. Me selman Mr Speaker dan sa konteks ou pa Minister Finans, Minister Finans i la *ok*.

MR SPEAKER

Annou kontinyen silvouple.
Terminen *please*.

HON SEBASTIEN PILLAY

So se zot ki bezwen dir mwan sa pa ou! So sa ki mon ti a kontan demann, demann *PS* pou Finans eski sa R10milyon ki zot in mete anba "*overseas travel*" i en, i en sonm ki in fini fikse ki pou ganny depanse?

Oubyen i en sonm ki zot pe *monitor* pou regarde si vreman i annan nesesite pou depans li. E ki bann kontrol ki zot pe mete an relasyon avek sa sonm? Mersi Mr Chairman.

MR SPEAKER

Mersi. *PS* oubyen Minis ou anvi adres sa dernyen pwen.

PS DAMIEN THESEE

Mersi Mr Chair. Parey mon'n eksplike sa 10milyon i en provizyon ki nou'n met la. Si nou get bann lannen avan *travel* dan Gouvernman ti tre o, ti ganny *allocate* dan bann Minister ti kapab desot sa 50milyon.

Ti enkli peyman pou bann *training* peyman pou *attend* bann miting rezyonal oubyen enternasyonal pou bann diferan afilyasyon ki nou annan.

E wi mon dakor nou poudir avek *COVID* nou'n

bezwen adapte e fer bann miting vertyel me selman osi nou'n bezwen admet petet son lefikasite pa dan tou sans ki efektiv.

Si nou pou konpar pou nou Minister Finans osi, petet i sa bann miting vertyel i tre kourt. *Capacity building* osi *even if* nou anbark lo la pou pa ganny son 100poursan lefikasite.

So pou mwan *issue is not about travelling*, me swazir sa *right* vwayaz oubyen sa *right training* ki nou pa zis *travel for the sake of travel*. Se sa ki enportan.

So alor la nou'n fer en provizyon R10milyon selman, ki pou bezwen laprouvasyon *President's Office* avan okenn o zofisye Gouvernman i voyaze. E *even* bann lezot *junior staff* fodre annan rezon avan Minis i aprouv vwayaz sa bann *junior staff*.

Alor *until* sityasyon dan bann pei deor i kontinyen *as is* - savedir i annan bann pei avek sa bann *lockdown* oubyen nou war zot sityasyon i pa pe amelyore. Mon krwar pa si Gouvernman i pran desizyon pou *allow* okenn *public servant* pou voyaze.

Me *in the event* keksoz i amelyore avek program vaksinasyon *then* nou ava servi.

I annan *mid-year* osi. *Mid-year* i ava donn nou lendikasyon ki manner nou pou servi sa larzan si nou kapab remet li dan en lot alokasyon. Mersi.

MR SPEAKER

Mersi PS. Onorab Georges.

HON BERNARD GEORGES

Mon napa keston Mr Chair.

MR SPEAKER

Tre byen. Avek sa nou a vot lo sa Bidze pou “*Other Goods and Services*” dan seksyon 2 paz 31 pou en total R150milyon 174mil. Manm ki an faver lev lanmen silvouple? Mersi ou’n ganyen madanm? Okenn Manm ki kont ?

Bidze pou “*Other Goods and Services*” dan seksyon 2 paz 31 pou en total R150milyon 174mil in ganny 24 vot pour, 0 vot kont e 9 abstansyon. Bidze in aprouve par Lasanble. Mersi.

NET LENDING

MR SPEAKER

Nou a pran Bidze pou *Net Lending* ki dan seksyon 2 lo paz 38 pou en total R552milyon 431mil. Minis mon konpran ou’n fini adres sa Bidze e nou a pas direkteman lo entervansyon bann Manm.

Wi Onorab Pillay wi. Wi be personn pa’n lev lanmen alor mon’n pas lo ou.

HON SEBASTIEN PILLAY

Mersi Mr Chairman. Mr Chairman sa, sa *head* ki la i en, i en *head* vremen enportan. E i annan en nesesite pou nou zis ganny serten klarifikasyon lo serten sonm ki, ki *involve* ladan.

Nou war poudir anba “*Net Lending*” nou pe prêt a pepre 461milyon pou i annan *PUC, DBS, STC*. Minis in donn nou serten leksplikasyon eski *PS* pou Finans i kapab donn nou detay par egzanp si sa “*Net Lending*” i enkli bann *completion of* proze Danm La Gogue ladan?

Si sa i antre ladan e si zot annan okenn detay lo, lo *status* proze? Mon konnen *Government Assurance* Komite Lasanble ti deza vizit li.

Mon osi konsernen avek sa size *public det interest* an relasyon avek sa *domestic debt*. Eski *PS* i kapab dir nou si *issuance of* bann *securities* ki nou’n issue an relasyon avek *COVID*, bann *Treasury Bills* eksetera.

Si sa pou annan en lenpak ou ki, ki sa ki nou’n ganny prezante la pou ganny *revised* dan okenn fason.

Si i annan okenn dimoun ki deside oubyen ki krwar dan sa bann, dan sa bann *securities* ki vin sa?

And then mon le regard sa *subscription to international organisation* e i en kestyon ki, ki Onorab, Onorab Churchill Gill lo nou kote ti abitye demande in kontan demande.

Me lo sa "*Subscription to International Organisations*, eski Gouvernman in fer okenn travay pou regarde lekel lorganizasyon ki nou pou kontinyen mentenir sa *subscription* ?

Oubyen si i annan lorganizasyon kot nou pou, nou pou pran bann lezot desizyon lo la, zis pou nou kapab ganny en konpran ki direksyon ki Gouvernman pe ale an vizavi avek sa 31 ekek milyon Roup ki pe ganny mete dan sa Bidze? Mersi Mr Chairman.

MR SPEAKER

Mersi Onorab. Wi PS. Minis.

THE DESIGNATED MINISTER JEAN-FRANCOIS FERRARI

Non Mr Speaker. Pou nou travay en pti pe dan, dan en lord eski ou anvi pran "*Subscription to International Organisations*" an menm tan ki nou pe pran "*Net Lending*?"

Mon ti a mazin i dan "*Others*" e apre midi nou ava pran li si ou pa, si ou pa *mind* Onorab nou ava pran li apre midi. Mersi.

MR SPEAKER

Wi mon war i annan en diferan *panel* pou sa, me nou ava al an lord mannyer nou ete lo nou program. Wi PS.

PS DAMIEN THESEE

Mersi Mr Chair. Lo premye kestyon "*Net Lending*" wi pou PUC i enkli Danm La Gogue. I annan osi proze *33 KV south* apre osi proze *Neptune* pou bann diferan lenfrastruktir osi anba PUC.

E dezyenmman i annan DBS ki osi nou pe asiste li avek finansman, an vi difikilte ki i pe gannyen avek bann *loan differment* ki pe ganny fer avek sityasyon.

I annan apepre R6milyon par mwan *shortage* dan bann repeyman *loan*. Prezan nou bezwen kapab asiste li avek larzan pou li kapab re finans son bann lezot komitman ki li i annan dan *market* e nou pe fer sa depi 2020.

E an sa ki konsern lefe sa bann *loan* avek plizoumwen bann lezot fasilite ki nou pe pran tou le mwan dan *market*, i pa neserman annan gran lefe

lo la, an vi ki sa i bann i deza bann *loan* ki nou'n pran e nou bezwen re finance.

E dan *market* tou le semenn nou pe pran larzan pou finans bann peyman Gouvernman. E "*Net Lending*" li i plizoumwèn sa bann landrwa i bezwen rann nou. Savedir *PUC* i bezwen rann nou sa larzan pou nou kapab rann sa bann landrwa ki nou pe prêt larzan.

So i pa vreman afekte Bidze Gouvernman, me sete kondisyon ki sa bann Fon Devlopman in plizoumwèn demande ki zot prefere prêt larzan ek Gouvernman, dan plas prêt larzan direk avek *PUC*. Mersi.

MR SPEAKER

Minis. Mon a les Minis fini avan Onorab Pillay.

THE DESIGNATED MINISTER JEAN-FRANCOIS FERRARI

Mersi Mr Speaker. Mr Speaker mon ti a kontan pran sa lokazyon pou mon lans en lapel avek tou bann dimoun bann konpanyen ki'n prêt larzan avek Gouvernman.

E bann ki annan *rent* avek Gouvernman. Nou konpran ki lannen pase ti en lannen difisil, me selman sa ki nou ti a kontan war se en mesaz i sorti dan sa

Lasanble poudir avek bann dimoun si ou drwa ou *rent* peye silvouple. Si ou drwa ou *loan* peye silvouple.

E si ou pa kapab pete vini koze eksplike fer en plan e peye. Akoz nou pe depan lo Lasanble pou anvoy sa mesaz. Nou pa anvè tann bann mesaz ki en dimoun ki pa'n pey son *rent* i ganny *ar* i pe ganny viktimize, akoz i annan en sak anba ou biro i mark *KOSTE* lo la. Sa bann keksoz koumsa.

Konmsi Mr Speaker konmsi mon anvè vreman fer en, en lapel pou nou responsabiliz nou pep kot ou si ou pey ou lakaz si ou konnen poudir ou pa pe, ou pa pey ou lakaz, sa dimoun pou met ou deor.

Be ou landrwa travay osi tou sirtou dan bann landrwa parey "*Leve Debourye*" ki bann landrwa ki bon marse, vini seye, fer en zefor kot ou bite vini vin koze. Pa bezwen zve politik. Napa politik dan bann keksoz koumsa.

Napa politik dan *rent* napa politik dan *loan* labank. Sa ki annan son *loan* fer son zefor. Pei in vin reouver, annou gete ki mannyer nou kapab sakenn *meet* son responsabilite.

E se mon lapel se avek Lasanble ;- si Lasanble i anvoy bann mesaz kontrèr dimoun pa

pou pran zot responsabilite. So annou *unite* lo sa pwenn e annou fer sir ki tou dimoun i travay byen pou nou dres sa pei, pou nou tou benefisyè a lafen. Mersi Mr Speaker.

MR SPEAKER

Mersi. Onorab Pillay ou ti le *follow-up* lo ou bann pwenn?

HON SEBASTIEN PILLAY

Mersi Mr Chairman. Mr Chairman lo kote *PUC Danm La Gogue* nou kler nou'n ganny sa lesplikasyon. Lo sa dezyenm pwenn *regarding* bann *rent, dues to Government*, souvandfwa ler i dir ou ler ou al lapès ou trenn laliny ou kapab tyonbo diferan kalite pwason.

Me safwasi la nou'n ganny nou en Minis Dezinyen ki'n dir nou koumsa poudir ki'n vin lev en size totalman. Napa nanryen pou fer avek sa kestasyon ki mon'n demande. In anmenn sak "*KOSTE*" ladan in demande pou nou *unite*.

So kestasyon ki mon pou met devan li se eski prezan ou pe dir ek sa bann dimoun ki pe ganny *evicted* zot kapab al devan al diskrit avek *IEA*, e zot pa pou ganny *evicted*? *Is that what you're saying*. I sa mesaz?

So si oule sanz si oule pas sa mesaz, Lasanble i la en

platform pou li pas sa mesaz e la, la mesaz ki ou ava pe pase.

An relasyon avek *DBS* Mr Chairman, mon'n konpran byen pwenn Minis, pwenn *PS*. Me selman *PS* sey eksplik nou, nou konnen i annan bann lezot keksoz bann lezot *funds* anba bann lezot proze.

Ki mannyer *portfolio DBS* i *deal* avek sa bann lezot sa. Par egzanz bann ki annan pou fer avek bann anba mon pa konnen si anba *11th EDF* i annan oubyen bann lezot landrwa i annan.

Ki mannyer sa i ganny *segregated* pou ki aktivite normal *DBS* an relasyon avek bann *development loan* i kontinyen. Me sa bann ki annan bann sonm ki'n deza ganny *pre allocated, dedicated* eski sa pou kapab ganny pran anba, anba *DBS*?

And then mon *final* pwenn Mr Chairman, *given* sa ki Minis Dezinyen pe dir, be aköz ki Gouvernman alors pa fer en *suspension of* si ou kapab *obligations* par egzanz, ki zot ti fer parey Gouvernman avan ti fer.

Kot ou ava annan en regilasyon *some sort* ki sorti bann dimoun ki nou konnen *COVID* i en nespes fors mazer, zot pa pe kapab swa pey *loan*, swa pey isi. Apre ki zot in

regarde *whether or not* zot deserve gannyen dan sa sirsi. Zot ganny en sirsi *up till* zot kapab sa i annan bann lagreman ki ganny fer avek zot.

Se sa ki mon krwar mesaz ki nou lepase e si ou pe ed nou pas sa mesaz ou pa zis *evict* sa bann dimoun dan leve debourye me ou donn zot sans pou koz ek zot *then* sa i mesaz ki devret pe ganny pase. Mersi Mr Chairman.

MR SPEAKER

Wi Minis.

THE DESIGNATED MINISTER JEAN-FRANCOIS FERRARI

Mersi Mr Speaker. Mr Speaker se egzakteman mesaz ki nou le fer pase. Si ou annan en difikilte pou ou pey ou *loan* oubyen pou ou pey ou *rent*, ou vin devan ou fer en lagreman. Parey nou fer avek *PUC* pou elektrisite.

Nou fer en lagreman, nou fer en *payment plan*. Me selman nou pa asize apre nou kriy viktimizasyon. Nou mon mesaz napa nanryen diferan avek mesaz *CEO IEA*.

Sa ki anvi vin fer en *payment plan* vini. Selman sa ki nou dwa nou bezwen peye. Sa ki nou dwa nou bezwen peye. Nou pa kapab nou bezwen sanze sa sistenm kot

nou krwar poudir, poudir nou'n ganny dir avek tel dimoun pa bezwen, pa bezwen peye.

La nou pou *write-off* - nou pa *believe* dan sa bann keksoz koumsa. Nou *believe* sa ki ou dwa ou pou bezwen peye, akoz sa larzan i pa zis pou, i pa pou Gouvernman sa. I pa pou *IEA*. I pa pou Mr Collie sa i pou lepep Seselwa.

Si ou, ou pa peye fodre en lot dimoun pou bezwen pey dan ou plas. E nou pa anvi fer li koumsa vini e direkter *CEO IEA* in fer li byen kler, vini vin eksplike konmans peye *clear* en pe ou retar e ou ava *ok*.

Koumsa ki nou anvi travay ;- byen prop, byen kler! Mersi Mr Speaker.

MR SPEAKER

Mersi Minis. Lezot pwen *PS* pou adrese wi.

PS DAMIEN THESEE

Mersi Mr Chair. An sa ki konsern bann lezot *facility* anba *DBS*, i annan bann lezot ki pe administre ;- par egzanp ou annan sa (*ADF*) *Agricultural Development Fund* ki plizoumwenn en linisyativ atraver osi Minister Lagrikiltir.

So sa osi i ganny finanse atraver Bidze ki donn li en fon ki pou li administre. Ou annan ou annan ou (*FDF*) *which is the*

Fisheries Development Fund ek *SFA* osi ki administre.

Ou annan ou *SBFA Fund* osi ki ganny finanse atraver sibvansyon ek Bidze atraver sa fon. Apre ou annan ou *the SME Scheme* ki sa osi i *subsidise* bann lentere ki ganny donnen pou serten kalite biznes.

E tousala i separe avek *the main* plizoumwèn fasilite ki *DBS* i annan lo li menm. Mersi.

MR SPEAKER

Mersi. Nou bezwen terminen. Onorab Pillay fer ou dernyen pwen.

HON SEBASTIEN PILLAY

Mersi Mr Chairman. Mon krwar i en mesaz kler ki'n ganny anvoye ki pou annan sa negosyasyon. Zis ki mon ti le met lanfaz lo la avek, avek *Designated Minister* i se ki sa *building* son lentansyon sete pou *provide* landrwa pou *microenterprise*.

I pa landrwa ki sipoze - i pa sipoze pe vin landrwa pou lofis. So se sa konsiderasyon ki ou Gouvernman i bezwen pran an relasyon avek si en dimoun pa pe peye *ok* ou bezwen tir li be met en lot dimoun ki kapab fer donn li en lespas, pou ankouraz li pou travay.

Me pa pran sa landrwa e retir sa *from* bann *micro*

enterprises aköz nou pe limit lakantite landrwa ki zot annan.

E mon dernyen pwen Mr Chairman i en pwen ki mon ti demann Minis Finans pou gete me, *Designated Minister* in *raise* sa pwen si ou drwa ou peye, i byen.

Me ti annan en pwen ki mon ti'n *raise* avek Minis Finans, e mon ti a kontan met devan ou si ou pa ankor fini adrese, aköz mon pa ankor, mon pa ankor vreman tann nanryen lo la.

I konsern sa *billing* ki *PUC* pe fer tou dernyerman, kot bokou dimoun in eksplik zot in eksplik konsern vizavi *billing* ki *PUC* pe fer. Zot pe dir ki zot *bill* i *over and above* sa ki zot in abitye peye e ki sa ti en keksoz ki devret ganny eksplike.

Mon oule met sa devan zis parey *Designated Minister* in dir. Pou nou servi sa Lasanble pou ankouraz bann dimoun pou peye, me dimoun i bezwen pey sa ki in servi e non pa sa ki i pa'n servi. Mersi Mr Chairman.

MR SPEAKER

Mersi. Minis ou bezwen repons lo la.

THE DESIGNATED MINISTER JEAN-FRANCOIS FERRARI

Briyevman Mr Speaker.

MR SPEAKER

Silvouple.

**THE DESIGNATED MINISTER
JEAN-FRANCOIS FERRARI**

Lo litalizasyon sa *building* “Leve Debourye.” Mon krwar ki Onorab ou ava aksepte ki i annan en nouvo Gouvernman e si sa Gouvernman avan in fer en plan i pa vèdir ki i sa nouvo Gouvernman i bezwen fer egzaktaman parey sa ki in fer avan. Akoz si non nou pou dan menm problemm.

Savedir sa Gouvernman i annan en swa pou li deside ki i pou fer avek en *building*, oubyen avek, avek en lot. So sa i prerogativ sa Gouvernman donk sa i sa napa okenn konfli lo la.

E an sa ki konsern *PUC* ; -parey mon pe dir ou Onorab sak fwa ou pou lev sa bann pwen mon poudir ou sa i bann pwen ki mon krwar zot kontan. I annan dimoun i kontan servi sa dan *press conference*, fer *press conference* lo la nou pa pe diskrit tarif elektrisite ozordi. Mersi.

MR SPEAKER

Mersi. Avek sa nou a vot lo Bidze “*Net Lending*” ki lo paz dan seksyon 2 paz 38 pou en total R552milyon 431mil. Manm ki an faver lev lanmen

silvouple? Mersi tou dimoun in vote. Okenn Manm ki kont.

Bidze pou “*Net Lending*” dan seksyon 2 paz 38 pou en total R552milyon 431mil in ganny 31 vot pour, 0 kont e 1 abstansyon. Alor sa Bidze in aprouve par Lasanble mersi. Nou program swivan i demann en diferan *panel*.

E nou ti’n program zot pou 11er. Be mon a demann *PS* Thesee avek Madanm Clerk ki fer bann laranzman pou sa bann soz, eski zot krwar nou kapab konmans nou prosen sesyon 10er45 pou nou... ? I ok sa? *Panel* a la tre byen.

Bon nou ava pran en poz la e nou a rezwenn 10er45. Mersi.

(BREAK)

**SOCIAL PROGRAMME OF
CENTRAL GOVERNMENT****MR SPEAKER**

Bon nou a swet labyenveni bann nouvo zofisye ki’n zwenn Minis ek *PS* ek *staff* Finans. Sekreter Prensipal, Sekreter Deta pou Minister Finans, Ekonomik e Komers Mr Patrick Payet.

Madanm May-Paule Marengo *Director of Public Accounts Management* Minister

Finans. E Madanm Roseline Hoareau *Grants Manager* pou *National Grants*.

Nou pe pran Bidze *Social Programme of Central Government* ki lo dan seksyon 2 lo paz 35 a 36 pou en total R485milyon 868mil. Nou a konmans avek entervansyon Manm. Wi tenir lanmen en pti moman silvouple.

Byen wi. Pardon Onorab Arissol. Ou annan en pti soz wi. Lo kote *LDS* mon pa ankor note silvouple wi. Byen mersi. Wi Onorab Arissol.

HON SANDY ARISSOL

Mersi Mr Chair. Bonzour Minis avek delegasyon. Mon ti anvi zis lo sa program travay ki nou pe fer mon ti anvi zis demann ou si nou pe pran li - par egzant si nou pou demann kekyon zis lo pansyon oubyen mon demann kekyon lo pansyon and demann lo *News Agency* lot i demann lo *CEPS* lot i demann-

Ki manner nou pou ale konmsi ek sa, konmsi nou fer zis pansyon ler nou napa kekyon nou bouz lo lot? En pti klarifikasyon. Mersi.

MR SPEAKER

Non mon si *PS* i dakor, Sekreter Deta byensir i la avek Minis pou zot soz, mwan mon ti a

kontan ki nou pran sa seksyon antye wi apre nou a vot lo li i korek sa Sekreter Deta, *PS*?

Mersi bokou *ok good*. Bon nou a konmans kote isi avek Onorab Aglae.

HON EGBERT AGLAE

Mersi Mr Chair. *SS, Minister* bonzour ek lekip. Premyerman mon oule kot i konsern *SME Scheme*, mon ti a kontan en pe leklersisman vi ki mon war poudir i annan en logmantasyon anba *SME Scheme* pou vin 40milyon.

Etandonnen osi ki i paret mwan ki osi bann labank osi ki pa pe donn *loan* so sa *Scheme* pa neserman pe fonksyonnen la *as such*, lo kwa ki konsern *disbursement*.

Mon ti a kontan konn pozisyon Finans lo sa *Scheme* premyerman? Lo kote *Chamber of Commerce* mon krwar poudir sizyenm Lasanble ti annan serten *issue* atase avek donn larzan *Chamber of Commerce* ki lot kote latab *LDS* mon krwar ti rekomande ki i annan en *freeze* lo la.

La mon war li annan en logmantasyon pou vin 1milyon. E apre mon war poudir 2022 pou annan en rediksyon.

Mon pe get pozisyon Gouvernman lo size *Chamber of Commerce*, eski zot pe mazin

pou fer li vin en antite ki pou apre ki pou zer ki pou dan en fason, zer son prop lotonomi, zer son prop larzan pou li kapab *run sa chamber*, pou li kapab kontinyen ed nou biznes?

E dernyen kot i konsern *New Born Saving Scheme* ;- an vi ki mon war i annan en R1milyon ok i annan en pti logmantasyon apepre R1milyon ki'n ganny mete.

E vi ki *on average birth rate* i apepre en 1500, zis mwan ti a kontan Finans i eksplik mon en pti gin eski zot satisfè ki tou bann *new born* pe ale laba. Akoz sa, sa *Scheme* i anba *Commercial Bank* eski zot satisfè sa *Scheme* pe marse bann paran ki zot *new born* pe anpli zot form pou zot kapab *ouver account*? Mersi.

MR SPEAKER

Mersi. *Panel PS* Thesee wi.

PS DAMIEN THESEE

Mersi Mr Chair. Premye lo *SME Scheme* son lokazyon in monte, akoz nou war ki tou le lannen *even* si nou ti pe donn apepre 20milyon, nou ti bezwen donn bann fon adisyonnèl pou li apre.

So sanmenm sa pou 2021 nou'n donn 40milyon, 2020 son *spending* sete 41.1milyon, 2019 45.3milyon e 2018 26.6milyon.

So nou'n war en logmantasyon dan demann e si ou get 2020 li menm nou ti annan apepre 191 aplikasyon anba sa fasilite pou en sonm R212.2milyon. So sanmenm sa ki nou'n donn sa laplikasyon.

Dezyenm lo Lasanm Komers Sesel, nou pe propoze pou donn en alokasyon R1milyon pou Lasanm Komers, an vi avek sityasyon *COVID-19* ki *even* 2020 nou ti donn zot R400mil, zot pe ganny serten difikilte pou ganny kot sityasyon avek zot bann *members*.

So proposal se ki pou *at least* pou sa prosen 3an Gouvernman i fer en alokasyon pou, pou *SCCI*, e nou pou war dan bann lannen ki vini sa alokasyon i redwir avek plizoumwèn *assumption* ki sityasyon i amelyore, bann biznes i fer kontribisyon so nou pa bezwen donn, nou pa bezwen kontribye li.

E avek *SCCI* nou'n osi avek sa lannen nou'n osi fer *proposal* pou *La Digue Business Association* ek *Praslin Business Association* R50mil sakenn, ki nou pe propoz en larzan pou zot.

Trwazyenmman lo *New Born Saving Scheme*, ankor li parey nou konnen sa fasilite i donn R1000 pou sak zanfan ki

ne e sa i prosedir ki Minister Lasante i donn zot en sertifika.

Ki al kot *Savings Bank* apre de ki *Savings Bank* i ganny sa sertifika la i ouver en kont i donn sa zanfan. So pou le moman sa i annord i baze lo kantite laplikasyon ki *Savings Bank* i gannyen.

E nou, nou administre sa *centrally* kot Minister Finans e nou *monitor* son kont tou le mwan. E nou war ki le 1 Zanvye sa lannen nou ti annan nou en balans 368mil ki ankor reste dan sa kont.

So nou zis *top up the difference* akoz *on average* nou espekte apeare 1500 *birth in a year*. Mersi.

MR SPEAKER

Wi Onorab.

HON EGBERT AGLAE

Yes mersi *PS* pou lenformasyon. Zis mon ti anvi konnen akoz lo kote *SMEs*, eski bann Labank zot pe donn otoriz, lotorizasyon bann Labank pou *disburse from that Scheme*.

Akoz i paret mwan swa pa, pa pe donner la pou le moman, pou bann rezon mon pa konnen si i relye avek lekonomi. Eski i pou rekonmans donner plitar akoz i annan serten dimoun i ankor pe espere? Mersi.

MR SPEAKER

Mersi. Wi *PS*.

PS DAMIEN THESEE

Mersi Mr Chair. *Well* sa provizyon i plizoumwèn baze lo bann *loan*, *loan* ki'n fini ganny, ki'n fini ganny donner. E ti annan depi 2020 serten *moratorium* par bann Labank ki ti bezwen pa kapab dan en pozisyon pou zot kapab donn bann nouvo *loan*.

So sa dilenn ki avek sityasyon *COVID-19* ki bokou Labank pa war zot pe kapab donn bann nouvo fasilite. So i pou depan lo ki sityasyon i pou amelyore. La bann Labank i evalye zot pozisyon zot kapab fer bann nouvo *disbursement*.

Me selman pou bann *loan* ki'n fini plizoumwèn ganny *disburse*, i annan bann repeyman ki bezwen ganny fer.

E nou tou le *quater* prezan dapre lagreman nou bezwen pey sa bann Labank zot *subvention* baze lo sa *subsidy* ki'n ganny dwa lo sa lentere. Mersi.

MR SPEAKER

Mersi *PS*. Onorab William.

HON WAVEN WILLIAM

Mersi Mr Chairman. Bonzour Minis Dezinyen avek ou lekip. Mon premye kestyon i annan

pou fer avek *Children's Fund*. Mon anvi demann avek Minis Dezinyen ouswa okenn dimoun lo *panel* i kapab dir nou, avek nouvo lapros eski i pou annan en sanzman dan kriter anba ki sa fon i ganny itilize?

E dezyenmman mon ti a kontan ganny en pti lesplikasyon sa i annan sa "*Empowerment and Social Protection program*" la ki annan R450 ekek mil egzaktaman kwa ki zot pe koz lo la?

Epi ankor pou sa *SME Seed Capital* ki 5milyon, la ankor mon ti a kontan si zot kapab donn nou si i annan okenn nouvo lapros vizavi kriter, ki pou ganny servi vizavi lasistans pou bann dimoun?

Mon dernyen se vi *Unemployment Relief Fund* mon war poudir i annan en gran diminasyon sorti 35milyon pou vin 5milyon.

Mon ti a kontan si nou ti ganny en pti lesplikasyon vizavi letan sa rediksyon in ganny fer, kwa ki nouvo lapros zot in war poudir i annan sa nesesite pou fer li, e anba reform anba mezir pe ganny pran? Mersi.

MR SPEAKER

Mersi Onorab. PS wi.

PS DAMIEN THESEE

Mersi Mr Chair. Anba *Children's Fund* sanzman ki pou arive se ki, dan plas en *Board* sa larzan pou ganny zere par Departman Sosyal. Savedir pou annan en Komite laba kot sa Minister menm ki pou administre sa fon dan plas en *Board*.

E i ava administre baze lo serten bann kriter ki pou asiste zanfan ki dan bezwen. Dezyenmman lo *SME Seed Capital*, napa provizyon pou 2021 sa provizyon ki i annan se ki ou war konbyen nou'n donner pou 2020.

Akoz avek peryod difikilte ki nou ladan e avek osi Minister Lantreprenarya, Lendistri, zot anvi revwar sa *Scheme* pou reget li dan en fason pli targete. Akoz la pou le moman i pe donn *start-up* pou lamazorite bann biznes.

So zot anvi fer en revi lo sa *Scheme* so napa okenn alokasyon.

Trwazyenmman lo si mon'n ganny ou byen, i ti lo *youth employment* oubyen *Youth Entrepreneurship Scheme*?

MR SPEAKER

Empowerment and Social Protection korek Onorab? Eklersi li kote i ete petet.

PS DAMIEN THESEE

Mersi. Sa *Empowerment and Social Protection* sa i en lasistans ki ganny donnen plizoumwèn avèk legliz Katolik ki ed zot avèk zot bann depans plizoumwèn, pou mon kapab dir met par egzanp kot Katedral pou kit li dan en kondisyon par egzanp ed zot ek bann *cleaners* ek en pe keksoz koumsa. Mersi.

MR SPEAKER

Wi Onorab i annan lot pwen ankor.

HON WAVEN WILLIAM

Mr Chairman i annan en kestyon pa ankor ganny reponn vizavi *Unemployment Relief Fund*, pou donn en pti pe lesplikasyon. Sa gran rediksyon e konmsi pou nou konpran en pti pe nouvo lapros vizavi bann mezir.

Epi en klarifikasyon lo sa zafer *employment empowerment*, eski zis larelizyon Katolik ki ganny drwa *apply* pou sa fon ouswa tou bann lezot larelizyon?

Akoz ou'n nonm zis legliz Katolik me lefe ki nou annan plizyer bann larelizyon dan pei. Eski lo en baz demokratik eski bann lezot osi i kapab *submit* proze, eski sa i en form en proze

sa, sa larzan ouswa zis i ganny donnen e lo ki kriter. Mersi.

MR SPEAKER

Mersi. PS ou a rebran.

PS DAMIEN THESEE

Mersi Mr Chair. Mon le ankor klarifye mon pa kler si *Unemployment Relief Scheme*, oubyen si ou pe *mean Youth Employment Scheme* ;- spesifye lekel aköz.

Ok Unemployment Relief Scheme annefe in desann son lokasyon. Nou'n donn 35milyon pou 2021. Bann lannen avan i ti dan ASP e i ti 59.6milyon pou 2020, anba ASP.

So avèk bann reform ki pe ganny fer, nou'n war nesesite dapre diskisyon osi ki nou'n fer avèk Minister Lanplwa, ki nou redwir sa alokasyon. E sa alokasyon in ganny tire avèk ASP in met avèk Departman Lanplwa pou sa lannen.

E in ganny santralize pou le moman. Lo sa konsernan sa Kod anba "*Empowerment*" sa in plizoumwèn en depans ki'n la pou bokou lannen. Mon sizere *I suppose* ki legliz Katolik in sa legliz pli dominan dan Sesel se pou kwa sa in la.

Me selman mon asire si bann lezot *belief* oubyen bann lezot legliz, i santi nesesite pou

zot fer en laplikasyon, zot kapab vin devan e fer en aplikasyon. Akoz nou osi annan en sonm R1.5milyon ki ganny mete konman “*contribution to religious organisations*” ou pou war dan sa alokasyon.

E sa i ganny donnen pou okenn legliz ki vin devan avek bann proze kapital, pou zot par egzanp fer renovasyon lo zot bann legliz nou asiste baze lo aplikasyon. Mersi.

MR SPEAKER

Wi ou mikro. Terminen silvouple. Minis ki pou reponn wi.

**THE DESIGNATED MINISTER
JEAN-FRANCOIS FERRARI**

Mr Speaker mon ti a kontan osi dir ki Onorab William i annan parfetman rezon nou en sosyete milti profesyonnel e i toutafe normal ki si i annan bann fon ki ganny, ki ganny *allocated* pou bann lorganizasyon relizye, ki tou bann lorganizasyon anrezistre rekoni i kapab fer zot, i kapab fer zot aplikasyon.

Pou sa enn an partikilye i *I stand to be corrected e PS in link* sa avek Katedral *Immaculée Conception* e in toultan annan sa kestryon en *national monument*.

Ki en vye batiman ki bezwen en pe swen bann keksoz

koumsa. Donk i byen posib ki se lo sa baz la ki sa proze in ganny formile.

Me selman mon ti a kontan reasir Lasanble ki tou proze pou ganny pou bann lorganizasyon relizye, pou ganny konsidere - pa tou ansanm akoz i annan son - i limite.

Me selman i lentansyon Gouvernman pou fer sir ki i annan lazistis dan sa *disbursement*. Mersi.

MR SPEAKER

Mersi Minis. Onorab Loze.

HON JOHAN LOZE

Mersi Mr Speaker. Mr Speaker i annan *Seychelles Medical and Dental Council* apre *Health Professional Council* mon pa war zot me pe gete si zot in ganny *de-funded* ouswa si larzan in ganny bouze anba en lot vot silvouple?

MR SPEAKER

Mersi. Wi Minis.

**THE DESIGNATED MINISTER
JEAN-FRANCOIS FERRARI**

Minis mon krwar son larepons senp se ki sa de *Council* i ganny *funded* anba Bidze Minister Lasante. Se pou sa ki ou pa pou, ou pou war zot zero isi me

zot in ganny *allocated* dan anba Bidze Minister Lasante. Mersi.

MR SPEAKER

Wi Onorab.

HON JOHAN LOZE

Mr Speaker en profesyonnel lasante ki ti'n dir mwan poz sa kestyon, so mon byen kontan larepons Minis sa ki in dir. Akoz *HPC* i enportan li se laba kot bann *psychotherapist* i al anrezistre. Mersi Mr Speaker.

MR SPEAKER

Mersi Onorab tre byen. Onorab Bistoquet.

HON ROSIE BISTOQUET

Mersi Mr Chair. Bonzour Mr Chair. Bonzour Minis avek ou delegasyon. Bonzour tou bann Onorab. Lo *Home Improvement Re Roofing Scheme for pensioners*, mon ti a kontan demande ki kriter ki ganny servi anba la, akoz eski la dan lepase i annan serten evalyasyon ki'n fer, akoz nou konnen ti annan tro bokou labi lo la e se sa ki mon pe demann sa kestyon?

Aprè *residential services* sa in fini koz lo la. Mon ti annan zis en kestyon apre lo kote sa bout ki Onorab William ti pe koz lo la kot "*contribution to religious denominations.*"

I annan en konpanyen *well* en groupman i apel *SIFCO* ki determin tou bann larelizyon dan Sesel. Akoz si par egzanp nou pou koz lo serten moniman lo kote legliz Katolik mon krwar legliz Saint Paul, osi ti kapab koz lo la poudir li osi i en moniman.

Alor petet met sa an konsiderasyon sa zis en pti pwen. Mersi.

MR SPEAKER

Panel. Wi *PS.*

PS DAMIEN THESEE

Mersi Mr Chair. Anba *Scheme Home Renovation and Roofing of Pensioners Home* sa i en fasilite ki ganny zere avek *HFC* kot i aplik pou bann pansyoner par lao 63an.

E osi bann ki'n pran *early retirement* 60an. E i annan en fasilite ki donn *loan* ziska R100mil pou *re roofing* e osi R50mil pou renovasyon pou lezot *repair works* lo lakaz sa bann laplikasyon.

E Gouvernman i *subsidise* 25poursan *each loan* ki sa aplikan i pran avek *HFC* e en repeyman ki pou 7an. Mersi.

MR SPEAKER

Wi Onorab.

HON ROSIE BISTOQUET

Mon krwar *PS* ou pa'n i annan en bout ou pa'n reponn ;- eski i annan okenn rapor evalyasyon lo sa, sa *Scheme* ki'n fer lannen pase avek dernyen 2an, 3an? Mersi.

MR SPEAKER

Mersi. Minis wi.

**THE DESIGNATED MINISTER
JEAN-FRANCOIS FERRARI**

Onorab i vre ki in bann kriter pou kalifye pa'n zanmen tro kler lo ki baz konmsi ki en dimoun i gannyen e en lot pa gannyen. Mon pa pe *insinuate* ki in annan okenn malversasyon dan sa dan zesyon sa *Scheme*.

Me selman mon kapab dir ou ki a lavenir i strikteman lo baz ki *PS* in dir pou napa politik ladan en dimoun i kapab *apply* i bezwen re peye e si i par lao 63an i kalifye si in retire *early retirement* i kalifye.

E ki i en *loan* ;- i en aplikasyon ki ganny fer nou zis fer sir ki sa dimoun i tou son dokiman in pare pou li fer son repeyman, e Gouvernman i *subsidise* 25poursan.

Donk mon krwar ki i kler e nou anvi, nou anvi fer sir ki napa okenn, napa okenn lapliferans oubyen non ladan. Mersi.

MR SPEAKER

Mersi. Onorab Lemiel.

HON SYLVANNE LEMIEL

Mersi Mr Chair. Bonzour Minis avek ou delegasyon e tou dimoun ki pe ekoute. Premyerman enn, mon ti a kontan swivi avek larepons ki Minis in donnen.

Kot i konsern sa "*home improvement*" pou bann vye dimoun la. Akoz bokou fwa ou'n dan distrik nou'n war ki sa *loan* li menm - *re roofing* i pa sitan en problem li en.

Akoz i paret mwan sa 100mil zot kapab zve avek pou zot kapab fini kouver zot lakaz. Me kan a sa *50thousand* "*home improvement*" ki pou zot fer sa renovasyon zeneral lo *body* lakaz, sa i en gro problem Minis.

Petet dan laliny ki ou pe nonmen la, akoz mon osi mon *believe* ki en dimoun in pran son *loan* i vin *apply* i merit ganny baze lo merit. I pa merit annan politik dan *loan*. Mon pran mon *loan* mon sipoze pe re peye.

So dan ou revi ki ou pe dir ki ou dir ou krwar zot pou al revwar la, i ti pou byen si zot revwar sa *amount ok*?

Sa *amount of loan* ki nou pe donn bann dimoun pansyoner sa 50mil, petet nou *cap* li *up to a 100* li osi. Prezan

li sa dimoun i a gete si i pou pran sa 50. Si i pou pran 25 konbyen i pou pran *at least* zot a kapab fer en bon *renovation* lo sa lakaz e repey zot *loan*.

Dezyenmman mon war lo “*National Grants for non-profit organisations*” zot in ganny en ogmantasyon sorti 8.2milyon, pou vin 9milyon petet donn nou en pti pe lesplikasyon?

HFC nou war ki i ti pe ganny li 18milyon avan. Mon krwar dan sanmenm sa ki zot donn bann *loan* bann dimoun. E sa lakantite larzan li menm in desann pou vin 10milyon petet nou ti a kontan ganny en pti pe lesplikasyon?

E dernyen se *Laptop Scheme* nou konnen bokou nou bann zenn lekol segonder e pos-segonder e mon panse bann *teachers* osi anba sanmenm sa ki zot *apply* mon pa tro sir en pou *teachers*.

Me selman mon war en rediksyon li osi lo kote *Laptop Scheme*, petet ti a bon nou konnen akoz sa rediksyon eski nou ganny pli pti git *students* ki pe *apply* or i annan en lot rezon akoz zot in fer desann? Mersi.

MR SPEAKER

Mersi. Wi Minis.

THE DESIGNATED MINISTER JEAN-FRANCOIS FERRARI

Tre briyevman Mr Speaker. Mon ti a kontan dir avek Onorab nou pran son sizesyon lo pou revwar sa sonm. *In fact* tou sa bann sonm, tou sa bann alokasyon ki ganny *cap*, i bezwen annan en sistenm ki detanzantan tou le 3an, tou le 5an, i ganny revwar pou met li an relasyon avek kou lavi ki mannyer in ogmante.

Donk sa i en sizesyon ki nou ava *take onboard*. Lezot *PS* ou ti a kontan- ?

MR SPEAKER

PS wi go ahead.

PS DAMIEN THESEE

Mersi Mr Chair. Pou ” *national Grants*” wi nou’n fer en provizyon pou en *increase* akoz pou lannen 2021 nou pa ankore arive evalye bann aplikasyon konpare ek bann lannen avan.

Anvi retar ki nou ti gannyen avek *budget call*. Akoz mon pa rapel nou’n prezant Bidze a lafen Zanvye, so ti annan serten retar pou met ater sa bann *calls* so i zis en provizyon ki nou’n fer.

Dezyenmman lo *Laptop Scheme* nou’n fer en provizyon 3milyon konpare avek 5milyon bann lannen avan parey nou konnen la sa *Scheme* i aplik depi bann manmay segonder ziska pos-segonder.

E i annan diskisyon pou gete si nou pou kontiny li lo sa menm lanpler. Espesyalman bann manrmay segonder depi *S.1* oubyen si nou, si nou bouz li pou zis pos-segonder kot la i ava plizoumwen gete lekel ki sa bann *laptop* pe vreman benefisyè.

Akoz nou konnen i annan biznes ki ganny fer avek sa *Scheme* osi i annan, i annan sa bann *laptop* ki ganny vann apre pa neserman pe ganny servi. So nou, nou target li pou bann manrmay pos segonder be bann manrmay ki pli ba eski zot pe servi li so pou annan sa evalyasyon ki pou, ki pou ganny fer.

Dezyenman pou sa *Housing Subsidy Scheme* osi nou'n fer, fer li desann aköz mon war demann osi pou *loan* in desann avek *COVID-19* depi 2020 e osi pou sa, pou sa lannen anvi ki pa pe neserman donn sa kantite *loan*.

I annan en rediksyon osi par bann Labank oubyen *HFC* pou donn *loan*. So si sa keksoz i amelyore nou ava kapab revwar sa *mid-year* oubyen pou Bidze 2022. Mersi.

MR SPEAKER

Wi Onorab ekersi.

HON SYLVANNE LEMIEL

Mersi Mr Chair. Mon ti a kontan met en pti pwen devan Minis avek *PS*. Mon konpran ou'n dir ki zot pe revwar sa *Laptop Scheme*. I enportan wi e mon osi mon pa pou, mon pa pou dakor avek en dimoun ou'n rod en *laptop* mon pou merit servi pou mon ledikasyon, me selman ou pe vann.

La mon pe koz dan laliny ki pli serye aköz i annan bokou dimoun ki serye la deor mwan, mon en manman kekfwa ozordi pandan *years* mon pa'n kapab ganny en pti larzan pou mon kapab aste en *laptop*.

Me la nou'n anmase ek letan *COVID* osi nou'n war osi poudir bann zanfan i bokou, bokou bezwen pli en *laptop* kot lakaz.

Kot paran i aste en pti *data* i ganny sans fer son leson. Annou etidye byen sa sityasyon sirtou pandan sa peryod ki nou ladan la sa pou al kontinyen sa *COVID* pa pe ale li.

Nou bezwen get byen kote nou met larzan esansyel sirtou pou nou bann zanfan. Mon krwar i enportan sa *Laptop Scheme* e annou ziz ka par ka annou pa tro koupe kekfwa pou de priv serten zanfan gannnen.

Akoz Minis, aköz i annan menm paran ki zot zanfan i dan *P6* konmsi ki'n vin apros nou, ki

pe dir mon poudir mon zanfan pe fer byen mon pa kapab kalifye sa *Laptop Scheme* mwan.

Me i dir ou i pou segonder e pou pos-segonder i pa kalifye. So avan nou koup konmsi en pe drastikman annou gete.

Akoz pli bokou paran pou bezwen *laptop* dan lavenir. Mersi.

MR SPEAKER

Mersi. Eski *panel* i bezwen adrese oubyen nou *ok*? Tre byen. Onorab Sandy Arissol. Anr ou ti zis pou soz, *ok* tre byen. Alor mon a pas lo Onorab Andre.

HON CLIFFORD ANDRE

Mersi Mr Chair. Mr Chair Onorab Aglae in tous lo sa *issue* *SCCI* mwan, mon ti en dimoun ki dan sizyenm Lasanble mon ti, mon ti *voice* sa konsern.

Akoz *SCCI* i annan bann *businessmen* e an prensip zot fer en kontribisyon anyel as en Manm *SCCI* so mon pa konpran aköz ozordi Gouvernman pe donn R1milyon *SCCI* in sorti 400mil in ariv R1milyon mon pa pe konpran sa lozik par deryer sa.

Parkont ler mon get Praslin avek La Digue in ganny 50mil. E si nou asize nou fer kalkil byen lo Praslin Onorab

Gill i a koriz mon avek Onorab Woodcock i pa la avek Onorab Porice.

Praslin i annan bokou, bokou biznes, alors aköz nou donn li 50mil be donn 50mil *SCCI*. E bann biznes Minis zot in fer kontribisyon zot in al *State House* zot in donn poyennmen, donn tyek 5milyon, ;- kantite larzan !

Be savedir zot pe donn nou ek lanmen gos zot pe pran ek lanmen drwat ! Mwan, mon sizere ki nou, nou serye lo la zot pa devret gannyen. Plito nou pran sa nou anvoy dan *Dedicated Fund* nou donn bann manmay bann pti dezennen, ki nou'n war i annan serten problem.

Mwan sa enn dezyenm nou annan sa *national Grant* ki Onorab Lemiel fek koz lo la, la ki'n ariv 9milyon mon, mon ti a kontan konnen ki kantite pou *non-profit* ki kantite sa nou annan ki nou pe donn sa bann larzan?

Akoz i annan kantite lenstitisyon i vini i dir ou *non-profit* i pe ganny larzan en lot landrwa li, selman i pe pran larzan ek nou menm ankor ! Konmsi eski sa legzersis pe ganny fer pou gete si vre zot bezwen sa larzan si zot pa pe ganny lot landrwa zot pe zis sey, fer sa mannev?

Apré mon annan sa 9milyon ki tonm anba ‘*wage Grant COVID-19*’ mon ti a kontan konnen kwa sa. La akoz mon get son sif avan i 1.2bilyon mon pe mazine ki pa *FA4JR* ki li menm li in vin *FA4JR* in dir *Fafa4*, so mon ti a kontan ganny en pti pe plis leksplikasyon?

E ki manner i pou ganny distribye si nou dir nou’n arete oubyen zis tir sa sif i pou zis ler ziska ler nou arete.

So ti a bon kefwà si nou ganny leksplikasyon, akoz si non sa dimoun pou vini pou fer sa aplikasyon poudir be i annan larzan ki Lasanble in vote akoz mon pa pe gannyen. Mersi.

MR SPEAKER

Mersi. Wi *PS*.

PS DAMIEN THESEE

Mersi Mr Chair. An sa ki konsern *SCCI* nou osi Minister Finans nou *share the same view* ki se bann biznes ki bezwen fer kontribisyon atraver zot lasosyasyon. E nou ti’n arete pou serten lannen donn sa lasistans.

Lannen pase nou ti bezwen apré Bidze fer en provizyon 400mil donn zot. E avek sityasyon manner i ete la nou santi at least pou en peryod letan si ou get 2022 sa

provizyon in sorti 1milyon in ariv 800mil.

E 2023 osi i redwir ki *hopefully by 2024* Gouvernman pa pe fer okenn kontribisyon avek *SCCI* ler sityasyon in amelyore. Zot *SCCI* son Bidze ki i annan se R2milyon in demann Gouvernman 1.2 ki nou, nou pe fer en rekomandasyon avek Lasanble ki nou *at least* donn li R1milyon.

E ler i get son bann sityasyon bann biznes i war i pou kolekte selman 385mil avek bann biznes atraver kotizasyon bann *membership fee*. So i dan serten difikilte la pou bann biznes prive fer kontribisyon avek, avek *SCCI*.

So nou santi *at least* pou sa de lannen ki vini nou kapab ed zot avek sityasyon e ki ler sityasyon i amelyore zot kapab debout lo zot prop lipye. So nou annan *the same sort of* pwennvi ki Gouvernman pa sipoze fer okenn kontribisyon ek *SCCI* me selman anvi ki sityasyon manner i ete la Gouvernman i *come in* pou, pou *fill* sa gap.

Lo sa ki konsern *La Digue Business Association* ek *Praslin Business Association*, anfe sa de lorganizasyon pa’n demann nou okenn lasistans zot.

Zot pa’n vin devan pou, pou fer okenn demann Bidze

me se Gouvernman ki'n santi anvi ki zot bann diferan diskisyon ki nou fer tou le lannen ek zot, *at least* soutyen zot ek en keksoz ki ava kapab petet *subsidise* en pe zot bann.

Par egzanp sorti Mahe pou bann miting ki nou fer avek zot aköz bokou fwa ler nou demann zot pou desann zot prefere ki nou, nou monte aköz zot pa kapab *afford* pou ganny bokou Manm ki kapab vin Mahe pou sa diskisyon lo en nivo ki nou pou anvi avek zot.

E osi bann lezot administratif ki zot kapab annan. So sanmenm sa ki nou'n fer sa provizyon 50mil pou zot sa ti nou prop *sort of* linisyativ. An sa ki konsern ki lezot kestyon.

MR SPEAKER

National Grants PS wi.

PS DAMIEN THESEE

National grants mon a les avek *grants manager* i ava reponn. I annan en rapor osi ki'n ganny fer pou 2020 e ki nou pou publiye deswit apre sa ki zot a kapab war performans oubyen bann *challenge* ki nou'n gannyen avek ladministrasyon sa *Grant*.

So mon ava pas avek *Grants manager* ki ava reponn ou kestyon.

MR SPEAKER

Yes Madanm Hoareau.

GRANTS **MANAGER** **ROSELINE HOAREAU**

Bonjour Mr Chair, bann Onorab avek tou dimoun ki a lekout. Konsernan *national Grants* ler evalyasyon proze pe ganny fer nou fer sir parey nou prosedir i demande bann lorganizasyon i bezwen soumet zot bann *financial statement the previous year*.

Sa i kapab fer nou war kote bann lezot *income* zot pe gannyen. E nou pran sa an konsiderasyon ler nou pe aprouv zot *Grant amount*. Osilannen pase nou ti travay *closely* avek bann lezot parey bann *Scheme* parey *Children's Fund*, *SEYCA* nou lyez ek zot pou nou kapab;-

Konmsi nou pe sey etabli en relasyon travay avek zot pou nou kapab konnen si i annan okenn lorganizasyon ki pou *the same* aktivite ki i pe *request from Grant*, si i pe *request* osi anba laba.

Prezan si nou konnen nou pran sa an konsiderasyon e nou pa fer *funding*. Pou le moman sa i en pe bann keksoz ki nou fer pou nou kapab donn larzan.

MR SPEAKER

Wi Onorab Andre *follow-up*.

HON CLIFFORD ANDRE

Mikro. Mersi Mr Chair. Mr Chair mon ti a kontan felisit *Praslin Business Association* avek *La Digue Business Association* pou sa - zot pa'n demande. Zot pa'n demann larzan e zot pe fer en travay ekselan, sa i montre ki poudir letan zot pa bezwen zot pa vin devan.

E mon osi felisit Gouvernman ki'n donn zot sa pti larzan pou zot kapab *commute* ant *Praslin* avek *Mahe*.

Madanm kot *Grant* i pa'n dir mwan ki kantite lorganizasyon ki i pe demann sa *Grant*. Se sa enn bann kestyon ki mon ti'n demande ki i pa'n dir mon. Mersi.

MR SPEAKER

Mersi. Madanm Hoareau ou a klarifye.

GRANTS **MANAGER**
ROSELINE HOAREAU

Ou pe eskiz mon en pti klarifikasyon. Ou pe rod pou sa lannen *or last year*? Ki pe pou sa Bidze sa lannen. Parey *PS* ti'n dir *funding* pa ti ankor vremen konnen nou pou gannyen.

Selman nou'n konmans travay nou ti'n fini fer en *call* *Zanvye* nou'n ganny 15 aplikasyon. *Actually* Sanmdi nou ti'n zwenn akoz nou ti pe finaliz Bidze. Nou ti ganny 15 laplikasyon pou le moman 11 in *qualified* e preliminar in montre pou le moman i annan 2.6milyon ki pou ganny aprouve.

Prezan *based* lo kantite ki nou gannyen nou sipoze fer en *second call during the year* pou bann lezot aplikasyon ki bann dimoun ki pa'n ganny sans, zot kapab resoumet *during the year*.

MR SPEAKER

Mersi Madanm Hoareau. Onorab Sophola.

HON NOLINE SOPHOLA

Mersi Mr Chair. Bonzour Minis ek ou delegasyon, tou Manm Onorab e tou dimoun ki a lekout. Minis mon premye kestyon se *Day Care Scheme* i ti 19.5milyon e la 2021 i 2milyon.

Mon byen kontan pou sa logmantasyon, me selman Minis mon ti a kontan si ou ti kapab eksplik nou vremen kisisa ki tonm anba sa *Scheme*? Pou tou dimoun ki la deor i kapab konnen bann ki tonm anba la?

E dezyenmman *Orphans Benefit* i ti 3.6milyon e la in desann par 3milyon pou ...

MR SPEAKER

Oule reponn konmela Minis oubyen. Yes Onorab ale fini ou dezyenm kestyon.

HON NOLINE SOPHOLA

Orphans Benefit.

MR SPEAKER

Eskiz mon, mon pa tro konpran ki pe pase. PS oule adrese wi ale Onorab wi *PS carry on.*

PS DAMIEN THESEE

Mersi Mr Chair. Mon krwar ou dan en lot vot ou dan "*Benefits and approved programs of ASP.*" Mersi.

MR SPEAKER

Eski sa i enn bann item apre midi PS? Ou'n fini avek sa *ok* tre byen. Wi Onorab terminen.

HON NOLINE SOPHOLA

Sorry Speaker.

MR SPEAKER

Mersi.

HON NOLINE SOPHOLA

Termin sa dezyenm kestyon Speaker.

MR SPEAKER

Ale carry on wi.

HON NOLINE SOPHOLA

Ok mersi. *Orphans Benefit* i ti 3.6milyon e la in desann enormeman par 3milyon pou 2021. Mon vremen trakase avek sa koupir Minis donn nou en lesplikasyon aköz sa gran rediksyon?

MR SPEAKER

Mersi Onorab. PS wi.

PS DAMIEN THESEE

Mersi Mr Chair. Mr Chair *Orphans Benefits* i dan laliny *Benefits and Approved Programmes of ASP*, ki nou'n fini vot lo la. Mersi.

MR SPEAKER

Ok tre byen. Onorab Uranie.

HON ROCKY URANIE

Mersi Mr Chair. Bonzour Minis avek ou delegasyon. Bonzour tou koleg Onorab e byensir Digwa ki a lekout.

Minister mon vwar anba sibvansyon pou bann antrepriz piblik. Mon vwar *SPTC* ek lezot.

MR SPEAKER

Esper mwan en pti kou. PS eksplik li silvouple

PS DAMIEN THESEE

Mersi Mr Chair. Nou lo *socials programmes of Government* ki lo paz 35 e 36 selman. Mersi.

MR SPEAKER

Onorab ou a anmas ou kestyon. Ale tre byen nou a kontinyen. Onorab Esparon.

HON REGINA ESPARON

Mersi Mr Chair. Mr Chair mon ti ava anvi lo paz 35. Mon ti ava anvi fer en klarifikasyon “*contribution to CEPS*.” I annan en sonm 2milyon 377mil la.

PS ou ava rapel letan ki Minis Lafanmir ti vini i ti eksplik nou poudir ti annan sa *Grant* ki *EU* ti donnen pou fer sa *crisis home*. I ti fer nou konpran poudir ki zot ti dezapwente ki lafason ki sa landrwa laba ti’n ganny zere, i pa dapre ki zot ti ganny donnen pou fer.

Mon kestyon se ki par egzantp la avek *CEPS* nou pe vote pou donn li sa 2milyon 377mil, eski i annan en odit ki ganny fer kot kont *CEPS* laba? Parske i annan bokou koze ki i annan en pe koripsyon ki pase laba.

Nou konman Lasanble nou pe vot pou sa Bidze. Nou ti ava kontan konnen si i annan en odit ki ganny fer, pou vwar ki sa larzan, ki nou pe donn zot i ganny depanse pou sa rezon ki i ganny donnen? Premyerman.

Dezyenmman lo paz 36 i annan en *Innovation Trust Fund* R500mil. Ti annan R500mil lannen pase e la sa lannen napa nanryen, me selman i annan prozeksyon pou ankor R500mil pou lannen prosenn.

Mon ti ava kontan konnen ki kalite depans i ganny fer anba sa *Innovation Trust Fund*? Mersi Mr Speaker.

MR SPEAKER

Yes, wi.

PS DAMIEN THESEE

Mersi Mr Chair. An sa ki konsern Bidze *CEPS*, avan nou donn li son Bidze, i donn nou son *audited annual accounts*. E se tou *requirement* ki enpoz lo li. I ti ganny *exemption* pou li swiv *The National Grants Policy*.

So si i pa swiv *National Grants Policy* nou pa vreman annan en lizye lo li, akoz *CEPS* in ganny vwar konman sa Lorganizasyon ki sipoze sa parasol ki get tou bann *NGOs*. Selman sa bann *NGOs* ki aktyelman anrezistre avek li.

So nou’n napa okenn sipervizyon lo li oubyen nou pa konnen si okenn odit in ganny fer lo li. Me selman i pou soumet son *annual audited accounts* avek nou.

E dan son Bidze 3milyon ki i annan pou 2021,

Gouvernman pe finans sa 2.3 ladan selman. An sa ki konsern *Innovation Trust Fund* nou pa'n met okenn provizyon pou li pou 2021, akoz mon krwar sa ti en landrwa ki Gouvernman i anvi revwar, nesisite oubyen si i aplikab pou donn en *Trust Fund* ankor, pou bann keksoz inovasyon.

Petet nou pa dan sa sityasyon oubyen nou ariv sa *level* ki nou vwar nou annan sa bann kantite proze ki pe vin devan, konpare avek bann lezot *Trust Fund* ki nou'n tenir parey *Disabled* oubyen *Sport Trust Fund* ki nou'n kontinyen mentenir. Mersi.

MR SPEAKER

Mersi, Onorab Gill.

HON CHURCHILL GILL

Mersi Mr Chair. Bonzour Minis ek *panel* ek tou Manm. Mon kestyon i lo provizyon R400mil pou *IOT*. Son deskripsyon i met Trezyenm Mwan Saler apre i met Gratwite.

So ou kapab donn nou en lesplikasyon sa R400mil i pou egzaktaman kwa. An menm tan i annan – i pa kler pou bokou Seselwa ki kalite laranzman dan Kontra *IOT* i annan ant Gouvernman avek *IOT*?

Petet la i letan kot nou ti kapab eksplike ki bann keksoz,

bann komitman ki Gouvernman li i bezwen kontribye lo son par konsernan *IOT*.

E koumsa i ava kler bann larzan ki dan Bidze akoz zot dan Bidze, tou dimoun a lo menm paz. Mersi.

MR SPEAKER

Mersi Onorab. Wi Minis.

THE DESIGNATED MINISTER JEAN-FRANCOIS FERRARI

Mersi Onorab. Onorab i vre ki bann kondisyon pou lenstalasyon *IOT* Sesel, pandan plizyer lannen pa'n toultan tro kler akoz in baze lo bokou konsesyon lo bokou *incentives ad hoc* ler zot ti demande, zot ti gannyen.

E en bon pe dispansasyon lo bann Lalwa travay, taks lo bann keksoz koumsa. Donk sertennman i annan travay pou – mon pa anvi dir poudir i annan dezord me zis pou nou klarifye tou sa bann sityasyon.

E mon kapab dir ou ki depi ler mon'n pran responsabilite Minister Lapes, mon'n annan bokou relasyon avek *IOT*, pou nou kapab annan en bon relasyon travay.

Sa sonm ki la *well* avan sa sonm. Wi sa sonm ki la i pou bann gratwite *ok*? Akoz napa provizyon pou *IOT* pey gratwite

pou bann travayer. Alors Gouvernman in bezwen *step in* pou li pran responsabilite gratwite bann travayer, ki'n ariv sa laz kot zot pe al pran zot retret.

Now an sa ki konsern Trezyenm Mwan Saler sa *issue* ti leve lannen pase. E mon ti annan bokou negosyasyon avek *IOT* e sa peyman ti ganny fer. E ti ganny partaze ant 40poursan Gouvernman Sesel 60poursan *IOT*.

Donk *basically* ti ganny tire dan zot *dividends* avan peyman. Ki en sityasyon pa mal me selman pa ideal. Me nou pe travay pou nou met en pe plis striktir ladan.

E mon santi ki avan lafen lannen nou pou'n kapab eklersi sa bann sityasyon, sa bann pti *anomaly*. Bokou keksoz osi pou sanze ler bann *business tax regime* pou sanze an 2023 kot *the playing field would be much more level*.

Me selman i enportan ki antretan nou zer sa sityasyon byen pou ki bann travayer i merit ganny sa ki Lalwa i dir zot merit gannyen.

So mon satisfè la ki i annan sa R400mil, pou asire ki bann gratwite i ganny peye sa lannen. Mersi.

MR SPEAKER

Wi Onorab Gill.

HON CHURCHILL GILL

Mersi pou ou larepons, zis en klarifikasyon sa lagreman avek *IOT* donnen bann keksoz ki ou'n mansyonnen dan larepons. I en lagreman ki petet i pe ariv son letan pou renouvle, kot prezan i ava en loportinite pou kapab adres sa bann keksoz ki'n ganny fer sorti. Mersi.

MR SPEAKER

Minis in note mon asire. Onorab Vidot.

HON AUDREY VIDOT

Mersi Mr Chair. Bonzour Minis avek ou delegasyon, tou Manm Onorab, bann dimoun Roche Caiman bonzour.

Minis pou konplimant rekomandasyon ki Onorab Lemiel in met devan ou, an referans avek bann *Home Improvement Loan*.

Petet mon ti ava sizere osi ki letan *HFC* oubyen Lazans ki pou revwar en pti pe sa program. Pou regarde si i kapab ganny en dyalog osi avek nou bann Lotorite Distrik avek bann *MNA* osi.

Akoz parfwa i annan bann konsern ki bann kliyan i met a nou latansyon. E i demann pou regard en pti pe ki laliny ki mannyer nou kapab ed zot akse

avek sa resours e adres zot problemm.

Akoz mon konnen Gouvernman in fer serten reform dan bann lezot fason pou siport bann dimoun aze pou repar zot landrwa.

So petet zot pou pli depandan an term sa finans sa sipor *loan*, pou zot kapab adres zot konsern. Sa i enn.

Dezyenmman Roche Caiman nou pa pou benefisy avek proze lakaz sa lannen. E nou pe siport bann dimoun ankouraz zot, pou zot sezi loportinite petet bann ki annan lespas pou fer zot lakaz kot zot paran.

Alors atraver sa *Housing Finance Scheme*, mon vwar i annan en redwir sa lannen. Petet ki rezon pou sa, ki i pa'n mete kekfwa sa ti ava ed en pe pou ankouraz zot plis pou konsider sa opsyon.

Aprè trwazyenmman si zot kapab donn en leklersisman petet pou bann madanm la dan sa bann moman la, ki nou pe ankouraz zot pou debourye.

Lo sa *Woman Trust Fund* petet donn en pti pe detay pou bann ki petet pa konnen poudir sa fon i egziste. Pou raport zot serten sipor e an menm tan zot osi zot kapab debourye. Mersi.

MR SPEAKER

Mersi Onorab. *PS carry on.*

PS DAMIEN THESEE

Mersi Mr Chair. Lo sa *Housing Finance* parey nou'n eksplike nou'n redwir pou 2021 anvi sityasyon mannyer i ete la i pa neserman ou pe ganny bokou laplikasyon. So nou'n fer sa rediksyon mannyer nou sityasyon ekonomik i ete.

Me solman pandan milye nou ava gete si nou pe ganny plis laplikasyon ki pe antre, oubyen 2022 la nou retourn li lo son alokasyon normal.

Lo sa ki konsern *Woman Trust Fund* sa i en *Board* ki administre sa fon ki plizoumwen promot lantreprenarya dan bann madanm, oubyen lezot proze pou *empower* madanm, swa dan zot lavi sosyal swa dan biznes.

E mon krwar petet parey ou'n dir nou a sizere i bezwen en pti pe plis promosyon avek sa *Scheme* ki nou a pran kont. Mersi.

MR SPEAKER

Wi Minis.

**THE DESIGNATED MINISTER
JEAN-FRANCOIS FERRARI**

Mersi Mr Chair. Mon ti a kontan azoute avek kestyon ki Onorab in leve lo ki mannyer ou akse sa

bann fon e bann formalite, bann prosedir ki en pe difisil. Mon krwar i en bon lide ki en travay i ganny fer pou fasilite sa bann tranzaksyon.

E Gouvernman ti a kontan vwar ki sa travay i ganny fer plis par *DA* ki par bann *MNA*. Konmsi i vin *part of the work of the DA*, konmsi ki li i ganny sa lantrennman. I konpran byen sa bann keksoz ki pe deroule e i kapab *advise* bann kliyan bokou pli byen.

Alors vi ki ou'n lev sa pwen mon krwar ki ti ava bon si ou swiv, pou fer en sorte *sort* ki en rakont travay i ganny fer ant bann *DA* e *HFC*, pou fer sir ki zot annan sa konpetans pou zot kapab asiste zot bann kliyan.

Akoz souvandfwa i en pe en mank konpetans lanmenm ler sa i vin tonm lo responsabilite *MNA*. Me an realite i devret travay *DA*. Mersi.

MR SPEAKER

Wi Onorab.

HON AUDREY VIDOT

Mersi Mr Chair. Petet Minis pa'n konpran mwan. Letan mon ti pe fer rekomandasyon pou konsernan *improvement loan* la, ou konnen bokou fwa letan bann kliyan ek bann konstrent ki zot pe rankontre se ki, i

annan bann *issue* lo kote garanti.

An term petet i annan lezot langazman oubyen lezot opsyon ki zot le sizere. I pa vedir ki nou *as* Manm Parlman nou anvi enpoz lo sa program. Me plito pou met konsern bann dimoun an term en dyalog parey nou ti fer lontan dan sizyenm Lasanble.

Kot nou met bann serten eleman devan Lotorite apre zot, zot vwar ki pli bon fason an term bann enplimantasyon zot bann *Scheme*, ki a ede ki a lafen dizour sa endividi li i ganny sa sipor ki i bezwen. Me an menm tan li osi i pe fer son kontribisyon anver son proze. Mersi.

MR SPEAKER

Minis in note. Mersi. Onorab Adelaide.

HON FRANCOIS ADELAIDE

Mersi Mr Chair. Bonzour Minis avek ou delegasyon. Minis petet *panel* petet pti komanter *in regards to* sa *Laptop Scheme*.

I enportan ki ler nou pe donn Kontra bann dimoun ki fer vini *laptop* ki i bann *laptop* ki ler i ariv en problemm avek nou kapab aranze.

Akoz bokou fwa ou pe trouv bann *laptop* ki pe vini, ki *once* in ganny problemm apre

6mwan, so napa pyes e no vwar sa i vin en defavorasyon pou bann etidyan akoz zot ganny zis en fwa apre fini.

So mon ti a kontan ki zot a vreman verifye sa bann *laptop* fer sir ki i bann mark ki rekomandab.

Mon dezyenm kestyon i lo *Land Compensation Tribunal*. I annan en pe plis ki R2milyon. So eski sa Tribinal in konmanse e kantite larzan petet ki zot in depanse lannen pase? Akoz Bidze i parey.

Apre mon trwazyenm kestyon i lo sa *weight Grant COVID-19*. Petet ozordi i en lokasyon akoz mon'n tann en *statement* detrwa semenn pase, *in regards* ki ler sa program ti inisye sete zot bann zofisye kot Minister Finans, ki ti donn lord pou donn larzan. E sanmenm sa ki nou vwar bokou labi.

E ozordi mon anvi petet zot konman bann responsab kot Minis Finans, pou vreman dir avek sa Lasanble si vreman zot ki ti annan dernyen *say* lo pou donn sa larzan?

Akoz nou'n trouve in annan bokou labi e mwan mon konnen poudir zot vreman konpetan. Mon pa kapab aksepte ki zot in fer sa fot. Eski ti annan presyon lo lapar egzektiv ki'n met lo zot pou fer zot fer sa program koumsa?

Ouswa ti vreman sa 4-5 dimoun ti lo sa *Board* ki ti pran sa desizyon pou donn sa bann larzan parey in ganny donner? Mersi.

MR SPEAKER

Mersi Onorab. Wi PS.

PS DAMIEN THESEE

Mersi Mr Chair. Nou pran not sizesyon lo *Laptop Scheme*. Petet *DICT* ki responsab pou administre sa *Scheme*, i ava petet amelyor en pe bann kriter ki sipoze *apply*. Akoz pou le moman se bann etidyan zot menm ki rod zot *laptop*, apre zot zis *apply* avek *DICT* pou ganny sa *subsidy*. So si i bezwen amelyor nou ava diskite ke li pou fer.

Lo sa ki konsern *Land Compensation Tribunal*, sa i son kou looperasyon pou sa Tribinal avek lofis ek bann *operational cost* ki mon krwar la i baze dan Citimart, Le Chantier pou li kapab zer sa bann *case* ki i pe gannyen.

Pou le moman napa okenn konpansasyon ki'n ganny peye lo bann soumisyon petet okenn dimoun ki'n met devan. Mon ava les SS reponn sa kestyon lo *FA4JR*. Mersi.

MR SPEAKER

Wi SS.

SS PATRICK PAYET

Mersi Mr Chair. Mersi Manm Onorab. Bonzour tou dimoun a lekout e tou Manm Onorab *as well*. Parey zot okouran *FA4JR* letan ti konmanse ti annan en lanons par *ex*-Prezidan, ki ti vini devan ti fer en lanons.

E nou *as* teknisyen sanmenm sa ki nou ti travay opozisyon konman en lankadremman pou met devan. E *at the end of the day* ti annan diskisyon sa lankadremman, sa *framework* avek *the Economic Committee the High Level Economic Committee Meeting* e apre *Cabinet of Ministers*.

So the final Policy decision avan ler ki *the* Komite ki ti pe travay lo *FA4JR* ti annan bann diskisyon ki ti ganny met devan, me selman *Cabinet of Ministers* ti pran son *final* desizyon.

Parey zot konnen ki letan nou ti konmans sa *framework* konmansman Avril 2020 i ti pou tou biznes e sa ti enkli Seselwa avek etranze ki dan biznes.

Me *however* nou, nou ti met detrwa kriter devan par egzanp en kriter ki kekfwa *at that time*, nou pa ti fer li konnen akoz pangar dimoun i manipil lenformasyon letan zot pe soumet, se par egzanp ki

kantite larzan ki zot annan dan zot kont.

E sa mon krwar i en kriter ki bokou biznes pa ti dakor avek. Par egzanp zot ti pe dir ou ki i annan enn zot konpetiter, ki ti'n kalifye me i ti annan lezot konpetiter ki pa ti kalifye.

Par egzanp i annan dan Lendistri Tourizm, ki mon krwar ki ti annan bokou konplent. Me nou, nou ti vwar nou ki par egzanp letan ou ti met sa kriter an plas sirtou lo ki kantite larzan ki ou annan dan ou kont.

Pou nou fer sir ki sa kantite larzan ki'n mete dan Bidze, akoz nou pa ti konnen ki kantite letan *COVID-19* pou kontinyen annan lenpak dan lekonomi Sesel.

Sanmenm sa ki nou ti dir *at least* i kapab ed sa kantite larzan ki ti'n ganny aprouve, pous li parey zot okouran. Premye kou letan nou ti *approve* lamannman dan Bidze lannen pase i ti pou ziska Septanm. E nou ti kapab ganny *savings* pou kapab pous li ziska Desanm baze lo sityasyon lekonomi.

Me ti annan bokou konplent ki letan nou ti pe servi sa kriter *bank account*, ki ou ti vwar ki an Zilyet desizyon ti ganny pran pou sanz sa kriter spesyalman bann biznes ki dan

Lendistri Tourizm, pou fer zot kalifye otomatikman konmansman Zilyet.

Menm si par egzanp i annan biznes ki par egzanp an Avril zot pa ti kalifye. Me selman an Zen zot ti kalifye akoz letan nou ti kalkil 6mwan zot *fixed cost*. Nou ti vwar letan rekalkil li an Zen zot ti pou fer otomatik kalifikasyon.

Me sa kriter ti sorti akoz bokou biznes ti pe konplent ki larzan ki zot ti annan i bann *savings*. E zot pe servi dan bann *lezot cost*.

So sa enn de bann sityasyon ki nou ti vwar nou ladan lannen pase. E kriter ti sanze ankò an Out pou ouver laport pou nenport biznes.

Par egzanp ti annan bann biznes ki pa ti kalifye ditou ziska Zilyet. Me selman nou ti sanz kriter akoz avek diskisyon avek *Cabinet* avek *High Level Economic Committee*, ki nou ti vwar ki i annan biznes endirekteman zot in ganny enpakte avek *COVID*.

Me selman kekfwa par egzanp ti annan sirkonstans konstriksyon. Par egzanp konstriksyon ti pe demontre ki akoz sityasyon labank pa pe donn *loan*. I annan Kontra ki zot in sinyen pou fer *rehabilitation* bann *apartment*

ouswa pou fer nouvo lotel. E sa bann Kontra in ganny *delay*.

So ti annan bann sirkonstans ki ti fer nou apre sanz kriter an Out, ki kriter ti baze lo si ou biznes in ganny enpakte *almost* 60poursan otomatikman ou ti kapab kalifye.

So sa i ti sa gradyel ki manner i ti evolye baze en pe lo konplent ki nou ti pe gannyen avek dimoun. E baze lo diskisyon ki nou gannyen avek *Cabinet of Ministers*. Mersi.

MR SPEAKER

Wi Onorab. Minis i annan keksoz pou azoute avan.

THE DESIGNATED MINISTER JEAN-FRANCOIS FERRARI

Onorab mersi pou ou kestyon. Enn bann keksoz si mon'n tann ou byen se ou'n demande ki kantite presyon, si in annan presyon lo servis piblik lo bann zofisye dan servis piblik.

Mon ti a kontan reponn sa koumsa. Ou konnen bann *public servants* zot rol se pou *advise* Gouvernman lo meyer solisyon, ki zot, zot krwar Gouvernman i devret pran dan bann sirkonstans. Se sa ki *civil service* i fer zot *advise*.

At the end of the day the bucks stops lo Biro *Cabinet* e finalman lo Biro Prezidan

Larepublik. So mon krwar i enportan pou nou montre toultan ki nou konpran sa distenksyon e ki si i annan en blanm pou blanmen i bezwen al lo Gouvernman.

E i bezwen al lo Gouvernman politik si oule bann politisyen aköz se zot *at the end of the day* ki pran sa desizyon final. E en bon Gouvernman i ekout son bann *civil servants* e i balans li kote politik pou gete ki mannyer keksoz i marse.

E i pran desizyon ki normalman i devret dan lentere pei an zeneral. Alors i menm parey nou'n fer dan sa moman sa pandemik, dan sa dernyen detrwa mwan. Pou ouver pei bann keksoz koumsa i difisil. Me i en dyalog konstan ant servis piblik e Gouvernman egzekitif.

E sa i en keksoz ki nou an tou ka dan sa Gouvernman ki mwan mon en Manm, se toultan pou annan respe pou bann *civil servants* e ekout zot.

At the end of the day si nou anv *overruled* zot pou en rezon politik se ki pou bezwen pran desizyon.

E pou le moman i pe mars ase byen e mon – lo la par Gouvernman mon ti a kontan – lo la par egzekitiv mon ti a kontan remersye sa

kolaborasyon ki efikas, ki efektiv. Pa toultan 100poursan marse me selman nou sey rod sa balans e si nou trouv sa balans mon krwar pei i ava mars ase byen. Mersi.

MR SPEAKER

Mersi Minis. Onorab Cosgrow.

HON WALLACE COSGROW

Mersi Mr Chair. Bonzour tou bann Zofisye Gouvernman ki'n fek zwenn nou. Mr Chair *the bucks stops with the Government, the President*. Dan sa laliny mon ti a kontan ganny en pti pe leklersisman lo sa *SEEREP Scheme* ki reste R1milyon.

Pandan ki nou'n diskit Bidze kantite Manm Onorab lo nou kote latab e osi lot kote latab in koz bokou lo fotovoltaiik. E sa i sa *Scheme* kot bokou bann dimoun endividi i pret ladan e zot enstal bann pano soler fotovoltaiik lo zot lakaz, e ki ede redwir en pti pe nou depandans lo *fuel*.

Mon ti ava byen kontan petet Minis si sa ti kapab ogmante e petet dan plas ki nou al fer ekspedisyon lo zil pou R3milyon. Nou met ankor en R1milyon ladan ki i ava ed plis fanmir Seselwa pou zot kapab enstal fotovoltaiik lo zot lakaz. E

aste bann lekipman en pli *energy efficient*.

Dezyenm Minis eski ou kapab nou akoz sa zafer ki mon pe vwar dan Bidze *ADF*. Ler Minis Finans ki ankor malerezman i pa la ozordi avek nou bomaten pou eksplike - ler Minis Finans ti fer son *Budget Speech* ti dir pou *increase ADF Scheme*, *ADF loans* pou R5milyon.

Mon ti demann en kestyon mon ti ganny dir pou annan larzan ki pou ganny mete pou *replenish the fund*. Malerezman mon pa vwar *replenishment of the fund 2021*. I zero.

Petet i annan lot landrwa ki'n ganny mete Minis i a kapab eksplike, akoz sa *ADF Scheme* i enportan pou bann pti fermye anrezistre pou zot kapab ganny kapital pou zot investir dan zot *farming business*.

E sa Gouvernman in toultan dir ki lagrikiltir i enportan e zot bezwen lagrikiltir pou relans lekonomi.

3enm Mr Chair i konsernan *the laptop scheme*. Ankor li osi mon pou retourn lo la. Ankor li osi in desann son alokasyon e in sorti 5milyon 750mil pou vin 3milyon.

Minis dan en letan kot zanfan pe reste dan lakour, *teachers* pe demann *more and more*, zanfan pou zot annan en

laptop pou kapab donn leson lo la, pou kapab *share* bann leson elektronikman. Sityasyon *COVID-19* ki in fer ek nou malerezman nou war Bidze *Laptop Scheme* i desann.

Mwan mon ti ava enplor Minis avek Minister ek nouvo Gouvernman ki *the bucks stops with you*, ki si zot ti kapab fer monte sa *Laptop Scheme* e ki plis zelev ti a kapab benefisyé anba *laptop scheme*. E ti a kapab annan sa enteraksyon vertyel avek *teachers* ek ban etidyan. Mersi bokou.

MR SPEAKER

Mersi. Wi Minis.

THE DESIGNATED MINISTER JEAN-FRANCOIS FERRARI

Mersi Mr Speaker. Mr Speaker premyerman mon krwar fodre pei i abitye avek annan en Prezidan ki dir keksoz mannyer i ete. Mon krwar kekfwá pei pa'n abitye avek sa.

E i pa' abitye tann en Prezidan pe dir laverite. E si en keksoz i kout 3milyon i 3milyon ou pa sey kasyet li. E se sa bann difikilte ki mon santi nou pe annan nou pa abitye tann sa bann keksoz.

Be sa se larealite. Prezidan i pe al lo zil i donn ou en lide konbyen i pe koute, i dir ou ki i pe al fer. E laba i annan

en *solar farm* ki vo plis ki R3milyon ki nou'n ganny pou nanryen, ki ler nou fer en desizyon i toultan dan lentere piblik. E i toultan en lenvestisman pou nou ganny plis a lavenir se koumsa ki in arive.

Alors napa nanryen ki zot devret enkyet *what you see is what you get*. E parey ou dir *the bucks stops at his desk* apartir le 24 Oktob sa ki avan i ti *stop* lo *desk* avan. Ou pa kapab met sa ki lo *desk* avan lo sa enn la.

Alors pa bezwen enkyet Onorab ou pou ganny tou laverite, ryen ki laverite e pou konn tou keksoz ki pase dan sa pei. E kekfwa ou ava ganny libere.

Alors dezyenm keksoz *ADF Fund* i annan R24milyon ki reste zot, ki kot *DBS* sanmenm sa ki nou pa'n met ankor. Donk i annan en bon sonm ki Gouvernman ki in met a dispozisyon, bann fermye, sa i 2. Mon'n perdi enn ou kestyon.

MR SPEAKER

Laptop Scheme.

**THE DESIGNATED MINISTER
JEAN-FRANCOIS FERRARI**

Laptop Scheme. Laptop Scheme parey tou bann *scheme* i en *Scheme* ki dinamik Onorab. Nou met en limit lo la, me

selman ariv dan milye lannen, ler nou pe fer *review*. Nou vin kot zot menm, e Onorab si vremen ou santi, pou dir dapre ou resers ki ou'n fer.

Ou vwar pou dir demann i bokou plis, mon asire ki si ou met sa devan sa Lasanble. Devan Minis Finans ki ou pe rod li ozordi, be ou pou vwar li. I pou vini. Ou met sa devan li, e i ava konsider li, dan en fason favorab.

I pa akoz i annan en kap, ki nou bezwen aret lanmenm. Toultan dan milye lannen i annan en *review*, mon krwar ou'n deza dan Gouvernman. E ou konnen poudir sa bann keksoz i ganny konsidere, dan en fason dinamik. Alors si i annan en bezwen, pou revwar sa sif pou *Laptop Scheme*. Nou ava fer li.

An menm tan nou'n pran en propozisyon, ki sorti mon krwar kot Onorab Lemiel. Non, lo Onorab Adelaide pou re get son kalite, sa bann *Laptop*. E fer sir ki bann zenn i ganny valer pou zot larzan. Donk sa i en *Scheme* i en bon *Scheme*, e ki pe ganny byen *manage*. Mersi.

MR SPEAKER

Wi Onorab?

HON WALLACE COSGROW

Mersi Mr Chair. Mr Chair zis mon pou dir Minis pou dir nou pa per realite. Me realite dan sa Bidze la, i se ki finansman pa ase. E mwan mon bezwen dir. Prezan si zot deside – aköz zot ki *rule* Gouvernman.

Zot deside al rod larzan pou met ladan, mon napa problem ek sa mwan. Me selman i mon devwar pou mwan dir, ki mon santi i pa ase. E si i pa ase mon bezwen demande. So mon *hope* ki Minis i konpran aköz mon bezwen demande. Mersi.

MR SPEAKER

Ale *ok*, mersi nou'n konpran. Bon mon ekspekte mon'n gannyan tou Manm ki ti dan lasal, ki'n lev lanmen. Onorab Gabriel, ou ti'n lev lanmen ou osi? *Ok* eskize, Onorab Gabriel.

HON CONRAD GABRIEL

Mersi Mr Chair. *Welcome* Minis avek ou delegasyon. Mon ava dir bonzour tou dimoun ki a lekout. *Minister*, mon pe get *Youth Entrepreneurship Scheme*. Lannen pase ti annan en sonm R1.9milyon, sa lannen nou vwar son Bidze i vid.

Petet zis donn nou en pe detay ki sipor zot pou anmennen, pou bann zenn *Entrepreneur*. Ki mannyer zot pou kapab ganny keksoz sa

lannen, bann zenn *Entrepreneur*, bann dimoun ki anvi debourye, bann keksoz.

Mon 2enm pwen i tous *Sport Trust Fund*. Ki annan R400mil, zis donn nou en pe leklersisman, en pe gidans, ki sa, ki zot pou ede bann lorganizasyon. Si zis bann dimoun *Sport* ensidswit.

Trwazyenmman i konsern *Seychelles Heritage Scheme*. Tou dernyerman nou'n vwar i annan en pe vandaliz lo bann zafer, moniman bann keksoz leritaz nasyonal. Lannen pase ti annan R500mil, la in *increase* pou R1milyon.

So donn nou en pe plis detay, kwa ki zot anvizaze fer petet si pou protez en pe nou bann sipor, anpes vandaliz en pe keksoz dan sa laliny. Mersi.

MR SPEAKER

Mersi, *Panel* lekel ki pou pran bann kestyon? *PS* wi.

PS DAMIEN THESEE

Mersi Mr Chair, lo sa *Youth Entrepreneurship Scheme* pou 2021 napa okenn larzan. Aköz i annan en lentansyon fer revi. Sa ti en *Grant* ki ganny administre anba *SNYC*.

Ki nou vwar nou pa ti sitan satisfè avek fason ki i ti pe ganny zere. So pou annan en revi, ki pou ganny fer apre nou

ava gete ki mannyer sa i ganny zere. Avek lentansyon ki bann *Scheme* nou bezwen re get li, e petet santraliz li anba Minister Lendistri dan plas sa bann sektek spesifik.

Sa ki konsern *Sport Trust Fund*, parey son non i dir i en *Trust Fund* ki ganny zere par Departman Spor. E i partikilyerman asiste bann Federasyon, oubyen Lasosyasyon ki annan bann proze oubyen bann lasistans pou serten lekkipman, ki kapab ed zot pou serten lannen. Sa i *on top of* sa lasistans ki zot gannyen anba NSC.

Heritage Scheme sa i diferan konpare avek bann *maintenance* e bann *Monuments*. Ki ganny zere par Minister Kiltir, sa enn ki la *Heritage Scheme* i pli zou mwen bann proze prive. Si i annan okenn petet mete lakaz, ki dan fason tradisyannel.

Ki Gouvernman i vwar en nesesite pou protez son larsitektir. So Gouvernman i *provide* en *subsidy*, pou ankouraz sa bann *owners*, kit sa lakaz dan son *form* tradisyannel. Ki nou pa perdi en pe sa bann laspe kiltirel, ki nou annan. Mersi.

MR SPEAKER

Mersi PS. Onorab Henrie.

HON GERVAIS HENRIE

Mersi Mr Chair. Bonn apre midi tou dimoun, Mr Chair fason ki nou'n pa'n pas dan sa lalis, in met mwan dan en pe problemm. Parske mon ti annan en pti komanter lo plis ki, konmsi 3.

Me selman mon ava sey *condense* li, mon pa pou fer li long. Mon ava sey koz dan lord ki zot aparet dan sa lalis. Premyerman kontribisyon pou bann parti politik, akoz i en size ki mon ti koz lo la dan mon larepons lo Bidze.

Mon krwar ki nou dan en lannen kot nou pa merit pe fer gran depans, kot nou tou nou merit pe fer lekonomi kot nou kapab. E ede pou redres lekonomi, pli vit ki posib. So mon krwar i ti pou en bon zes, si bann parti politik, ti sey fer en zefor.

Napa eleksyon sa lannen, pou non selman *rely* 100poursan lo kontribisyon ki vin dan Bidze. Me osi pou sey lev fon ayer. Donk mon ti fer en propozisyon dan Bidze, pour ki nou redwir sa sonm, sorti 6.5 e keksoz nou anmenn li lo 5. So nou tir 1.5 ladan, be nou pa koupe.

Zis pou nou pa *distort the process*, nou ti kapab par egzantp *freeze* 1.5 sa i dan *mid-year review*. *Either* i kapab

ganny servi en lot landrwa, ouswa en keksoz koumsa. So sa i mon premye komanter.

2enm pwen lo kestyon *CARE*. *CARE as in the NGO* ki pe ganny en alokasyon 3.2. Si nou get Bidze 2020, ki nou ti vote an 2019. Nou ava note poudir ti annan 13 *NGO*, ki ti ganny liste dan Bidze, *over and above the National Grant*, ti annan 16 antite. Ki en *NGO* egzakteman parey *CARE*.

Be mon kestyon mon demande, aköz *CARE* li i kontinyen ganny 3.2? I zis en *NGO* parey lezot li, i annan en *building* ki i kapab pey *rent*. Fer en pe larzan, 3.2 i depans lo kwa? Ler mon get son bann program, ki in fer an 2020. Ki'm ganny raporte dan medya i annan zis 5.

So 3.2 ki kalite Lorganizasyon an term travayer ki i annan, aköz *CARE* pe ganny en Bidze plis ki bann antite, ki vremen enportan. Par egzantp *Embossment, PSAB, CAA*.

Ki sa zistifikasyon ki *CARE*, ki zis en *NGO* parey lezot, i kontinyelman ganny sa larzan? E in ganny li dan sa dernyen 4 an, depi 2018 plis ki R12milyon.

So mon annan en problemm avek sa. Lot pwen se *Seychelles Savings Bank New Born Scheme* la Mr Chair. Sa i

en *Scheme* ki ti komanse depi 2006, ti ganny anonse an 2005. Ti komans ganny enplimante 2006.

Premye *batch* dimoun anba sa *Scheme*, ki pou ganny 18an, ki pou kapab pran zot larzan an 2024 zot ganny 18an. Mwan mon kestyon avek sa, se ki legzersis ki nou'n fer pou montre ki fanmir pe kontribye *above* sa R1000 ki Gouvernman in donnen?

Konmsi vremen pou nou war pou dir – aköz lontan zanfan i batize, Paren, Marenn i donn en larzan. Sa ki nou ti merit al met Labank. Prezan ler ou'n mete, ou laprev prezan Gouvernman i a *top* ou *up*. Mwan, mon vwar *this is the personal responsibility, of this Bidze* ki nou merit pe dir ek dimoun.

E nou a note poudir avan sa ti annan *Junior Account Scheme*, kot ti zis R100. E pou li *activate* sa letan, avan 2005 zisteman fodre Paran ti met R100. *Then the Junior Account Scheme* ti ganny *activate*, be la anba sa enn *New Born*. Ou pa bezwen met en sou ou, zis Gouvernman i donn ou R1000.

E pou mwan sa i pa bon mesaz, ki nou pe anvoye avek dimoun. Selon sa *personal responsibility, over and above Commercial Bank* ti dir ki zot

pou donn en *Saving Price Bond* R100 par an. Si zot vwar Paran pe kontribye.

Zanmen mon'n tann okenn rapor lo la. So i posib ki personn pa pe kontribye. E sa R1000 i zis la, i ganny son 2.5 lentere per *annum*.

Ok, SCCI. SCCI Mr Chair, *personal responsibility*. Tou dimoun i dan Biznes pou fer larzan, si ou pa pe kapab ed ou lekor koman en kominote Biznes. Pou *sign up as members of SCCI*, be *this is the wrong message* nou pe anvoye avek pei.

Dan en letan kot nou pe dir tir dimoun lo *Welfare*, leve debourye. Li SCCI i vin rod *Welfare* dan Bidze. Letan bann antite, bann NDAs in vin la pe rod lotonomi finansyel, ki PS dabor pa tro kontan letan zot koz lo la. Li SCCI i pli antre anba lebra Gouvernman, mon oule R1milyon.

Ozordi 230 Manm *it is not enough*. E SSCI i bezwen fer bokou plis, pou li ganny *membership*, e ganny son bann dimoun pou kontribye. Parske dayer, 3800 Biznes ti *sign up* pou FA4GR;- 3800 selman 230 zot ki Manm SCCI.

Be si 3002 ti kontribye R100 par an, ki dayer i vin *less than R100 per month*. Pou lan

fini ganny R3.8milyon, pou SCCI *run* son lekor.

Responsabilite i komans avek zot bann Manm, e aköz ki, SIFSA pa vin rod larzan? APAS pa vin rod larzan? SHTA pa vin rod larzan? FBOA pa vin rod larzan, ouswa *Retailers Association* pa vin rod larzan? Konmsi *the message* ki nou koman en Lasanble serye, nou bezwen anvoy pou zot. Se ki zot bezwen kontribye zot menm.

E lot pwen Mr Chair *National Grant*. *National Grant* mon krwar nou difikilte avek li, en *interview* ki *Manager National Grant Committee* Madanm Hoareau ti donnen an 2019, dan sa *interview* ou ti dir ki; "*project that satisfy requirement, are then approved and tabled before the National Assembly.*"

It is on record. Zanmen mon'n vwar mwan, okenn proze ki'n vin devan nou. E ozordi sa i en konsern pou mwan, pou ki Oditer Zeneral i ganny sans odit sa bann proze. Zis pou nou vwar, aköz i en kestyon *input, output* e letan nou pe koz lo bann endikater performans. I enportan. Aköz mwan, mon anvi vwar sa bann proze dan mon kominote.

Aköz enn son bann target se pou fer bann *positive, social and environment impact*.

Partikilyerman ki lye avek *SDG's*, e mwan mon tre konsernen avek *SDGs* akoz i en *pool*. Dan sa kominote ki mwan mon reprezante koman en manm Lasanble. So sa i nou konsern.

Re roofing mon krwar i bezwen annan en rapor, pou nou vwar dan tou distrik, konbyen i fer, lekel sa bann dimoun. Ki mwan mon a konnen koman *MNA*, pou dir vre nou'n vwar en trwa nef la.

Akoz sir non i annan bann proze, ki nou peye. E dan mon distrik in arive, nou'n peye i pa'n ganny fer selman. So mon konnen pou dir mon annan rezon pou konsernen.

Lot pwen Mr Chair *SNA*, mon'n koz lo la dan mon larepons Bidze. Sa se *National Seychelles News Agency*. Mon pa dakor mwan ki sa proze i kontinyelman, ganny larzan dan Bidze. E mon ti demande ki Gouvernman pa anmenn en *Act*, pou fer li en antite ki endepandan avek son *Board*.

E mon ti dir pou dir konsider propozisyon, *merge* li avek *NISA*, Nasyon. E Nasyon par egzantp an 2019 *after tax* in fer li R1.1 milyon profi.

So i annan lespas ki si *NISA* i vin ek li, pou nou develop li koman en *SOEs*. E donn zot plis divan anba zot lezel.

Dernyen pwen, se *Land Compensation*. *Land Tribunal*, napa en rapor medya lo travay sa – savedir i la li? *Nowhere* ki sa bann zansla pe fer. So mon krwar pou dir zot merit donn nou en lesplikasyon, lo *Land Tribunal* vreman si i pe marse.

That is the kontribisyon mon ti oule fer Mr Chair. E mon zis pa bliye ki mon'n dir, lo zafer kontribisyon parti politik. Mersi.

MR SPEAKER

Wi, *Panel*. Minis.

THE DESIGNATED MINISTER JEAN-FRANCOIS FERRARI

Mr Speaker mon krwar mon avar les *PS* fer bann repons teknik. Lo bann *figures* ki annan, e apre mon ava entervenir lo bann *Policies*. Mersi.

MR SPEAKER

PS.

PS DAMIEN THESEE

Mersi Mr Chair. Lo *CARE* li osi i pa vin devan *Grants Committee*, i annan *CARE*, *Red Cross* apre *CEPS* sa trwa Lorganizasyon ki ti exempt, pou li vin lo la. Dapre *Policy* Gouvernman.

So si pe demann en revi lo la, ki li osi i bezwen vin lo

National Grants Committee. Petet mon krwar se sa lapros pou li ganny pran, ki li osi i defann son Bidze devan *Grants Committee*. Ki fer li enparsyal, dan plas zis ganny sa alokasyon otomatik.

So mon pa konnen si zot ava konmans sa pou 2022, oubyen si zot oule nou fer li pou 2021. Nou a reste gide avek zot. Lo *New Born Saving Scheme* osi, si mon pe konpran byen, nou ava pran li ki zot pe demann en revi lo sa *Scheme*.

Ki nou ava fer li pou lannen 2021, ki nou ava kapab soumet en keksoz devan *Cabinet*. Pou gete si i en *Scheme* ki ankor relevan, oubyen ki mannyer i kapab *improve* li dapre bann *proposal* ki ou'n met devan.

Ki oule vwar en pe kontribisyon, avek bann paran osi. So nou ava pran sa antet. Lo *SCCI* ankor mon konpran ou pwen, e parey mon dir *we share the same view*.

Ki nou, nou pa sipoze pe *fund* okenn Lasosyasyon Biznes, an vi ki zot annan zot bann *members*, ki sipoze kapab soumet zot kontribisyon zot menm.

Selman nou'n selman dakor anvi peryod difikilte, ki nou ladan. Ki an plis nou asiste zot. Akoz ler nou pe get zot

payroll, i ariv R990mil par lannen, sanmenm sa ki nou'n met sa R1milyon. Ki *at least* i kouver son *payroll* pou sa lannen.

E nou pou redwir li pou 2022, pou R800mil ki a donn zot letan. Selman nou konpran ki bann Biznes deor ti kapab fer plis, *towards* kontribisyon zot bann *membership*.

Lot nou annan *Re roofing Scheme*, ankor la nou ava demann *HFC* pou soumet en rapor. Zot bezwen annan enn, nou ava fer soumisyon avek Lasanble pou zot war.

E lo *SMA* mon konnen i annan diskisyon ki pe ganny fer lo 2enm staz *restructuring* dan Gouvernman. So la osi nou ava vey li koman enn bann size, ki pou gete si i ki nou apel en *functional review*.

Kot nou gete si nou vwar li apropiye, pou met li anba *NISA*. Si ou *phase* li *out*, oubyen si i bezwen reste en antite prive. Mersi Mr Chair.

MR SPEAKER

Minis wi.

THE DESIGNATED MINISTER JEAN-FRANCOIS FERRARI

Mersi Mr Speaker. Mr Speaker mon krwar *PS* in ekout mwan byen taler, pa'n tous ditou sa zafer *contribution to political*

parties. Akoz sa i sipoze bann politisyen ki diskrit sa. E pa bann *public servants*.

Onorab sa i en desizyon ki zot ki pou bezwen pran, si zot anvi al dan sa direksyon. Sel keksoz ki mwan, mon ti ava dir, lo la par Gouvernman. Se ki si zot anvi fer en sanzman dan son *amount*, i pou bezwen vin en *freeze* lo Bidze.

E pou nou pa sanz son Bidze total, ou'n koz R1.5milyon ki fer 25poursan. Ou konnen mon mazine poudir nou tou, kekfwa nou santi poudir i vre nou kapab fer en zefor. Nou anvi fer en zefor dan sa lannen, kekfwa, sa i ava depan lo zot.

E Gouvernman i ava mon krwar si ou kit en larzan dan Bidze, *PS Payet* avek *PS Thesee* pou kontan zot. Zot pa pou dir non mersi.

Lo kestyon *CARE* mon osi mon krwar, i enportan ki zot defann zot Bidze. Akoz ou konnen bokou bann Lorganizasyon, kantmenm par ler taler *PS* in donn nou *payroll* *SCCI*. Par ler sa bann *payroll* la i *go out of control* sa.

E finalman apre ou re trouv ou, a en serten moman kot 100poursan, larzan ki ou donnen, i al dan administrasyon. I napa vreman bann *outcomes*, e nou bezwen

toultan pe revwar, eski sa bann larzan ki nou pe mete, i annan en lefe lo sa zanfan ki nou pe esey proteze?

Oubyen i ganny manze, i ganny abzorbe dan administrasyon, dan saler, dan *toner*, dan *A4 paper* dan bann keksoz koumsa, ou vwar?

So sa ki nou pou bezwen deside ozordi, mwan mon krwar sa bann kestyon ki Onorab Henrie in leve. Tousala i enteresan, me pozisyon ki nou bezwen pran, se eski nou aplik zot sa lannen? *Ok*.

E mon pa tro, tro an faver mwan pou al re zve avek bann *figures* la. Me selman i donn nou en direksyon. E antretan i donn Gouvernman, egzekitiv en direksyon. Pou li kapab konsider en lot fason, zer sa bann pwen. E menm parey *New Born Scheme* avek *SCCI*.

Enn bann propozisyon ki mon'n tande, se ki pou *SCCI* pou ankouraz zot ganny *membership*. Sa ki ou gannyen, Gouvernman i met menm kantite ladan.

Par egzanp sa lannen ou'n ganny ou R385mil dan *SCCI* en? Ou ganny ou R385mil *membership*, Gouvernman i *top* li *up* avek R385mil *membership*. Konmsi pou ankouraz ou, pli ou ganny Manm, pli ou kapab

claim en sipor avek Gouvernman.

I menm parey *New Born Scheme* osi mon an faver, ler ou al ouver en kont pou ou zanfan. Otomatikman Gouvernman i met sa R1000 ladan, me si ou pa'n al ouver. Akfer Gouvernman i bezwen al met sa R1000?

Si ou pa enterese pou ganny en pti *saving* pou ou zanfan, akfer nou, nou bezwen enterese avek ou? I en kestyon responsabilite. Donk sa i mon pozisyon lo la, me selman se zot ki pou diskite.

Wi, i annan en konversasyon ki pe ganny fer lo nivo *SNA*. *Seychelles News Agency*, e avek posibilite regard tou sa bann Lazans Lenformasyon dan en sel landrwa, anba en sel *roof*, akoz mannyer mon pe gete, *building SBC* pou pli gro *building* dan Sesel, ler i pou fini.

So i annan lespas pou en kantite keksoz, en kantite aktivite la anndan. E kekfwa se la ki *SNA* i ava trouv son plas. Me *voila* Mr Speaker bann komanter ki mon annan pou fer. Mersi.

MR SPEAKER

Mersi Minis. Nou ava kontinyen. Mon pa konnen ki mannyer zot bann pwen pou re

antre. Si *LGB* ki pou re pran oubyen kwa. Nou avar pas lo Onorab Pillay.

HON SEBASTIEN PILLAY

Mersi Mr Chairman. Bonn apre midi tou dimoun. Mr Chairman premyerman avan mon pran la parol, mon note ki plizyer *line* dan sa bann Bidze. In la depi kantite lannen, si nou pran spesifikman sa kontribisyon, *to political parties* in 2019, 2020.

I enteresan ki sa lannen Onorab Henrie, apre ki son parti in vin o pouvwar, la li i deside pou vin demann pou *freeze* sa sonm en. I enteresan tousala. Nou pe viv dan en sosyete ki pe vin deplizanpli represiv.

Freedom of Expression i konmans ganny anpese, e nou pou rod tou fason pou anpes tou dimoun koze, E met kontrol lo tou dimoun.

Sa i enteresan sa. Sanmenm sa parti ki'n *preach* la demokrasi toultan. Mr Chairman, sa Bidze pou mwan i enn ki vreman enportan, akoz bann *line items* lo sa Bidze ki i annan ladan. Si oule bann laliny sa Bidze i enn ki vreman relevan avek sironstans, ki nou pe pas ladan.

Me selman i *still* enportan ki nou ganny serten klarifikasyon. Mon pou adres

mon premye kestyon pou *National Grants Committee*. Zis pou zot dir nou, *what is the* – ki bann sonm pli o? Bann *range* sonm pou bann proze ki zot gannyen, atraver bann diferan dimoun ki prezant bann aplikasyon avek sa komite?

Mon 2enm kestyon, mon kontan ki Minis Dezinyen in koz lo donn lenformasyon. So an relasyon ek sa, mon ti a kontan demann Minis Dezinyen, eski an relasyon avek *IOT*, lefe ki nou pe ankor enn fwa met sa R400mil.

Eski i an relasyon ek *IOT*, nou pe regard dan provizyon, fer en lamannman dan *Employment Act*, pou fer provizyon Trezyenm Mwan Saler, aplikab pou *IOT*?

Pou le moman *ITZ* i ekskli li, i ekskli tou bann Konpanyen *ITZ*. Eski Gouvernman aktyel pe al dan sa direksyon?

3enm kestyon, enn bann keksoz ki mon ti a kontan klarifye avek *PS*, Minis Finans in dir ek nou koumsa, poudir nou'n fer en *saving* apepre R1.4bilyon lo *FA4GR*, apre nou'n fer en *saving* apepre R47milyon lo *URS*.

Savedir esansyelman Gouvernman i bezwen annan li apepre R1.5 *something billion* ki la *available*. Prezan mon pa

vwar okenn dan Bidze, mon pe gete si i pou vin la. Oubyen i pou al anba bann lezot landrwa. Me sa ti en landrwa ki ti kapab vini.

Si nou ti pou met en provizyon pou Trezyenm Mwan Saler pou sa lannen. Lefe ki nou pa ankor ganny okenn lamannman Lalwa ki dir, ki Gouvernman pa pe pey Trezyenm Mwan Saler pou sa lannen.

Eski sa i pou en keksoz ki Gouvernman pou konsidere pou fer? Lefe ki nou annan sa bann *savings* ki pe ganny fer, e ki sa lannen ek lannen pase son finisyon sirtou? In en lannen ase difisil pou nou pei. Mersi Mr Chairman.

MR SPEAKER

Mersi Onorab, panel lekel ki komanse? *PS*.

PS DAMIEN THESEE

Mersi Mr Chair. An sa ki konsern *savings*, parey nou konnen pou Bidze 2021, i en Bidze R11bilyon, ki ler nou konpar li avek Bidze 2020, ki ti annan en *First Appropriation*, apre en *amended budget*. Apre en *Supplementary*, ti plis ki sa Bidze 2021.

So nou'n redwir li. So ler nou pe koz *savings*, nou pe koz

rediksyon lo bann laliny partikilye.

Me selman an zeneral, si nou get nou bann *budget line*. I plizoumwèn ase konstan. Oubyen ase dan *same level*, ki *still* nou depans ki nou pe fer pou 2021 i ase konsiderab si nou konpar nou, avek nou sityasyon ekonomik.

Kot nou pou fer en *deficit* pou sa lannen, *overall* 15.3poursan ler nou konsider lentere, oubyen 11.8.

So nou'n redwir sa *deficit* ki pou 2020 i pros 20poursan, so sanmenm sa ki nou pe *mean* lo bann *savings*. I bann laliny spesifik, kot nou'n vwar nesosite pou redwir en pe sa bann depans. E *FA4GR* ti enn, 2enm ti *URS* avek *Welfare*.

Bann landrwa kot nou war nou kapab redwir en pe depandans, lo Leta par fer sir dimoun i *become* pli responsab pou zot menm. Ki selman bann dimoun ki bezwen lasistans, oubyen ki vremen merite i neserman ganny asiste.

E pou fer en provizyon la, pou *Thirteenth Month*, dan mon lopinyon i pou en pti pe iresponsab. Si nou konsider nou sityasyon ekonomik, e osi bann sekter prive, bann biznes zot sityasyon zot menm, kot zot ete.

An vi ki nou depan lo *tax payers money*, pou nou konnen ki annan en problem lo *private sector*. Prezan pou nou pey nou lekor en *Thirteenth Month* i pa akseptab. Mersi.

MR SPEAKER

Minis wi.

THE DESIGNATED MINISTER JEAN-FRANCOIS FERRARI

Mr Speaker mon en pti pe enkyet la mwan. Mon ti a kontan ki Onorab *Leader* Lopozisyon i re eklersi avek mwan, krwar ki'n – ki mannyer i ti fraz son kestyon.

Akoz i ti donn lenpresyon poudir i annan en ta larzan, dan en kwen ki nou'n fer *saving* avek. E ki nou kapab servi sa pou nou distribye dan sa - .

Konmsi mon anvi fer kler poudir napa sa ta larzan. So mon ava re donn la parol *Leader* Lopozisyon pou li eksplike, ki i ti pe dir nou.

Akoz pangar piblik i ava krwar poudir i annan – wi, nou'n fek dekouver larzan en landrwa. *Ok*.

MR SPEAKER

Wi Onorab Pillay. Klarifye pou Minis.

HON SEBASTIEN PILLAY

Mersi Mr Chair pou re donn mwan laparol. Non, *Designated Minister* ler nou ti demann Minis pou Finans sa kestyon, lo ki *savings* ou'n fer relman an relasyon ek bann mezir, ki ou'n pran, (pa bliye Mr Chairman i annan mon kestyon, ki pa ankor ganny reponn bann *National Grants Committee*)i ti dir nou koumsa, i ti dir ek Lasanble ki i annan *savings* R1.4milyon. *Ok?*

So nou, nou ti oule zis fer en klarifikasyon. Ki ler en Minis ti fer bann *statement* koumsa, i kree bann lekspektasyon, ki kapab vin avek. Sa *statement* ti devret ganny fer anba lesplikasyon, parey *PS* Finans ti'n fer ozordi. Me non pa en *blanket statement*, ki nou'n *save* sa kantite, nou'n *save* sa kantite.

Akoz lozikman si ou dir ou pe *save* larzan, ou bezwen pe kapab anmas li met en lot landrwa! So se sa ki mon pe dir ou.

Rest assured Designated Minister nou, nou pa oule *act* dan okenn fason iresponsab nou. Nou oule zis fer sir ki Gouvernman, parey ou kontan dir i koup son latwal dapre grander son kannson ki i mete. Ou konpran?

Akoz sa i en *statement* ki ou'n kontan servi. E mon pa ti a kontan ki ler ou'n ariv dan Gouvernman ou'n bliy sa. So mon pe zis met sa devan ou, pou ki nou'n ganny Kalifikasyon.

Be Mr Chairman avek ou permisyon mon ti ava kontan ki mon kestyon lo *National Grants Committee* i osi ganny reponn. Mon pa konnen si *DM* i annan en lot *statement* ki in fer.

MR SPEAKER

Wi nou a demann zot pou adrese, zot pa ankor. Madanm Hoareau pour adrese sa.

GRANTS MANAGER
ROSELINE HOAREAU

Bonn apre midi Onorab. Mersi pour ou kestyon konsernan *National Grant* lannen pase son *maximum* ki nou ti pe donner ti 1milyon. Sa lannen aköz zafer *COVID* nou pe ankouraz bann *NGO* pour tap dan bann *areas*, konmsi ki nou konnen pe vremen afekte, ki annan bann problemn sosyal, bann lenpak sosyal.

Prezan pour nou donn plis loportinite plis lorganizasyon nou'n redwir sa in vin 750mil. Pour le moman *based* lo sa ki nou'n fini travay lo la i annan apepre 2 *NGO* ki'n arive tou sa *maximum* ki'n demande.

Me i pa neserman akoz ou demande ki ou pou gannyen. *National Grants Committee* li, sanmenm nou asize nou fer evalyasyon proze ki Komite i fer e mon asiste zot, nou bezwen fer sir.

Parey taler Mr Henrie in dir i bezwen annan lenpak proze. Nou bezwen gete sa ki ou pe al fer i pe al anmennen sanzman, i pe al enpakte deor. Sa aktivite ki ou pe fer i fer sans. E i pour vreman anmenn en diferans dan lavi sa dimoun.

Sa kominote, sa *area*, sa *target group* dimoun ki ou anvi targete. E sa nou asize nou fer sir, nou pa zis donn 750mil akoz ou'n demande. Akoz i fer sans, i pour vreman anmenn sa diferans e la nou diskrit lo la. Mersi.

MR SPEAKER

Minis, wi.

THE DESIGNATED MINISTER JEAN-FRANCOIS FERRARI

Mersi Mr Speaker. Prezan mon a pran sa 2 pwen ki Onorab *Leader* lopoziyon in koz lo la. Kontribisyon pour parti politik avek *IOT*.

IOT Mr Speaker nou pe fer tou bann refleksyon posibil. I ase konplike *IOT* i en lorganizasyon enportan Sesel i anploy bokou

dimoun, ki kree en kantite aktivite ekonomik dan por.

E nou bezwen toultan pe negosye pour gete ki mannyer nou pou kapab fer sir ki si i posibil ki i tonm anliny avek *Employment Act*, bann kondisyon bann travayer.

Pou le moman diskisyon i kontinyen e se sa nou lobzektif. Se pour fer sir ki napa en Seselwa ki Sesel ki pe travay dan en *zone* i ganny en kalite tretman, me selman si i pe travay an deor sa *zone* i ganny en lot kalite tretman. Donk *this is work in progress* Mr Speaker. Lo kontribisyon pour parti politik.

Mwan mon ti a kontan met devan Lasanble poudir sa i en desizyon ki devret inanim. Akoz i konsern bann parti politik. Si en kote i propoze pour li ganny en rediksyon e lot kote pa dakor. Nou pa pou kapab *proceed*. Akoz i en keksoz ki tou dimoun i bezwen pare pour fer sa zefor.

Si zis en kote ki anvi fer zefor me lot kote i santi pou dir sa moman la for *whatever reason* i pa devret pe fer. I ava pran son responsabilite. I ava dir nou eksetera.

wan Mr Speaker, *sorry* mon pa pe *act* dan ou plas me selman mon anvi zis dir ki dan mon lopinyon pour mwan i

devret en keksoz ki si i ganny konsidere i ganny aksepte par tou dimoun e nou *move on*. Si napa en konsansis lo la i pou vremen difisil.

Akoz ou pou ganny bann komanter. Anfen Leader Lopozisyon li menm li in fer komanter lo *stifling* deba, bann keksoz koumsa ki mon pa krwar i lentansyon sa Gouvernman pour fer sa.

Alors lo sa laliny mwan mon ti a kontan zot reflesir e zot gete ki zot anvi fer. Mersi.

MR SPEAKER

Mersi. Wi *Leader* Lopozisyon.

HON SEBASTIEN PILLAY

Mersi Mr Chairman. Mr Chairman lo dernyen larepons *Designated Minister*. Mon krwar *Designated Minister* i rapel tre byen ki tou diskisyon ki konsern sa bann size in ganny fer toultan avek prezans Komisyon Elektoral e avek bann Parti Politik.

E mon krwar se sa ki i pe koz lo la. Me i annan en pwen ki in souleve ki mon le met devan li pour nou kapab ganny en – si oule en *timeframe* lo sa size.

Nou konnen deza ki nou annan lezot Konpanyen ki trouve dan sa *Zone ITZ*. E nou pa pe konsider zis *IOT*, nou pe konsider bann lezot. So sa ki

mon pe koz lo la i pou osi aplik pour sa bann lezot Konpanyen an relasyon avek sa size 13 mwan oubyen *bonus*.

Me an sa ki konsern *IOT* petet *Designated Minister* si ou kapab dir nou lefe ki *SSI* ki ti nou reprezantan as *shareholder* lo *IOT* nepli la.

Eski ou annan lenformasyon lo lekel ki pe reprezant Gouvernman Sesel an relasyon avek diskisyon bann lentere *shareholder* lepep Seselwa avek *IOT*? Mersi Mr Chairman.

MR SPEAKER

Mersi. *Panel*, Minis.

THE DESIGNATED MINISTER JEAN-FRANCOIS FERRARI

Larepons kourt se ki nou *still* annan Manm lo *board IOT* e Minister Finans i ganny reprezante osi.

HON SEBASTIEN PILLAY

Eski i posib pour nou konnen lekel bann Manm ki lo *Board*?

THE DESIGNATED MINISTER JEAN-FRANCOIS FERRARI

Mon konn 1, 2 koumsa. Me selman mon pa anvi donn ou bann lenformasyon ki pa korek. Me mon ava fer ou ganny sa, apre midi ou ava gannyen. Mersi.

MR SPEAKER

Mersi. Nou'n depas en pe nou ler e mon konnen *Bills Committee* omwen i annan *meeting*. Me selman mon pour demann zot eskize nou a prolouze parske i pa fer sans kot nou'n arive la pour nou arete anvoy sa lo apre midi. So nou a terminen apre nou ava aziste *lunch break accordingly*. Onorab Georges.

HON BERNARD GEORGES

Mersi Mr Chair. Mr Chair avek ou permisyon permet mwan konmans avek sa size "*the buck stop with you Minister*." E i en tre bon sizesyon ki Onorab in dir, *the buck stop with you*.

E mon ti a kontan lo lapar Lasanble demann ou la ki ou annan bann zofisye Finans otour ou, Minis si dan sa lespri *the buck stop with you* ou ti kapab donn avek nou Lasanble. Al rode donn avek nou Lasanble kou ki Gouvernman in peye pou fer en lakaz pour Mr Rene Ile Remire avek en *tennis court*?

E konbyen in koute pour sa msye ler i ti Prezidan al pas son bann vakans laba pandan tou sa bann lannen?

Nou ti ava kontan ganny en lide konnen konbyen tousala in kout pei, pandan sa bann

lannen? Mon krwar i ti enportan.

Mr Chair mon pou bezwen fer mon prezantasyon an 2 vole bomaten. Premye konman en Manm Lasanble. Onorab Churchill Gill in pran mon kestasyon lo *IOT*. Me in demann li dan en fason bokou pli byen ki mwan mon ti ava demann li.

E Onorab Gervais Henrie in pran mon kestasyon li *New Born Scheme*, e osi in fer li avek bokou plis presizyon ki mwan mon ti an kapab. E in pran en bout mon kestasyon lo *CARE*.

Mwan mon ti ava kontan demann avek *panel* si zot ti a kapab lo sa size *CARE* relye li avek *APDAR*. Akoz pour mwan dan sa lespri reorganizasyon ki sa Ladministrasyon pe promouvwar mon vwar en *overlap* ant *CARE*, ant misyon *CARE* ek misyon *APDAR*.

Pa sa misyon *APDAR* ozordi ki lo nivo Lasante i pe retourn anba Minister Lasante. Me lo son lanpler an antye kot i sipoze pe regard problemn drog e problemn lalkol. E mon vwar la en serten *overlap*.

E mon ti a kontan demann avek *panel* si zot ti a kapab dan sa lespri renouvelman, dan sa lespri re organizasyon ki sa ladministrasyon pe fer, regarde pour lannen prosen ki mannyer

i kapab annan en sinerzi ant sa de lorganizasyon.

Ki zot pa pe travay an konpetisyon avek kanmarad. Me zot kapab pe travay ansanm e donk redwir en pe depans ki Gouvernman i bezwen peye pour 2 lorganizasyon fer plizoumwèn menm keksoz. Mon vin prezan Mr Chair avek ou permisyon lo 3 size ki'n souleve la bomaten.

MR SPEAKER

Eskiz mwan kekfwa ti a pli bon si *panel* i reponn ou kestyon koman *MNA* apre ou a kapab rezim ou bann pwen soz lo la. Wi lekel ki pou pran sa pwen lo *CARE*?

THE DESIGNATED MINISTER JEAN-FRANCOIS FERRARI

Ok Onorab mon ti a zis kontan atir ou latansyon ki diferans ant *APDAR* avek *CARE* se ki *APDAR* i en antite Gouvernman tandis ki *CARE* i en *NGO*.

Donk nou napa – anfen kekfwa en dimoun i ava dir en *NGO*, *NGONGO* or *whatever* akoz i ganny finansman sorti kot Gouvernman. Me selman son antite legal se en *NGO*.

E i pou bokou pli konplike pour nou sey entegre li avek en lot servis ki egziste dan Gouvernman.

Me selman mon krwar ki isi lo panel e mwan konman reprezantan Egzekitiv isi, mon pe pran sa mesaz *comme quoi* zot ti ava kontan vwar en refleksyon lo ki mannyer *CARE* i travay, e si i annan en lot metod finansman ki nou devret pe konsidere. Ok so mersi pour sa.

MR SPEAKER

Mersi. Onorab Georges.

HON BERNARD GEORGES

Mersi Mr Chair. Minis prezizeman sa, se lo metod finansman ki mon pe *focus* lo la natirelman zot legalite zot antite sa i en lot keksoz.

Mr Chair 3 keksoz in *arise* atraver bann konversasyon bomaten. Enn se sa kestyon sibvansyon parti politik.

E la mon krwar pwen ki'n ganny fer lo lekel nou devret reflexir se ki, an solidarite avek sityasyon ekonomik ki pe afekte bokou nou bann dimoun, e ki zot lo lot kote latab zot koz lo la kontinyelman, mon krwar ki nou devret annan en refleksyon en pe pli aprofondi lo sa sibvansyon pour parti politik.

Nou pa pe fer sa akoz nou, nou dan en pli bon sityasyon ki zot oubyen zot, zot dan en pli bon -. Annefe zot, zot dan en bokou pli bon sityasyon ki nou

akoz zot, zot annan biznes eksetera. E nou, nou napa.

Me mon krwar ki anvi sa sityasyon kot nou ete ladan nou devret ozordi pe fer en premye pa, e nou konpran sa ki Minis in dir nou, Minis Dezinyen. E sa annou sey fer li ansanm olye enn kont lot.

E pour sa rezon mwan mon ti a – oubyen dan sa loptik mwan mon ti a kontan sizere, prenant kont tou sa ki'n ganny dir bomaten, ki nou vot Bidze sibvansyon pour parti politik me pa dan son sonm ki la devan nou ozordi. Ki nou vot 5milyon e ki nou *retain* 1.5milyon.

Akoz son Bidze i 6.5milyon. Ki nou *retain* sa *en attendant* ki i annan sa dyalog ant sa 2 kote latab pour regarde si nou pou dakor limit li lo 5 oubyen si nou pou retourn lo Bidze parey in ganny *allouer*.

Alor mwan mon ti ava propoze ki ler nou ariv pour vot lo sa *head* ki nou pe vot lo la nou retenir 1.5milyon lo sibvansyon pour parti politik. E nou ava regard sa apre ki nou'n ganny en diskisyon lo 2 kote latab ansanm avek Minister Finans.

2enm keksoz e sa se en lapel ki'n ganny fer pour bann antite ki annan en sibvansyon avek Gouvernman pour *raise* zot fon, olye depan lo

Gouvernman toultan pour donn sibvansyon. Nou'n *focus* lo *SCCI* me nou ti a kapab osi koz lo *Red Cross*, nou ti ava osi koz lo *CARE* li menm ki nou fek koz lo la ozordi.

E *although* ki nou pa pour demann annan okenn rediksyon oubyen okenn *freezing* bomaten, mesaz ki mwan mon ti a kontan pase se a tou sa bann *l'antite* se *take this* koman zot dernyen lannen kot zot pour ganny *free money*.

Lannen prosenn sa ki nou ti a kontan vwar se mwens alokasyon sorti kot Gouvernman e plis *fund raising* lo zot par. Zot devret pe kapab deboury lo zot prop lekor dan sa nouvo loptik Gouvernman ki nou ladan ozordi.

E trwazyenmman mon'n fini koz lo la, e sa se reorganizasyon. Gouvernman sa Ladministrasyon ki la ozordi in met gran lanfaz. Lo pa pou annan *duplication* lo re organiz bann *l'antite* Gouvernman, oubyen bann *l'antite* ki ganny larzan avek Gouvernman. Pour ki napa diplikasyon, pour napa *wastage*.

E dan sa ka spesifik mon ti ava kontan aksepte sa propozisyon ki'n ganny fer e ki pour *CARE* par egzanp nou regard li ankor. Nou regard son sibvansyon atraver *National*

Grants Committee, e ki nou pa pran en desizyon la ozordi tel parey in ganny sizere.

Alor Mr Chair vwala sa ki mwan mon ti anvi met devan Minis avek *panel* ozordi, e si zot krwar ki sa i en bon linisyativ nou ti ava *proceed* avek en vot. Me en re tansyon selman 1.5milyon lo sa Bidze an antye. Mersi.

MR SPEAKER

Panel i annan okenn entervansyon lo zot par?

**THE DESIGNATED MINISTER
JEAN-FRANCOIS FERRARI**

Onorab mwan mon dakor avek ou 2enm ek ou 3enm propozisyon. *PS* i anvi eksplik en pti keksoz. Mon krwar nou pour kapab *move* pou pran en vot, si nou rezourd sa dilenm otour *reduce the amount* to 5milyon e tenir 1.5milyon *as frozen* parey nou dir. Si nou kapab rezourd sa e avek en pti leklersisman avek *PS* lo *CARE*, mon krwar nou pou kapab pran en vot byento. Mersi.

MR SPEAKER

PS wi

PS DAMIEN THESEE

Mersi Mr Chair. Lo *Grants already* bann *NGOs* ki vin *apply* i bezwen montre nou ki i annan

10poursan zot prop *funding* ki zot in gannyen avan ki zot ganny lasistans.

Me selman nou ganny bokou difikilte bokou fwa aköz mon krwar bann *NGOs* enn ler i *feel* en pe *entitled*, konmsi ki zot sipoze ganny sa larzan. So i byen mon krwar mesaz ki nou pe met devan ozordi ki pa sipoze annan sa *sort of reliance* lo Gouvernman.

Gouvernman li donn ou en kontribisyon pou ed ou ek ou Manda. E osi dezyenmman kwa ki enportan, sa keksoz ki ou pe fer i sipoze montre en valer. Aköz bokou fwa nou pa pe vwar sa.

E sa rapor ki nou pou pibliye tre byento pou demontre defayans ki nou'n gannyen. E petet zis en klarifikasyon lo *CARE*. Eski nou pe dir petet si nou dan plas *allocate* sa larzan otomatikman, nou bouz li dan sa alokasyon pour *National Grants*. Ki nou fer li vin devan *National Grants Committee* i ava fer son laplikasyon osi. Mersi.

MR SPEAKER

Tre byen nou'n ariv la me eklersi mwan *LGB* ki mannyer nou *proceed* avek sa *freeze* si ou fer li. Eski ou pran en Mosyon lo la oubyen zis *PS* i koriz son sif?

HON BERNARD GEORGES

Unless ki *Leader* Lopozisyon i annan okenn lo propozisyon. Mon propozisyon se ki nou *freeze* 1.5 lo son Bidze total e ki nou vot *the balance* e sa 1.5 i *frozen*. I pan ganny tire me in *frozen pending* en plis konsiltasyon ant le 2 kote latab avek Komisyoner Eleksyon avek Minis Finans. Mersi.

MR SPEAKER

Onorab Pillay ou adrese sa pwen?

HON SEBASTIEN PILLAY

Mersi Mr Chairman. Mr Chairman be mwan mon pa ganny en konpran akoz ki nou pour vot pou fer en – premyerman mon le koz lo sa size vot pour en *freeze*. Mwan mon pou dir ou poudir napa nanryen dan *Standing Orders* ouswa dan Konstitisyon, ki koz lo *freezing* en Bidze. Sel keksoz ki koz lo en Bidze se ou fer lamannman pour en Bidze.

E lamannman i bezwen vini serten kantite zour davans e i ganny prezante devan Lasanble e nou vot lo la. Nou, nou pa kapab Lasanble anmenn en lamannman ki fer monte en Bidze.

Me Lasanble i kapab zis redwir en Bidze. So si nou le fer

lamannman i bezwen ganny fer konvenableman parey prosedir i demande.

Dezyenmman en keksoz ki enportan. Propozisyon ki pe ganny fer se ki nou vote apre pour nou diskite. Mwan mon pa war sa fer sans akoz si ti annan plan pour diskite sa ti ava ganny diskite.

Sa ki mwan santi se ki malgre mwan mon reprezant mon parti dan Lasanble, mon parti osi i annan en *say* devan *Electoral Commission* an relasyon ek sa bann size ler i ganny diskite.

E se laba kot sa diskisyon i bezwen ganny fer an relasyon avek Bidze ou sipor pour *political parties*. Mon pa krwar i annan okenn dimoun ki pour kont si nou pran en mezir zeneral tou dimoun i tonm dakor lo la.

Be sa i en diskisyon ki bezwen ganny fer ant bann *Leaders* sa bann Parti Politik enkli ou menm Mr Speaker ki *Leader LDS*.

So mon pa krwar i konvenab lefe ki ou ankor *Leader LDS* ki ou pe *preside over* en vot ki pour fer desann montan *subscription* pour bann *political parties*.

Gouvernman i annan tou dwa *call* in bann parti politik apre fer son bann desizyon. Be

i ava fer son desizyon apre ki nou'n pas sa Bidze ki mon krwar nou devret pas li parey i ete, sa i lesansyel. Mersi Mr Chairman.

MR SPEAKER

Pa trakase mon pa pou pronons mon lekor lo la. Wi Minis.

**THE DESIGNATED MINISTER
JEAN-FRANCOIS FERRARI**

Ok annou pa perdi plis letan lo la. En kote i anvi *freeze* 1.5 milyon lot kote pa anvi. Ok la i pa en kestyon *Leader* Parti oubyen *what*. I kestyon zot bann Manm Lasanble Nasyonal zot, zot ki pe vot Bidze se pa zot *party leader* ki pe vot Bidze.

HON SEBASTIEN PILLAY

Non be les mwan-

**THE DESIGNATED MINISTER
JEAN-FRANCOIS FERRARI**

Onorab mon pa'n enteronp ou silvouple. Les mwan koze.

(Interruption)

MR SPEAKER

Bann lezot Manm osi i annan en kantite tapaz dan lasal. Nou annan *Leader* Lopozisyon ki le koze, Minis ti pe koze. Nou annan *LGB* ki pe koze. Annou respekte lord silvouple! Minis

fini silvouple terminen apre nou a ekout *Leader* Lopozisyon.

**THE DESIGNATED MINISTER
JEAN-FRANCOIS FERRARI**

Mr Speaker mwan sa bann kalite malelve mon pa antre ladan, mon napa nanryen ankor pour mwan dir. Nou'n fer nou pwen!

Mwan mon pe sey ganny en balans dan sa deba. En kote i anvi lot kote pa anvi nou pa pran en desizyon se tou! Nou vot li parey i ete akoz si nou al tay isi, tay laba. Rod leskiz *party leader* lot, lot, lot nou pa pou zanmen fini. So annou agree. Sa kote i anvi fer en *freeze*, sa kote pa anvi alors nou pa fer. Se tou! Mersi.

MR SPEAKER

Leader Lopozisyon mon vwar drol ou'n obzekte avek sa kalite propozisyon ki mon krwar ti en bon soz. Mersi.

HON SEBASTIEN PILLAY

I pa sa ki mon'n obzekte. Mon'n obzekte ki mon'n abitye annan sa bann enteraksyon avek Minis – so i pa sa ki mon'n obzekte.

MR SPEAKER

Wi be annou gard en pe lord, mersi. *LGB* ou a fer ou lot pwen.

HON BERNARD GEORGES

Wi Mr Chair mon pou anvoy boul dan ou kare. Mon vwar ki lo nou kote latab i annan en dezir pour *freeze* 1.5. Nou'n ofer avek lot kote latab en peryod letan, zot in rezet sa. Zot in dir nou non zot pa pare.

Alor dan sa ka *Leader* Lopoziyon in mansyonnen ki nou annan en opsyon, e nou opsyon se swa nou amande, swa nou pa amande.

Alor nou napa okenn lot opsyon ki demann ou permisyon anba *Order 72* pour anmenn en *simple amendment* avek sa Bidze pour koup 1.5milyon.

Napa *freeze*, zot pa enterese *freeze* nou a koupe net nou a tir 1.5milyon e nou a *reduce the vote from 6.5million to 5million*.

Sel keksoz ki ava anpes sa arive anvi ki ou pronons ou lekor Mr Speaker, se si *Leader* Lopoziyon i pran mon premye propozisyon e dir annou kit 6.5 nou ava zis *freeze* 1.5 ziska, nou regard li en pe pli tar, *mid-year review or whatever*.

Sa mon pe propoze. Si pa dakor mon ava *move* mon *amendment* ki nou koup 1.5 konpletman. Mersi.

MR SPEAKER

Be permet mwan demann en kestyon. Si ou koupe la eski i annan keksoz ki ferm tou laport pour anmenn sa dan *mid-year review*.

HON BERNARD GEORGES

Non. Si nou koupe Mr Speaker sel fason i kapab retournen se en *Supplementary Appropriation* en pe pli tar. Si nou *freeze* nou ava regard li en pe pli tar.

Mon pa anvi koupe akouz se pa sa nou lentansyon. Nou lentansyon se pour annan en pe letan pour en dyalog.

Alor mon pe ofer *Leader* Lopoziyon en dernyen sans. Si i pran, si i pa pran. Si i pa pran nou mon ava *move* anba *Order 72*. Mersi.

MR SPEAKER

Ok lo mon kote mon vremen ezite pou antre dan en kote oubyen lot dan sa deba. E parey *Leader* Lopoziyon i dir. Parey Minis in fer resorti plizyer fwa, sa i en size ki devan Lasanble e si zot, zot deside fer li mwan mon la zis pour rikord e not sa.

Leader Lopoziyon mon a les ou reponn lo propozisyon Onorab Georges dan lesans ki i annan 2 swa. *Freeze* oubyen amande silvouple.

HON SEBASTIEN PILLAY

Mr Chairman mazorite i lo lot kote latab *whatever* ki zot pou anvi fer zot pou fer. Minis, i paret mwan poudir Minis in donn son pozisyon, son lopinyon lo la. Onorab Georges in al an kontrer avek lopinyon Minis.

Premye fwa mon vwar sa, so i desizyon Lasanble. So si zot le fer sa zot fer li dan sa fason. Be selman parey mon mentenir Mr Chairman i annan en fason fer keksoz. Swa nou fer li byen, swa nou fer li en lot fason.

Sa ki mon pe propoze se ki si nou le annan diskisyon ou vot sa parey i ete, ou annan ou diskisyon. Zisteman parey Minis in dir. Be si oule kontinyen pou pouse aköz ou le prouv en pwen, *that's up to* zot Mr Chairman. Vwala, mersi.

MR SPEAKER

Onorab Georges i kler ki *Leader* Lopozisyon pa'n aksepte propozisyon pour *freeze*. Alor si oule propoz *Amendment*, propoze.

HON BERNARD GEORGES

Wi Mr Chair Onorab *Leader* Lopozisyon in sanz son pozisyon e in dir ki i dakor avek Minis ki keksoz i devan nou Lasanble. Alor mon propozisyon

se ki nou vot sa Bidze mannyer i ete. 6.5milyon me, me, anba kondisyon ki 1.5milyon ladan pa pou ganny debourse.

In another words i pou ganny *freeze*. Nou vot li e se egzakteman sa ki mon ti anvi fer. Nou pa bezwen amande, nou vot Bidze mannyer i ete me anba kondisyon ki Minister Finans i *hold back* 1.5milyon ziska pli tar dan sa lannen ler nou ava otoriz li pou *disburse* sa sonm.

MR SPEAKER

Eski nou bezwen pran en vot lo la?

HON BERNARD GEORGES

Non.

MR SPEAKER

Non, nou'n aksepte li. Byen.

HON SEBASTIEN PILLAY

Zis en dernyen pwen lo la. Zis en dernyen pwen.

MR SPEAKER

Dernyen pwen silvouple aköz nou pare pour vote.

HON SEBASTIEN PILLAY

Mon annan gran respe pour Onorab Georges, i en koleg long dat. Me mon vwar li pe fer *va et vient* lo sa size. Mwan mon'n

eksprim mon pozisyon. So mon pa konnen ki keस्थ्यon Speaker pour met devan Lasanble vizavi sa Bidze.

Akoz personnelman nou tou lede nou konnen ki savedir en *freeze*. I pa dan *Standing Orders*. Me mon'n pran sa ki Minis in dir e sa ki nenport politisyen pou dir dan sa konteks, sa i en desizyon ki bezwen ganny pran ek tou parti *prenant*.

Tou parti politik enkli bann ki ozordi pa reprezante dan Lasanble, zot osi zot pou annan dwa pour zot koz lo la. So mon krwar zot ki ava deside ki mannyer zot oule lespas Politik Sesel i evolye *from now on*. Mersi Mr Chairman.

MR SPEAKER

Mersi avek sa nou a vot lo Bidze ki devan nou avek propozisyon *Leader Government Business* ki 1.5milyon i ganny *freeze* dan sa Bidze.

Bidze pour *Social Programme of Central Government* dan Seksyon 2 lo Paz 35 ek 36 pour en total R485milyon 868mil. Manm ki an faver lev lanmen silvouple? Byen. Manm ki kont? Mersi.

Alor Bidze lo *Social programme of Central Government* dan Seksyon 2 Paz

35 ziskan 36 pour en total R485milyon 868mil avek *freeze* 1.5milyon in ganny 22 vot pour 0 vot kont e 10 abstansyon. Alor Bidze in aprouve par Lasanble. Wi Onorab ki arive?

HON EGBERT AGLAE

Vot kont pa bon i annan en abstansyon lo kote *LDS*, Onorab Andre pa'n vote.

MR SPEAKER

Ok Madanm Clerk nou a verifbye sa vot. Manm ki an faver lev lanmen silvouple? Mersi.

Manm ki kont? Mersi.

Madanm Clerk. Sa enn pa bon pou a pran sa enn. Lo Bidze pour *Social Programme of Central Government* 21 Manm in vot pour, 0 kont e 11 abstansyon.

Alor sa Bidze in aprouve par Lasanble. Madanm Clerk. Bon mon a remersye bann zofisyé Minister Finans ki'n la avek nou aköz i annan ki pa pou avek nou apre midi.

E nou pou rebran bann antite anba Minister Finans ankor apre midi avek en lot group. Alor nou a pran en poz la e nou a rebran travay 2 er edmi. Mersi.

(BREAK)

SUBVENTION TO PUBLIC ENTERPRISES**MR SPEAKER**

Bonn apre midi tou dimoun. Nou kontinyen nou *sitting* apre midi. Nou annan Mr Georges Tirant *Chief Executive Officer PEMC* ki'n zwenn nou pou akonpany Minis Ferrari *Designated Minister* e Mr Damien Thesée e osi Ms Irene Croise. Bidze ki nou pe pran se pou *Subvention to Public Enterprises*. Ki dan Seksyon 2 Paz 36 pou en total 220milyon R788mil. Minis ou pa bezwen okenn lentrodiksyon?

THE DESIGNATED MINISTER JEAN-FRANCOIS FERRARI

Non Mr Speaker.

MR SPEAKER

Nou a kontinyen lo remark bomaten *ok*. Tre byen. E nou a komans avek entervansyon bann Manm. Wi Onorab Sylvanne Lemiel ou ava konmanse touzour. Atann mwan les mon a not bann soz avan sansan mon riske fer fot. Byen Onorab Lemiel.

HON SYLVANNE LEMIEL

Mersi Mr Chair. Bonn apre midi Minis ek ou delegasyon. Mon vwar anba sa *head* nou vwar *Guy Morel Institute* ki lannen

pase i ti ganny R5.7milyon e sa lannen in ogmante pou vin R7.6milyon. Petet mon ti a kontan konnen akoz sa logmantasyon?

Antan ki wi nou siport *Guy Morel Institute* ki pe donn *training* tou nou bann travayer pou kapab ekip zot donn en bon *service delivery*. E an menm tan mon panse mon ti'n ganny en konpran ki zot ti sipoze otononm.

Antan ki zot zener larzan letan ki zot donn sa bann *training*. So mon ti a kontan konnen akoz sa logmantasyon pou sa lannen?

Apre mon vwar *National Parks Authority* osi zot in ganny zot en logmantasyon sorti 11.3milyon pou vin 14.7milyon. Petet li osi nou ti a kontan konnen akoz sa logmantasyon? Mersi.

MR SPEAKER

Mersi. *PS* Thesée.

PS DAMIEN THESEE

Mersi Mr Chair. Annefe pou tou sa bann Bidze ki nou pe donner la se pou asiste sa bann lantrepriz piblik avek lasistans saler, an vi difikilte zot pe gannyen avek sityasyon *COVID-19*.

So pou *Guy Morel* avek *National Parks Authority*

logmantasyon i annan pou fer provizyon lasistans pou 12mwan konpare avek 2020 ki nou ti donn zot lasistans pou 9mwan. Nou ti konmans asiste zot depi Avril. Mersi.

MR SPEAKER

Mersi. Onorab Aglae.

HON EGBERT AGLAE

Mersi Mr Chair. Bonn apre midi – delegasyon. Mon kestyon i konsernan Postal Services. An vi ki dan le pase i ti annan lentansyon pou sa servis premyerman annan son lotonomi, kot i kapab zer en pe son finans, anmas en pe larzan.

Baze lo – mon konnen COVID in enpakte lo sa servis li menm. Petet dan laliny Gouvernman ki mannyer zot pe mazine pou – mon krwar i enportan pou *re engineer* en pe sa servis. Anmenn li lo en lot nivo. Kot i kapab osi anmas en pe plis reveni?

Premyerman nou annan sa bann *issue online*. *Online trading*, bann platform ki egziste. E bokou keksoz i pas atraver zot servis laba. Etandonnen ki i annan bann lezot *courier* osi parey *DHL*, lezot ki osi zot dan sa servis.

Petet ki zot pe mazin fer petet pou fer li vin en pti pe pli rantab? Eski nou pou kit li

konman en servis? Ouswa nou pou bezwen anmenn serten lamannman pou kapab donn li en pe plis lanpler *engineer* pou li vin en pti pe pli profitab? Mersi.

MR SPEAKER

Mersi Onorab. SS Payet. *Sorry* mon'n retourn lo bomaten. Mr Tirant.

CEO PEMC GEORGES TIRANT

Mersi Mr Chairman. Mersi Onorab. Mon krwar ou kestyon i tre valab. I enportan pou konnen *Seychelles Postal Services* i annan en pti bout ki manke ki avek son *legal name*. *I Company Limited*. Saverdir i en Konpannyen anrezistre – *incorporate* anba *Companies Ordinance 1972*.

I annan en *Board* e la son *Board* in ganny revwar. E nou'n deza lannen pase- 2an pase fer rapor lo li pou son *Board* avan pou *emphasize* lo sa kote komersyal ki lezot laliny ou kapab ganny reveni.

E nou *reiterate* la ki nou pe zwenn bann nouvo *Board*, akoz i zot rol pou pous sa *management* pou kapab fer bann lezot aktivite. Ki kapab anmenn reveni ki kapab fer li vin *less dependent* lo Bidze.

I vre lannen pase ek sa lannen i pa en *good year*. Me selman i annan *prospect* pou li devlope. E sa ki nou pou pouse pou li kapab al pli devan. Mersi.

MR SPEAKER

Byen. Onorab William.

HON WAVEN WILLIAM

Mersi Mr Chairman. Mr Chairman mon ti a kontan demann avek Minis Dezinyen lo kot i konsern *Air Seychelles* nou konpran ki dan Bidze i annan en sibvansyon pou 9mwan saler si mon pa tronpe.

Me – lo ki nou'n konmans diskrit Bidze Manm Lasanble nou'n ganny plizyer bann mesaz konmkwa ki menm si Gouvernman in met dan Bidze sa 9mwan saler pou bann travayer *Air Seychelles*.

Me nou'n vwar poudir i annan en bann prosesis bann mezir ki'n konmans ganny fer enterman ki fer ki i met nou en pti pe dan dout, vreman.

Par egzanp si ou'n konmans koup sa enn e an menm tan mon kapab dir fors sa bann dimoun pran depar volonter aköz ou'n tant pou zwe avek zot Kontra.

E mwan mon anvi demande par lefe ki sa i koumsa eski Gouvernman i ekspekte fer en *savings*? Aköz parey mon'n

dir se ki o konmansman ti'n agree ki 9mwan saler pou ganny donnen pou tou travayer. Me – par milye la Bidze pa ankor fini pase me nou'n vwar en seri devlopman ki'n pase kot *Air Seychelles*.

E an menm tan par egzanp i annan bann desizyon ti'n ganny pran ki serten mezir ti sipoze tanporer. Me la ou a krwar ki sa bann mezir vizavi saler, *package* i pou vin permanan.

Si mon kapab ganny en pti pe leksplikasyon ki pou arive aköz parey mon'n dir se ki nou'n ganny 9mwan saler in ganny mete. E an menm tan nou vwar en pti pe sa bann mezir. Konmsi konman en parlman ki desizyon ki nou, nou pou pran vizavi sa vot ki pe ganny donnen?

Eski larzan ki zot pou bezwen prezan i pou mwens baze lo sa ki nou pe donn zot.

E dezyenman mon ti a kontan pronons mon lekor lo sa size *SPTC*. I annan sa alokasyon mon trouve la pou 50milyon.

Me Minis Dezinyen mon ti a kontan port a ou latansyon poudir (1), nou annan en sityasyon la kot oparavan bann operater *Omnibus* ti pe ganny lasistans pou kapab mon kapab

dir deservi serten bann lekòl segonder.

Me la sa in ganny redwir. E baze lo la kantite zot ki annan e par lefe ki menm si pei frontyer in ouver la zot annan bann difikilte.

So ki mon pe demande si pa kapab konsidere ki par lefe nou pe donn 50milyon eski Gouvernman pa kapab revwar ankor en pti pe ki fason i kapab asiste zot?

Akoz la deza la zot pe fer fas avek en problem kot zot pa pe kapab antre *Airport*. Pou zot kapab pran serten kliyan. So zot pe vwar zot dan en difikilte vremen enorm. Pou zot kapab enn;- re pey zot *loan*, pey zot lasirans, zot patant. An menm tan soutenir zot fanmir. Mersi bokou.

MR SPEAKER

Mersi. Lekel ki a pran? Minis wi.

THE DESIGNATED MINISTER JEAN-FRANCOIS FERRARI

Mersi Mr Speaker. Mersi Onorab. Onorab *Air Seychelles* ler mon'n dir pli boner bomaten dan mon lentrodiksyon i en kantite travay ki pe ganny fer pou nou pa rann sa lantrepriz soutenab finansyerman akòz sa i pou le moman i pa en lobzektif ki realizab.

Me ki mannyer pou sipòrt li an *attendant* ki nou pe fer bann negosyasyon pou nou sanz sa lankadremen Konpanyen, sa lankadremen *Administrative*. Ki i ladan pou le moman notaman son relasyon avek *Etihad* eksetera.

Baze lo payroll Oktob Air Seychelles an Oktob nou'n fer sa provizyon pou 133milyon pou asir saler tou travayer ki ti lo *payroll* an Oktob pou 9 mwan.

Antretan nou'n osi demann *Air Seychelles, Cabinet* in demann *Air Seychelles* pou gete ki mannyer i kapab fer bann zefor dan lezot sekter apard saler. Pou gete ki mannyer kapab tir en pe presyon ankor lo lakonpanyen.

Enn bann zefor sete pou demann bann travayer pou *multitask*. Sa Onorab i en sityasyon tanporer ki pa sipoze vin permanan.

Akoz si i tanporer se ki nou ekspekte dan lavenir e tre byento tou travayer i a kapab retourn dan son domenn ki li i ti ladan orizinalman. Avek son kad, son bann lekspektasyon ki li i ti annan ler in zwenn sa lakonpanyen.

Antretan nou'n osi – e sa i en linisyativ sorti kot *Air Seychelles* li menm, akoz zot in realize ki sityasyon ekonomik e finansyel i difisil. Sorti kot *Air Seychelles* zot in propoz en plan. En plan depar volonter. E mon anvi met byen lanfaz lo volonter.

Air Seychelles dan son premye kalkil i ti a'n kontan vwar mon krwar 111 dimoun *apply* pou Depar Volonter. Pou le moman mon krwar i annan 81 si mon pa tronpe selman *I stand to be corrected*. 81 dimoun ki'n *apply* pou depar volonter.

Donk napa personn ki pe ganny pouse. Me selman mon konpran ou pwen ki ou pe fer ki si mon kondisyon travay pe sanze e i pe vin en pe pli difisil kekfwa sa i fer li pli fasil pou mwan opte pou mwan ale. Si mon ganny en lot lof lanplwa dan en lot sekter.

Me sa i inevitab. I inevitab e nou byen apresye ki deza sa 81 in al regard zot lavenir en pe pli lwen. Tou bann benefis pou ganny peye. Sa ki'n fini ganny peye in ganny peye. Si i annan ki pa ankor gannyen zot pou ganny tou zot bann benefis anba Lalwa. Sa napa okenn problem lo la.

Ki lobzektif se ki *Air Seychelles* ti a kontan ki sa 133milyon i anmenn zot pa selman pou 9mwan me pou 12mwan.

Akoz *Air Seychelles* pa anvi retourn ankor kot Gouvernman pou demann ankor en sibvansyon saler sa lannen. I pa anvi fer li. E nou osi konman en Gouvernman nou pa pe ankouraz. Nou pe ankouraz enn bann solisyon alternativ.

Donk wi si i annan bann kondisyon travay ki'n varye en pe e sa dan kad Lalwa. Napa okenn Lalwa ki'n ganny kase me "*variations of terms of contract or employment condition*" i ganny fer normalman anba Lalwa Lanplwa isi.

E donk mwan mon ti a kontan dan sa zefor ki sa Lakonpanyen pe fer felisit bann travayer.

E i annan tou travayer - (*mon pa konnen si tou i en bon mo la*) Me selman bokou travayer sirtou bann ki le bann lapey o in pran en *cut* dan zot lapey. E sa i montre poudir zot anvi vwar sa Konpanyen re fleri.

Lot pwen ki enportan pou dir se ki dan sa moman kot nou frontyer in re ouver *Air Seychelles* in pran serten linisyativ. Ki parfwa en pe

kontroversel ki parfwa dimoun pa'n tro konpran. Me selman sa bann linisyativ ki in pran pe peye. *Air Seychelles* pa pe perdi larzan *operationally* la dan son bann vol ki i pe fer lo Izrael, lo *Mumbai* e lo *Dubai* mon krwar. E apre i pe fer bokou *charter*.

Donk in annan bokou linisyativ sorti kot *Air Seychelles* pou *mitigate* en pe sa sityasyon kot finans i difisil. Nou dan en bon moman. Frontyer in ouver tou dimoun i le vwayaze.

Nou pa konnen si sa pou dire. Me ler i pe dire nou kontan. Etan ki i dire ki i al dan sa direksyon nou pou ankouraz *Air Seychelles* pou kontinyen fer sa bann linisyativ.

Alors Onorab mon ti a kontan dir ki *Air Seychelles* Gouvernman pe fer tou sa ki i kapab pou li sov sa lakonpanyen. *Air Seychelles* pe zot osi pe zwe zot bout.

Bann negosyasyon i vreman vreman difisil. Nou pe koz lo bann Kontra lo nivo enternasyonal ki *involve* en kantite milyon Dolar ki zot ava aksepte ki Lasanble pa kapab al dan bann detay sa bann negosyasyon pandan ki zot pe deroule.

Me selman i annan en kantite travay ki pe ganny fer e si tou dimoun i met bonn

volonte mon santi keksoz i kapab *turn out* pozitiv. Me nou pe get li avek en lide vreman pozitiv. Sa i pou *Air Seychelles*.

Mon krwar ou dezyenm kekyon ti lo *SPTC* e relasyon ki *SPTC* i annan avek bann *omnibus operators*. Li osi i difisil. Me mwan mon'n personnelman rankontre detrwa bann *Omnibus Operators* e i annan en optimis dan ler. I vre ki sakenn pe sey protez son bout gato la pou le moman.

Taksi drayver pe sey protez pou li, Lazans Vwayaz pe sey protez pou li. Cat Cocos pe sey protez pou li. *Omnibus* pe sey ganny en bout dan sa gato li osi. Tou dimoun pe sey debrouye. Me se sa lespri ki nou ti a kontan vwar.

I pa perfe. I pa perfe i annan optimis. I annan dimoun ki ankor pe *struggle*. Me nou fek re lanse. E mwan mon santi ki i annan en bon lespwar ki keksoz pe deroule.

Akoz si mon kapab dir en serten moman kot Minis Finans ti pe mazine poudir si nou kapab ganny nou ant 500 a 550 viziter par zour.

Pou sa bann mwan ki pe vini nou pou *ok*. Be la nou lo 600/650. Donk nou pe fer en pti pe mye ki nou ti pe – ki nou *base line* konmsi.

Donk i annan keksoz ki pe deroule. Mwan mon a demann tou bann operater dan tou bann sekter lev granmaten annou ale nou ava rod nou dipen sakenn antre nou. I annan ase.

Sa gato *tourism* i ase pou partaze pou tou dimoun ganny en bout. Nou, nou pou fer sir ki nou re konstrir sa gato. E ler in ler pou partaze nou pou fer sir ki tou Seselwa i ganny son bout ki i merite. Sa i en komitman ki nou, nou fer e nou ava gete dan bann mwan ki pe vini bondye pitye keksoz i ava *ok*. Mersi.

MR SPEAKER

Wi Onorab.

HON WAVEN WILLIAM

Mersi Mr Chairman. Mon ti a kontan demann Minis Dezinyen premyerman enn, pou - mon pa konnen si i annan sa lenformasyon akoz lenformasyon ki nou pe gannyen se ki lo kote *management* zot, zot pa'n fer *salary cut*.

Me se anba ki'n ganny afekte avek *salary cut*. E nou pe vwar sa *trend* ki anler pa'n ganny afekte me anler i ganny afekte. E mon ti a kontan ou konfirman, akoz i annan serten ki fer politik avek. Me mon

kontan ki ou'n dir se ki sa i bann mezir tanporer.

Eski ou kapab re asir sa bann travayer poudir baze lo zot Kontra sa i bann mezir tanporer. E ki ler keksoz pe vin normal nou ava rebran.

Prezan lo kote *Omnibus* Mr Chairman. Minis i annan 60 *Omnibus Operators* e mon pa konnen konbyen taks i pa vin lo mon lespri la. E parey mon dir se ki zot pe ganny Kontra zis pou *STA* epi en lot lekol.

E pa tou vremen ki pou kapab mon kapab dir ganny sa sans pou kapab debrouye. Me mwan mon ti ava demande si Gouvernman ti kapab revwar ankor en pe lo lezot lekol. Si zot pa ti kapab ganny serten pou kapab deservi.

Akoz ki arive se ki mwan mon saler i ganny asire mon Minis. Parey nou tou isi anndan. Me i annan dimoun la deor parey mon dir sa bann dimoun zot a anvi vin kot Gouvernman pou mandyan. Non. Pou dir be non kree sa lespas sa lanvironnman ki mwan osi mon a kapab ganny en pti bout sa gato.

Parey ou pe dir pou zot gannyen i pou en pe plis letan. Akoz parey ou'n dir ou menm poudir nou pa tro asire ki manner keksoz pou ete.

E an menm tan Minis Dezinyen mon ti a kontan petet lo la osi akoz sa osi i montre serten siny lenkyetid pou nou. Letan ou tande poudir bann *money changers* avek labank pa pe aksepte Dolar avek touris. Be sa i pa pou annan en reperkasyon osi lo nou osi si sa i kontinyen? Mersi bokou.

MR SPEAKER

Mersi. Yes.

PS DAMIEN THESEE

Mersi Mr Chair. An sa ki konsern sa *issue Omnibus* parey ou konnen lannen pase Gouvernman ti pran servis *Omnibus* an vi difikilte ki *SPTC* ti pe gannnen. Pou kapab donn servis pou bann etidyan post segonder akoz ti annan lefe lo zot bann servis.

Par egzanp zot pa kapab pran pasaze debout. E ti annan serten restriksyon ti ganny mete dan bann bis osi. Kantite dimoun zot kapab pran.

So *as* en mezir tanporer Gouvernman ti apros *Omnibus Association* pou li kapab sa letan ki *SPTC* pa kapab *provide* sa servis an son totalite vini e asiste.

E sa i sipoze *last* ziska en serten peryod letan. Zot ti *appeal* mon krwar an Out letan sa peryod letan ti'n arive. E la

ki Gouvernman ti deside kontinyen ziska *Desanm*. E sa prezan i fer en fardo lo Bidze ki ti sot R10milyon pou zot kontinyen donn sa servis.

So ankor sa lannen nou'n deside premyerman an vi ki *SPTC* ki pe donn sa servis gete ziska ki kantite servis *SPTC* i kapab donner. E prezan sa bout ki i pa kapab donner la nou kontinyen get *omnibus* e sete *STA* avek *NIHSS* ki nou vwar ki *SPTC* dapre son kapasite i pa pou kapab donn zot sa servis.

So i annan sa *lobby* kontinyel ki pe vini pou kontinyen servi *omnibus*. Me ki nou pe met devan ki se sa biznes i dan menm sityasyon parey lezot ki deor. Be it en biznes dan *Handy Craft*, en *Tourist Guide*, en mason ki osi dan difikilte.

E Gouvernman pa kapab *come in* pou donn zot lasistans *as such*. So i pa pou posib ler nou pou analize pou nou donn plis lekol bann *omnibus* pou – akoz i pe zis fer en *cost* lo Bidze ki nou napa sa resours pou nou donner.

E nou annan bann lezot priyorite *as such* ki nou bezwen finanse. Alor nou *advice* se ki nou pe zis kontinyen avek sa servis an vi difikilte ki *SPTC* I annan. I pa kapab pran pasaze

debout dan son bis. Alor sa in afekte son *fleet* ki i annan pou met a laporte piblik.

E prezan ki i afekte servis ki i donn bann lekòl possegonder. So si nou kontinyen donn lezot lekòl i pou annan en fardo lo Bidze ki nou, nou pa vwar i fer sans. Mersi.

MR SPEAKER

Mersi PS. Wi mon a les Mr Tirant avan apre Minis.

CEO PEMC GEORGES TIRANT

Mersi Mr Chair. Zis petet lo sa pwen Air Seychelles lenformasyon ki zot in *supply* nou lo kote *Senior Management* zot saler, nou vwar poudir ki depi son *CEO* mon pa konnen pe ganny peye atraver *Etihad*. Zot in pran en pe *cut*. In annan en koupir *from their original salary* ek son *amended salary since COVID*. Selman nou kapab *go back and re verifye*.

MR SPEAKER

Minis.

**THE DESIGNATED MINISTER
JEAN-FRANCOIS FERRARI**

Wi pou donn en lenformasyon konplemanter *always subject to* verifikasyon enn bann prensip dan sa bann rediksyon saler se tou bann saler ki par lao R30mil, sa bout ki par lao

R30mil i ganny koupe par lanmwatye.

Mon donn ou en legzanp. Si en dimoun ti pe ganny 50mil i ganny son R30mil me sa R20mil i ganny koupe par 50poursan i ganny R10mil, i ganny li 40mil.

Donk sa i en *base line* apepre. E parey ou pou realize pli en dimoun son saler i gro pli son bout ki ganny koupe i gro. Me selman nou ti anvi gard en saler de baz ki reflekte responsabilite ki sa bann dimoun i pran dan *management* sa konpanyen. Ki bann pilot, ki bann *ground handlers* eksetera.

Donk mon ti a kontan konfirm avek ou Onorab pou lenformasyon piblik ki wi tou bann travayer *Air Seychelles* in fer en zefor depi son *top management* ziska son nivo pli ba. E nou remersye zot e nou swete ki tre byento nou a kapab retourn dan en sityasyon normal. Mersi.

MR SPEAKER

Mersi Minis. Onorab Gill.

HON CHURCHILL GILL

Mersi Mr Chair. Bonn apre midi Minis ek ou *panel* e tou Manm. Lo *Air Seychelles* nou tou nou konnen tou keksoz in

dir sa ki devret dir lo *Air Seychelles*.

E lefe i reste selman nou annan 133milyon ki definitivman nou pou donn nou sipor pou asire ki tou sa bann staff *Air Seychelles* zot kontinyen dan zot travay.

Selman mon santi ki i annan en bout ki reste akoz sa 133milyon I ti *intended* pou en *purpose*. I enportan ki nou ganny garanti ki *management Air Seychelles* enkli son *Board* sa *expense* anba la i al pou sa *purpose* ki pe ganny aprouve ozordi. Mersi.

MR SPEAKER

Mersi. Minis.

**THE DESIGNATED MINISTER
JEAN-FRANCOIS FERRARI**

Ok. Mersi Onorab. De keksoz mon ti a kontan dir ki Lagreman se 103milyon pou saler e 30milyon an tou i fer 133milyon. 30milyon pou en *subsidy* ki ti deza agree dan lefase.

Ki *Air Seychelles* pou gannyen pou li servi son loan. So nou pe mentenir sa Lagreman ki Gouvernman presedan ti fer avek *Air Seychelles*.

Me mon konnen i annan en laspe en pe teknik e mon ti pe diskite avek Onorab - *Leader*

of Government Business pli boner lo ki mannyer Gouvernman pe osi rod en fason pou li *ring-fenced* sa larzan ki i pe donner, sa *subsidy* dan en mannyer ki si negosyasyon pa abouti, i pa vedir ki Gouvernman Sesel i perdi sa larzan.

Sa larzan i ganny byen limite, byen kadre pou saler e sa *subsidy*. Mon mazinek kekfwateler Onorab Georges si i pran la parol kekfwateler i ava kapab eklersi nou en pti pe lo la. Mersi Mr Speaker.

MR SPEAKER

Wi Onorab Gill.

HON CHURCHILL GILL

Wi mon ti zis le dir ki konman en Manm *FPAC* mon krwar i ti pou en bon keksoz osi si i annan en dyalog ki kontinyen ant *Air Seychelles* ek *FPAC* lo sa sonm pou asire ki tou keksoz pe mars byen. Mersi.

MR SPEAKER

Mersi. Minis in note. Byen, Onorab Michel Roucou.

HON MICHEL ROUCOU

Mersi Mr Chair. Bonn apre midi *panel*. Bonn apre midi tou zabitan Mont Fleuri ki a lekout. Minis ou'n koz en pti pe lo kote saler. Petet si ti ava bon si ou ti

kapab fer nou ganny sa lalis konbyen bann saler, ki tou dimoun bann *staff Air Seychelles* i gannyen silvouple.

Aprè dezyenman eski sa depar volonter ki bann *staff Air Seychelles* pe pran eski sa i osi lo nivo *management* tou? Si ou kapab dir nou sa.

E dezyenman bann *staff* ki ti pe travay *shift*, ti pe travay *night shift* zot ti pe ganny zot R2mil mon krwar pou *night shift*. Si sa i ankor pe donner ouswa in arete? Mersi.

**THE DESIGNATED MINISTER
JEAN-FRANCOIS FERRARI**

Mersi. Sorry Mr Speaker. Lo ou premye kestyon Onorab mon mazine poudir sa lalis bann saler i kapab ganny donner avek, avek Lasanble konman, konman en dokiman ki i ava enstri zot pou zot byen konpran ki manner pe marse.

E lezot de mon napa sa lenformasyon lo la. Mon napa sa lenformasyon lo si in annan *top management* ki'n swazir depar volonter. Mon mazine poudir kefw annou agree pou nou pran sa propozisyon ki Onorab Gill in met devan Lasanble.

Ki premye loportinite ki *FPAC* i gannyen i, i ganny en pti enteraksyon avek *Air Seychelles* e i demann tou sa bann

kestyon, sa bann detay lo sa program ki *Air Seychelles* i anbank ladan. Mersi.

MR SPEAKER

Wi Onorab.

HON MICHEL ROUCOU

Minis ti ava bon an term sa, sa *night shift allowance* ti ava bon zot war sa R2mil aköz i paret mwan sa bann *staff* ki pe travay aswar zot pa pe gannyen zis verifeye. Mersi.

MR SPEAKER

Mersi.

**THE DESIGNATED MINISTER
JEAN-FRANCOIS FERRARI**

Ok mersi.

MR SPEAKER

Yes go ahead.

**THE DESIGNATED MINISTER
JEAN-FRANCOIS FERRARI**

Mersi Mr Onorab Roucou nou ava, nou ava regarde mon ava fer sir poudir sa i eklersi si en dimoun ti merite gannyen e i ti dan kondisyon pou li gannyen i bezwen gannyen.

Si sa *allowance* in sispann pou en rezon ki tou dimoun ti'n dakor *whatever, whatever* sa en lot zafer. Me selman si son *entitlement* ; - *entitlement* i bezwen ganny respekte. Mersi.

MR SPEAKER

Mersi Minis. Onorab Uranie.

HON ROCKY URANIE

Mersi Mr Chair. Bonn apre midi Minis ankor en fwa. *DM* La Digue nou napa *SPTC*, me nou annan bann transpor prive ki deservi bann zanfan lekòl parey bann *SPTC* i fer.

Zot al sers zanfan dan bomaten fer sir zot ariv lekòl a ler e apre lekòl osi zot pran zot. Zot pran sa bann zanfan e re anmenn zot dan sekirite. Me nou war ki sa bann dimoun zot pa gannyen gran profi.

E alor zot ti pe gete si Gouvernman pa kapab donn zot en pti sibvansyon oubyen en pti mwenz, zis pou ed zot kapab fer sa servis? Mersi.

MR SPEAKER

Mersi. Wi Minis.

**THE DESIGNATED MINISTER
JEAN-FRANCOIS FERRARI**

Mersi Onorab. Si mon larg ou dan lanmen, dan lanmen *PS* Thesee ou mor *ok*? Be mon pa pou anvoy ou, mon pa pou anvoy ou mor mwan. Mwan pou zis, mon pou zis dir ou *subsidy* i en mo ki nou'n en pe dan ti war pou le moman.

Nou parler nou servi sa mo *incentive* ki mannyer nou

kapab *incentivise* en sekter pou ed li pou devlope.

Sekter transpor La Digue nou pa'n reflesir lo la me mon, mon ti ava dir mon konnen poudir kekfwa ou kestyon i vin akòz lendistri touris La Digue pa ankor relman demar dan son *full* kapasite parey i ti ete avan *COVID*.

Me i a pe vini e me pou le moman *still* i annan en pe dimoun ki pe *struggle*, mon konnen poudir bann dimoun La Digue se bann dimoun ki rezilyan ki i annan parmi ki'n ale ki'n revini in fer en zoli *come back*.

Mwan mon krwar (Onorab Sophola pe riye) mwan, mon krwar ki dimoun La Digue pou fer en zoli *come back* zot annan bann linisyativ ki zot kapab pran. Me selman ou, ou lentervansyon i ganny note e nou ava koz, nou ava koz lo la enn se zour. Mersi.

MR SPEAKER

Mersi Minis. Onorab Henrie.

HON GERVAIS HENRIE

Mersi Mr Chair. Bonn apre midi tou dimoun. Mr Chair mon annan de pti pwen. Premyerman konsernan *postal services* i annan en Onorab avan mon ki'n koz lo la.

Fransman mon pa konpran akoz Sesel nou'n al fer nou *postal services* vin en konpanyen. Si ti en rekomandasyon *IMF* zot sorti *Canada* zot sorti Lanmerik, sa bann pei laba i gran li zot kapab evalye e fer larzan pou nou i pa posib sa.

Mon war lapos i bezwen reste enn bann *core function* ki Gouvernman i bezwen donn en sosyete, akoz i bezwen *still* anmenn sa let dan bann leo partou. E nou bezwen donner sa servis ozordi la nou pe koz konmsi ki mannyer lapos i pou fer larzan.

Nou pa demande ki mannyer larme pou fer larzan nou pa war ki larme pe fer dan bokou fwa. So apre 128an sa servis mon krwar nou bezwen i en lenstitisyon ki mon kontan mon war bann fakter pase konmsi i anmenn en - i annan en keksoz avek sa servis i, i zot konn tou bann dimoun dan kominote.

Mon krwar nou bezwen fer plis pou nou prezerv li e kekfw a lavenir nou bezwen konsidere sa zafer pou li reste en konpanyen.

Parske si i ti merit vini depi 2010 *the Postal Services Act* ti pase 2010 e i annan en *Board* be sa bann propozisyon pou fer li vin komersyalman

vyab konmsi sa *Board* ki i pe fer tou sa letan.

E i annan bokou bann propozisyon ki'n deza ganny met dan piblik swa i fer servis biro desanz. I kapab fer *delivery service* si mon anvi anvoy fler par la ouswa en pti *package* lekel ki fer dan lapos i fer i mazin pou fer sa.

I annan bann pei ki zot vann lasirans zot vann telefonn *internet cafe*. Konmsi *all these ideas* be selman Sesel i tro pti, pti e mon pa war pou nou fer sa.

So mon pledwari se pou nou reget sa model, eski lapos i merit vin en lakonpanyen? Akoz mon pa war kot i pou kapab fer son larzan.

Dezyenmman Mr Speaker mon'n not bann antite ki pe ganny en sipor finansyel avek Gouvernman partikilyerman bann ki ti gannyen lannen pase me sa lannen i napa.

E mon pa pou pas dan tou me selman enn ki enteres nou *constituency* se byensir *IDC* nou war en sonm 31milyon ki ti gannyen lannen pase. La safwasi i zero donk mon ti ava kontan en lesplikasyon lo la? Mersi Mr Chair.

MR SPEAKER

Mersi Onorab. *Panel, yes PS.*

PS DAMIEN THESEE

Mersi Mr Chair. An sa ki konsern lapos rezondet ki ou war li en konpanyen se ki avan sa ti tonm anba Minister Finans. I ti en divizyon Minister Finans e bann reform ki'n ganny fer i war ki pa neserman fer sans pou ou annan en lapos dan Minister Finans.

Zot ti tir li e met li lo son prop lipye si oule e i annan bann diferan model ki ou kapab kree ler ou ti en antite dan *Central Government*.

So i kapab *encorporation* parey ou annan *PEMC* ou annan *SPTC* bann keksoz ouswa i vin en konpanyen e desizyon ti ganny pran pou fer li vin en konpanyen pou le bi ki i debout lo li menm i fer en pe larzan.

Me selman mon krwar parey ou'n dir i annan bann kontrent ki nou realize isi pa neserman posibil pou zot kapab fer.

Me selman *at the same time* zot in seye par egzanp pou pey bann *bill* itilite *PUC* zot, zot in antre kot zot annan sa laces ki *available* ki ou kapab ale.

So i annan serten zefor ki zot pe fer. Me parkont lo kote Gouvernman tou le lannen si ou get *even* 2019 nou'n donn li R3.5milyon son *subvention cost*.

So nou konnen ki *already* lapos i dan en problem finansye li. Lo li menm i pa pou kapab neserman kapab *meet* son bann depans so i annan sa lasistans.

Me selman nou ava tann nouvo *Board* la e zot annan en nouvo *Board* en nouvo manda. E petet *PEMC* i ava annan en pe plis detay kote bann laspe zot kapab fer ki zot pa pe konsidere ki zot kapab. Me selman *at the same time* nou konsyan tou lapos lemond aktyelman i dan menm difikilte finansye ler nou get li.

Lo kote *IDC* ; - *IDC* lannen pase ti demann nou en lasistans tanporer e sa ti pou kouver selman son laspe kot i ti annan *tourism*.

An vi ki i annan serten zil ki annan bann, bann *staff* anvi ek *close down* zot ti annan difikilte so nou ti donn li sa lasistans tanporer e pou 2021 nou pa'n donn li anvi nou ti espekte i pou fer pli byen.

E parey lezot *SOEs* nou pou kontinyen *monitor* li pou war zot dan difikilte pou nou donn zot lasistans. Mersi.

MR SPEAKER

Mersi PS. Onorab Loze.

HON JOHAN LOZE

Mersi byen Mr Speaker. Mr Speaker mon premye kestasyon i al pou Mr Tirant. Mr Tirant *SPTC* i enn sa bann *entities* la ki i vini toulezan li e i pran li en *average* dan R50milyon. la sa lannen *end of year* lannen pase in monte.

Sa lannen nou war i retourn 50 a la menm enstan Minis Transpor ti dir nou poudir zot in fer *huge losses*. Prezan mwan, mon kestasyon ki mon oule poz ou se eski en letid i kapab ganny fer lo *SPTC* an relasyon avek *COVID-19* lannen pase e boner sa lannen lo kwa egzakteman ki'n kapab okazyonn sa bann *losses* ki *over and above* son *subsidy* labitid?

Ki nou ava annan fe konkret pou travay avek aköz so far nou'n ganny dir wi i annan *loss SPTC* pe perdi larzan, *but we don't have data* pou nou konnen egzakteman aköz ki'n arive?

Nou kapab *infer* me selman ti a byen si Gouvernman li menm ti annan lenformasyon, aköz desizyon pou bezwen ganny pran e Gouvernman i bezwen annan lenformasyon pou baz son desizyon lo la.

Mon lot kestasyon *PS* ou'n fek reponn en kestasyon la mon krwar i annan apepre 9 *entities* la si mon pa tronpe, e ladan i

annan zis 3 ki i vini *recurrently* tou leres i paret zot pa ti abitye vini.

E lannen pase tou dimoun in vini in vin tap laport Gouvernman pou ganny en pti larzan parey ou'n dir *including IDC* kot nou al fer parti apre pa kapab vin travay Lendi.

So si ti posib aköz ou'n lafason ki ou'n reponn sa kestasyon lo *IDC* la ou'n les nou konpran poudir li i ti annan en partikilyarite zis kot i annan *tourism* ki in *require* sa *subsidy* me i annan tou bann lezot.

Si ou ti kapab donn ou en lide zeneral pa neseserman antre dan tou zot detay en lide zeneral aköz ki zot, zot in vin tap ou laport lannen pase? Yes Mr Speaker sa.

MR SPEAKER

Mersi Onorab. Minis wi.

THE DESIGNATED MINISTER JEAN-FRANCOIS FERRARI

Non mersi Mr Speaker. Zis pou detay en pti pe mon dir avek Mr Tirant i annan en kestasyon lo *data* dan Tata, so mon pa konnen si i annan en pe dan si i ti a kapab partaz avek nou silvouple. Mersi.

MR SPEAKER

Ale mersi. Nou a Mr Tirant oule pran premye bout kestasyon.

CEO PEMC GEORGES TIRANT

Mersi Mr Chair. Mersi Onorab. Kote spesifikman pou *Covid* sa bann *loss* byensir nou'n analiz en pti pe nou bann *budget demand* akoz i bokou plis ki sa 50milyon *ok*. Akoz *SPTC* pe espekte sa lannen fer en *loss* 132.7milyon e reveni ki i pe espekte anmase apepre 81.5milyon. Son *expense* i deza 214.1milyon.

E li i ti pe demann 87.6. Dan nou *budget report* ki nou fer nou anvoy Minister Finans nou'n nou dan letan ou dan *SOEs or public enterprise* nou pa tro kontan sa mo "sibvansyon."

I pa en mo ki *even IMF* i demann ou e bann lorganizasyon i servi. Ki nou demande se dan bann konpansasyon direk ou endirek. Dan lepase nou'n fer rapor nou'n donn Minis Transpor.

Me byensir ki nou ti'n demande nou'n fer ankor sorti sa rekomandasyon, ki nou annan serten lasistans, pei i ganny serten lasistans pou ganny en eksper ki kapab determin sa ki nou appel *economic tariff* pou tiket.

I a permet akoz ozordi *SPTC* pe dir ou en tiket i devret R18. So i R11 *less* ki i devret ki

bezwen rode sanmenm sa ki fer li pli difisil.

Nou anvi ki i kapab kalkil byen sa *economic tariff* e nou'n dan lepase nou montre osi posibilite ki i annan *leakage ok*. E sa son *management* i bezwen adrese e dan bann lezot rekomandasyon ki nou'n fer se ki zot *provide* zot prepar en *operational plan* ki *rigorous*, pou *provide* sa ki nou apel *service obligation* ki nesese pou sa ta pou sa kantite dimoun ki *travel* par bis *SPTC*.

So pou zot in met devan son Minister Finans *next week* nou annan en miting avek *SPTC* mon krwar e Minister Finans e Minister Transpor pou nou adres sa bann *issue* pou koz lo sa *budget*.

Me definitivman i pou nesese war realite *COVID* dan li menm. Akoz en antite parey i devret met son plan byen e pou war ki mannyer nou adres- Ou konnen i enportan nou bann *figures* i drwat e nou sa ki nou bezwen nou, nou pe travay avek zot pou ki bann *figures* i bon.

E de fwa ennler parey mon ti dir parey *PEMC* letan ti pase, bann antite souvandfwa letan zot vini zot, zot konnen Gouvernman pou donn sa larzan alor zot donn larzan.

Me si ou aranz ou plan byen me si ou, ou revwar ou

striktir ou revwar anndan ki manner ou vin pli efisyan pa pe dir ou fer profi pou pey *dividend* i enposib.

Me ki manner ou, ou *reduce* ou bann *cost*. So i bann ki devret i devret ki pou ganny ki pe ganny fer. E definitivman lannen pase *World Bank* ti anvoy en eksper ki ti vini e li son bann rekomandasyon e enn kalkil pri bis byen, lot sete revwar bann larout.

Konpran bann larout eski nou bezwen par egzamp eski nou bezwen risk ki pe al Anse Aux Pins.

Oubyen nou met plizyer bis ki monte ki fer letour ki fer (SC3) ki kapab tap Port Launay. Me ki permet distribisyon pli fasil so e ki manner *private sector* bann *omnibus* i kapab antre dan bann pti larout e la i vin keston ankor pa bliye *SPTC* i pe ganny bann *Grants* pou bis.

Ki manner sa *private sector* li i pe pey son *loan* e prezan li i pou al *compute* sa tiket. I annan tout en travay e i ankor lo latab parey sa travay, sa travay lo *Air Seychelles* ki Minister Finans ti a gid nou lo kote *SPTC*.

Me mon pran ou pwen tre valab lo kote *COVID*. So nou, nou kapab prepar en keksoz pou montre zot en pti pe ki manner i ganny afekte. Mersi.

MR SPEAKER

Mersi. *PS* oule kontinyen.

PS DAMIEN THESEE

Mersi Mr Chair. Tre brefman lo, lo *SPTC* nou'n touzour konnen ki sa pri bis i enn bann fakter akoz i annan *loss*. E tou konpanyen ou bezwen annan sa reveni pou kapab *meet* ou *cost*.

E nou konnen ki R10 detrwa lannen la nou konnen sa R10 i pa ase pou kouver sa pri pou kapab kit loperasyon *SPTC*. So sa pou en Polisi Gouvernman ki i anvi fer lo konsernan pri bis. E dezyenman dan bann lannen nou konnen osi i annan serten posibilite *leakage* dan koleksyon bann *bus fare* sa osi i enn bann keksoz.

E avek *COVID* parey mon'n dir i pa neseserman kapab pran pasaze debout sa osi in afekte en pe son koleksyon reveni e nou ti pe sey pouse nou an, lannen pase tar pou kapab retir sa restriksyon avek *Public Health* me apre nou annan *the second* kapab dir *round COVID-19* ki'n, ki'n fer nou abandonn sa plan.

So sa i enn bann rezon akoz nou annan be selman sa revi ki pe ganny fer i ava donn Gouvernman en nouvo

lentansyon ki i anvi fer atraver *SPTC*.

Lo bann lezot antite si nou get *NISA* ; - *NISA* osi ti donn li en lasistans tanporer me selman ler nou fer son revi, nou war ki i pe gannnen sa *income* aköz bann lakonpanyen pe kontinyen *advertise* sa i son *main source of revenue* ki *keep* li debout.

Nou annan *L'Union Estate*, *L'Union Estate* osi zot ti ganny lasistans pou sa premye 3 mwan apre nou'n aret donn li lasistans i ti annan li en rezerv apepre R10milyon boner lannen pase. E i pe manz sa larzan la mon kapab dir.

E posibilite la sa lannen nou pou met, nou pou *monitor* li *mid-year* pou gete ki son risk, aköz si touris pe konmans antre gradyelman la, i kapab annan en posibilite ki i pa pou kapab ganny sa kantite reveni ek li ki pou kapab kontinyen.

Dernyerman nou ti annan *SFA*, *SFA* pa ti en lasistans saler li me ti en peyman taks ki nou ti bezwen fer lo son kote ki ler i ti ankor pe debout as en antite lo Bidze ki nou ti fer son peyman pou li. Mersi.

MR SPEAKER

Mersi. Wi Onorab.

HON JOHAN LOZE

Mersi Mr Speaker. Mr Speaker zis an pasan, mon'n byen apresye sa pti nimerik ki Minister in fer. Zis son pti nimerik i pa ti konplet in koz lo en kestyon lo *data* dan Tata ki paret in ofans bann ki'n fer Koudeta. Mersi Mr Speaker.

MR SPEAKER

Mersi *ok* byen nou a- Eski mon'n ganny tou Manm ki'n lev lanmen ziska konmela avan mon pas lo Onorab Pillay? Byen Onorab Pillay ou annan laparol.

HON SEBASTIEN PILLAY

Mersi Mr Chairman. Mr Chairman mon, mon premye lobzervasyon taler mon'n tann en kestyon lo ki larme pe fer. Aparaman larme lo zil pe vey delegasyon ki pe tir petar Assomption.

I annan en pwen enportan ki'n souleve ki *Designated Minister* in souleve ki mon le, mon le ganny klarifikasyon Polisi ki Gouvernman pou pran lo la.

In koz lo en pwen ki Onorab Georges pou fer taler so nou ava mon ava tann sa bout osi. Me selman si Gouvernman pe kontinyen fer provizyon pou fer sa bann *subventions*, pa *subventions* sa bann *incentives* annou apel li *incentives*.

Akoz mon krwar wi i fer sans parey Mr Tirant osi in dir sa mo sibvansyon i en mo ki Minister Finans i bezwen *from in the next budget* regarde ki mannyer i ganny konfigire aköz sa i anvoy en lot mesaz.

Me kestyon ki nou annan pou demande se eski i posib pou ganny Gouvernman pou donn serten garanti vizavi bann ou'n donn nou bann alokasyon sa 303milyon *plus* sa 33. Me *going forward* nou osi war poudir i annan *262million for next year*.

Now si ou en dimoun ki investiser oubyen krediter oubyen dimoun ki akredit *Air Seychelles* ki pe esper en sa i lans en mesaz ek ou sa ki Gouvernman pe lans sa larzan.

Eski nou kapab ganny serten garanti - mon pa oule al bokou detay aköz mon pa oule kre plis sa. Me serten garanti ki Polisi ki nou pou pran, se ki i annan en striktir pa zis lo sa enn Bidze ki la, me lo all bann *subsequent budgets* ki pe *incentivise Air Seychelles* dan en fason ou enlot.

Konmsi ki mesaz ki pe ganny lanse se ki *Air Seychelles* napa *full* Lotorite pou zis depans sa bann larzan. I bezwen annan serten, serten *milestone* ki i *reach* avan i

kapab depans serten porsyon sa larzan.

Mon pa konnen si mon pe fer mon lekor kler avek ou. Aköz si ou en krediter ou pe get sa i donn ou lenpresyon poudir *Air Seychelles* i likid. E si i donn ou lenpresyon ki *Air Seychelles* i likid *then Air Seychelles* i kapab re pey ou si sa provizyon finansyel i la?

So mon krwar sa i mon konsern aköz pou mwan *the main issue* se ki mon pa oule personn i vini i trangle *Air Seychelles* aköz i santi Gouvernman pe met larzan dan *Air Seychelles* e *Air Seychelles* i annan larzan.

Sa i mon premye kestyon. Mon dezyenm kestyon Mr Chairman i konsern *Seychelles Fishing Authority* ki en antite ki Minis i responsab eski *Designated Minister* i kapab dir nou - nou konnen ki *SFA* in ganny lotonomi finansyel.

Me sa ki mwan, mon ti konsernen avek oparavan e mon ankor *still* konsernen avek se striktir *oversight* lo *SFA*. Mon pe met sa kestyon la aköz i aparet la e sa larzan ki i ti gannyen i pa neserman en sibvansyon me i ti, sa tranzisyon ki'n bezwen fer ler mon pe gete.

Be la lefe ki in fer sa tranzisyon, eski ou kapab donn

nou pa dan gran detay me ki kalite *oversight* i annan lo depans *SFA* e *monitoring* asire ki son proze i ganny realize vizavi larzan ki i annan?

E mon dernyen kestyon i al pou i al an relasyon avek *Seychelles National Parks Authority*. Ou konnen Gouvernman in propoz serten sanzman Polisi sa i soz Gouvernman.

Me nou ganny en leksplikasyon vizavi sa 14milyon sa 14.7milyon. Me nou konnen poudir par egzanp *National Botanical Gardens Foundation* i sipoze parti *National Parks Authority*.

Eski sa larzan ki la pe pran kont sa *move*, sa *merger* ki pou annan *or* sa larzan i zis strikteman pe regard Lotorite Park Nasyonal konmela *without National Botanical Garden Foundation*.

Ki nou konnen avek sityasyon *COVID* son reveni in bezwen ganny afekte aköz enn son main sours reveni sete touris ki antre dan zarden? Mersi Mr Chairman.

MR SPEAKER

Mersi Onorab. *Panel* wi Minis.

**THE DESIGNATED MINISTER
JEAN-FRANCOIS FERRARI**

Mr Speaker mon a pran sa en pti komanter lo *Air Seychelles* apre mon mazine mon ava demann Mr Tirant pou donn nou en lide lo ki kalite *oversight* ou pe fer lo *SFA*.

E answit Mr *PS* i ava pran dernyen kestyon pou, pou eksplike ki mannyer *SNPA* avek *Botanical Garden Foundation* i sa. Lo sa enn premye lo *Air Seychelles* Onorab konmsi partou kot ou war en gro sif ou krwar i en potis larzan.

Be R262milyon i en det sa, i en det sa. I pa montre poudir *Air Seychelles* ti *buoyant*. O kontrer i montre poudir *Air Seychelles* i dan problem. so mon, mon ti a kontan zis koriz ou lo la e, e zisteman tou bann negosyasyon ki pe ganny fer se pou gete ki mannyer nou kapab redwir sa det.

Donk *Air Seychelles* annou pa, annou pa anbet nou lekor *Air Seychelles* i en konpanyen ki dan, dan problem finansye serye, serye e mon pa krwar ki nou pou kapab anbet okenn dimoun okenn investiser pou krwar poudir i en bon, i en biznes a sa moman la ki, ki nou devret pe ki zot devret pe *invest* ladan.

Donk i en sityasyon kot Gouvernman pou pran son responsabilite e rod tou bann mwayen pou kapab rezourd e, e

war en solisyon pou sa det.
Mersi.

MR SPEAKER

Mersi. Mr Tirant.

CEO PEMC GEORGES TIRANT

Mersi Mr Chair. Mersi Onorab.
Mersi, mersi Minis. Depi lafen
2019 anba nouvo regilasyon
Seychelles Fishing Authority i
form parti bann *public*
enterprise i vre depi en pti pe
avan nou ti koz lo la me i pa ti
dan regilasyon.

E lannen pase wi lannen
pase 2020 nou'n fer sa ki nou
appel en *governance audit* lo
Seychelles Fishing Authority e
nou'n *submit* avek Minis Ferrari
e son *Board*.

Nou konnen *Board* in
sanze nou met tou bann
konsern ki nou annan. E mon,
e sa rapor normalman Onorab
konman *Chairman FPAC* ou, ou
devret pe ganny enn.

E prezan nou travay pou
bezwen *follow-up* defayans ki
nou'n war i enn nou pou
bezwen avan i ti vin en *anyway*
nou pa ti'n form parti letan in
pran sa bann desizyon.

Me selman letan i ti devret
met son bann kont o kler e sa i
en primordyal ki zot sort out zot
edited. E apre nou'n montre
tou nou bann defayans e

byensir nou lekip pe *monitor*
zot.

E i annan byento mon pou
ganny en miting avek sa nouvo
Board pou diskit sa rapor li
menm *and* pou nou kapab war
the way forward. Sa mon krwar
i enportan e sa i aplik pa zis pou
SFA i aplik pou tou *public*
enterprises i annan e la nou'n
konmanse avek ki zot bezwen
drafte zot bann risk *be it*
finansyel ou si non finansyel.

E osi ki prezan tou nou
bann kominikasyon osi pou
ganny kopi kot sa bann Minis ki
responsab pou sa bann *public*
enterprise. Mersi.

MR SPEAKER

Mersi. PS prezan.

PS DAMIEN THESEE

Mersi Mr Chair. An sa ki
konsern *Botanical Gardens*
Foundation nou'n Lasanble in
aprov en Bidze pou li
R11milyon. Savedir si mon
merger i arive sa lannen i pou al
avek sa larzan. An vi ki i annan
difikilte par egzanp sa lannen
avek *COVID-19* ki'n afekte son
bann koleksyon reveni.

Nou war dan bann bonn
lannen i ti pe fer li apepre
R7milyon *in terms of revenues*.
E la prezan apre sa ladiferans i
bezwen gete ki mannyer i
redinamiz son lekor.

I annan bann potansyel i kapab get ladan par egzantp i annan en restoran ki pou mon *it should let go, it should outsource* e les *private sector* vini *run it* ki i kapab kolekte en *rent* rezonnab dan en landrwa ase prestizye.

I annan sa *biodiversity center* osi ki annan potansyel ankore pou li fer larzan mon krwar Ms Joubert in koz en pe lo son bann lide ki i annan.

E osi son *grounds* ki mannyer i kapab servi osi pou anmas larzan ki deza pe fer la par egzantp ek maryaz pe tir portre ou *rent*. So sa *Board* pou annan *responsibility* pou li fer sir ki sa Lazans i kapab soutenir son loperasyon.

E ler ou pou *merge* li avek *SNPA*, *SNPA* li i ti pe kapab debout lo son lekor, akoz i ti pe annan li en sirplis reveni *over* lo son depans menm si i ti *minor* ti apepre R1milyon *surplus of revenue*.

Me selman ti annan serten potansyel i ti kapab fer enkli osi bann plis kontrol, i ti kapab ganny mete pou li asire ki zot kapab tenir zot lekor. Mersi.

MR SPEAKER

Wi Onorab Pillay.

HON SEBASTIEN PILLAY

Wi mersi Mr Chairman. Mr Chairman mon pou zis *go back* lo sa pwen *Air Seychelles*. Minis i pa'n mon lentansyon pou fer krwar poudir i annan en potis larzan.

Mwan mon krwar ou'n mal konpran ki mon pe sey, ki mon pe sey dir ou. Pwen ki mon pe sey *impress* lo Gouvernman akoz mon pe sey get *Air Seychelles* konman en dimoun ki en konpatriyot la.

Si Gouvernman in met lo son liv konmkwa *Air Seychelles* pe al ganny tel sibvansyon, si i annan en krediter pa en dimoun ki pe vin investir si i annan en krediter i pou donn en mesaz ek sa krediter poudir *Air Seychelles* i annan serten likidite.

So sa ki mon ti pe demann ou eski prezan *knowing full well* ki Gouvernman i le ed *Air Seychelles* ek son det, me i pa le lans *the wrong message* ki i kapab pey sa bann krediter *overnight* ki mannyer ou'n servi sa mo *ring-fence* avan.

Be *going forward* eski sa i pou en Polisi ki i pou annan serten *milestone* oubyen serten striktir Polisi lo lafason sa depans pou ganny fer.

Akoz la nou met konsiderasyon politik akote e nou get travayer *Air Seychelles* ki annan en kantite zot e nou

get fer sir ki sa bann dimoun pa pe perdi zot lanplwa, me osi nou konpanyen pa vin en, en foutbol ant bann dimoun ki annan en kantite larzan e nou ki pe rod tou fason pou sov li. Mersi Mr Chairman.

MR SPEAKER

Wi Minis.

**THE DESIGNATED MINISTER
JEAN-FRANCOIS FERRARI**

Wi en pti mo. Mon kontan Onorab *Leader* Lopozisyon premye fwa ozordi ou'n dir annou met politik dekote. Se sa ki mwan, mon'n dir depi bomaten mon pe dir annou met politik dekote, annou get sa Bidze konman en Bidze pou lepep Seselwa antye.

Wi tou bann vot apel li sibvansyon ou *Grants* ou *whatever* ki pe ganny mete dan Bidze pou soutenir *Air Seychelles* dan kour a mwayen term pe ganny *ring-fenced*, pe ganny *secured* pou ki si zanmen negosyasyon pa abouti napa personn ki kapab tay lo sa bann, lo sa bann larzan pou, pou fer en *quick kill*.

Donk mon krwar ki bann negosyater dan Minister Finans e dan Minister Transpor pe fer en bon travay pou fer sir ki nou nou protez sa sonm larzan. Mersi.

MR SPEAKER

Ale vitman *please*, vitman.

HON SEBASTIEN PILLAY

Mersi *very quickly*. Mr Chairman mon Minis kot *Air Seychelles* mon a met politik dekote, me i annan serten size mon pa pou kapab fer li akoz ou osi ou pe fer politik so annou agree si soz -

MR SPEAKER

Ok mersi. Onorab Georges.

HON BERNARD GEORGES

Mersi Mr Chair. Mr Chair mon lentervansyon apre midi pou baze lo *Air Seychelles* prensipalman akoz se li ki pe ganny pli gro kopo dan sa Bidze ki devan nou la pou *subvention to public enterprises*.

O depar mon bezwen fer en konfesyon e mon bezwen dir ki mon, mon enn bann enn trwa *external counsel Air Seychelles* alor mon anvi ki tou dimoun i konpran sa tre byen.

Mr Chair mon konpran lenkyetid *Leader* Lopozisyon ek lenkyetid ki'n ganny eksprimen par Minis osi. *Air Seychelles* kot i ete konmela i pa en sekre, i dan en sityasyon tre difisil e Gouvernman pa'n pare la pou pran en desizyon pou ferm *Air Seychelles* oubyen pou

kontinyen sibvansyonn li *a vitam aeternam*.

Alor sa ki'n deside se siport *Air Seychelles* atraver son *staff* pou ankor en pe letan, an mezir ki sa lakonpanyen li menm li i vin devan avek en promosyon soutenabilite.

E sa mon krwar i en desizyon ki apropiye e ki i en desizyon ki byen. E nou rol konman sa Lasanble pou nou sipor sa desizyon e konman patriyot ki nou tou nou ete pou sipor *Air Seychelles* otan ki nou kapab.

Sityasyon *Air Seychelles* i pli move ki nou ti konnen dernyen fwa nou konn son nivo det e son nivo det parey nou'n ganny dir devan sanmenm sa Lasanble ti anviron 40 ekek milyon dolar avek *Etihad* e ankor en lot 70 ekek milyon avek bann *bond holders* san konte bann lezot pti bout isi laba.

Mon felisit sa lakonpanyen pou sa ki Minis in, in dekrir ozordi pou ki in pran en linisyativ lo li menm pou li sey aranz son lakonpanyen.

Voluntary redundancies, multitasking, trouv bann nouvo laliny aeryen eksetera. E si sa i posib mon krwar nou tou nou pou rezouir. Antretan Gouvernman pe ed *Air*

Seychelles sa lannen oubyen pe propoze *Air Seychelles* e nou ava deside avek sa R133milyon dan lekel 103milyon i pou al pou saler ki ti'n prozekte ziska pou 9mwan me ki i paret prezan pou bann *redundancies* oubyen bann *voluntary layoffs* i riske anmenn sa lakonpanyen pou son 12mwan plen.

E dapre sa ki mon fek konpran la avek Minis Transpor, bann revizyon saler pou kontinyen ziska Zanvye 2022. Donk i paret *all being well* sa lakonpanyen pa pou bezwen plis larzan *at least from* Gouvernman akoz i pa pe gannyen ziska an Zanvye lannen prosenn.

Mon ti dir ki sityasyon ti pli move ki nou ti krwar. Sa ki'n arive Mr Chair se ki antretan i paret ki bann negosyasyon pou redwir det avek *Etihad* pe byen marse. E donk nou kapab espere ki pou annan en bon rediksyon lo det *Air Seychelles from that quarter*.

Me sityasyon avek bann *bond holders* in vin pir. Bann *bond holders Air Seychelles* ti pe negosye avek zot pou aksepte en gro *haircut* parey nou ti ganny dir devan sa Lasanble, e zot ti pe estimen ki sa ti ava apepre \$20milyon pa plis.

Me la depi semenn pase bann *bond holders* in bouze e

zot in servi en notis lo *Air Seychelles* poudir li si i pa pey son \$71milyon i riske ganny likide. So i riske al dan *winding-up*. Sa se sa sityasyon ozordi.

E sa i met nou lo gard konman en Lasanble aköz si i annan sa, sa demars deor mon pa pe dir i arive e bann avoka *Air Seychelles* pa mon bann, bann ki pli siperyer pe travay lo en fason pou *head-off* sa posibilite.

Me sa ki nou, nou pa devret les arive se ki nou, nou vot en larzan pou *Air Seychelles* ki parey in ganny *fore shadow* la ki enkreansye laba deor bann *bond holders* i kapab dir la, la Gouvernman Lasanble fek vot 133milyon annou sezi.

Aprè midi mon pe fer en provizyon e ki mon anvi met devan, devan sa Lasanble e sa se sa propozisyon se ki nou vot sa Bidze me anba kondisyon e rezerv strik. Setadir ki nou dir avek Gouvernman nou a donn, nou apropr sa larzan ki ou a kapab servi pou ou pey *Air Seychelles* me anba bann kondisyon strik.

E bann kondisyon ki mon ti a propoze Mr Chair se premyerman ki sa aproprasyon i pa ganny konsidere konman en lobligasyon lo lapar

Gouvernman pou li pey *Air Seychelles*.

E i pa ganny konsidere konman en Kontra kot *Air Seychelles* i kapab fors Gouvernman pou pey li sa larzan. Dezyenmman se ki sa larzan i zis en larzan teorik dan Bidze e i pa larzan tanzib i pa larzan tanzib ki pou dan en kont.

Trwazyenmman ki Gouvernman a son sel diskresyon, i ava donn larzan sorti dan sa aproprasyon 63milyon avek *Air Seychelles* ler i konsider sa apropraye.

Katriyenmman ki okenn peyman ki ganny fer *from* sa aproprasyon ki nou pou vote ozordi par Gouvernman anver *Air Seychelles*, pou ganny fer selman pou peyman saler, selman pou peyman saler e pa pou okenn lezot *purpose*.

Senkyenmman si Gouvernman i anvi servi sa aproprasyon pou okenn lezot rezon apard pey saler, i pou bezwen vin devan Lasanble i pou bezwen vin demann nou permisyon avan. E sa se sa 30milyon.

In other words nou pe donn li sa larzan, me nou pe dir apard saler ou bezwen retourn isi e ganny nou permisyon.

E sizyenmman okenn peyman ki Gouvernman i fer

avek *Air Seychelles* i bezwen *ring-fence* pou ki sa larzan i ava al kot pou sa bi ki i pe peye e non pa pou okenn lezot bi oubyen pou okenn pou les li dan en fason ki okenn dimoun i kapab met lanmen lo la.

Mon pe propoz sa avek sa Lasanble apre midi Mr Chair, e avan ki, avan ki mon al pli devan mon ti ava kontan konnen ki reaksyon panel lo sa propozisyon ki mon pe met devan apre midi. Mersi.

MR SPEAKER

Mersi. Nou ava envit *panel* pou adres sa bann remark e sa bann propozisyon. Minis.

THE DESIGNATED MINISTER JEAN-FRANCOIS FERRARI

Mr Speaker mersi. Mon santi ki en kantite travay in ganny fer e ki *Air Seychelles* in pran tou bann prekasyon nesaser.

E se sa bi sa travay ki nou pe fer ozordi. Se pou nou fer sir ki si nou, si nou vot en larzan i al pou sa *purpose* ki nou'n ki nou'n vot li.

Alors mon mazine poudir mon, mon de koleg ki la si zot anv i pran laparol zot ava dir. Me i tonm, i tonm byen en kad, en kad *management* ki apropiye pou sa moman difisil ki nou ladan.

E ki mon lo lapar Gouvernman mon pa war okenn problemm avek. Mersi.

MR SPEAKER

PS ou pou adres sa.

PS DAMIEN THESEE

Mersi Mr Chair. Tre brefman wi akoz an pratik ler Lasanble i aprouv en *appropriation* Minister Finans osi i responsab parey i dir dan seksyon 6 (c) anba *PFM Act 2012*, pou *enhance* sa *oversight* ki Lasanble Nasyonal in donn li lo zesyon finans piblik ek son resours.

E dezyenmman anba seksyon 26, nou annan sa provizyon ki dir ou mon a sey *translate* an Kreol Minis Finans i osi responsab pou met bann restriksyon lo lafason ki sa *appropriation* i ganny donner *to sa accounting officer*.

E dezyenmman i kapab limit fason ki sa *appropriation* i ganny donner, si i ganny zistifye pou en rezon ekonomik fiskal, oubyen pou son *purpose* ki i ti pou ganny *appropriate* i pa aplikab *anymore*.

Savedir i pa vedit ki si en *appropriation* in ganny donner ki nou forse pey sa larzan *out*, si Gouvernman i war ki son litilite i pa pou sa *purpose or in sanz son lide*. Mersi.

MR SPEAKER

Mersi. Mr Tirant eski ou annan okenn pozisyon.

CEO PEMC GEORGES TIRANT

Mon krwar i tre valab i tre byen. Akoz i pe donn pou en *purpose* e in arive dan lepase dan serten pei ki nou'n war kot larzan ki'n donner pou en *purpose* i kapab ganny servi akoz i annan *cash to burn*, avek lide ki nou a ganny larzan pou re antre apre e sa i vreman enportan.

E mon krwar i dorenavan i devret sa fason parey mon dir taler pa zis donn sibvansyon me donn kondisyon. E letan nou, letan nou pe pran larzan piblik pou ed bann *public enterprise*. E osi *why not* dan lefitir bann ki pou kapab i annan en posibilite rann sa larzan *back to the budget*.

E letan nou'n koz *IDC* taler petet *PS* i pa'n mansyonnen dapre sa ki nou ti'n konpran i ti bezwen ganny en sipor Gouvernman me avek lentansyon pou li kapab rann sa ki li in gannyen letan keksoz i amelyore.

E nou war pou lannen 2021 i pe *forecast* en *surplus* i dezyenm pli o apre *SEYPEC* ki pe prevwar *surplus* pou 2021. Mersi.

MR SPEAKER

Mersi. *PS* eklersi mwan. Si Manm i vot pou sa Bidze anba sa bann kondisyon, eski sa bann kondisyon i ganny atase otomatikman avek sa laliny Bidze oubyen i annan lot keksoz ki bezwen ganny fer? *PS*.

PS DAMIEN THESEE

Mersi Mr Chair. Mon pa okouran mannyer ankadreman Bidze i été, mon sipoze non. Selman mon konpran lentansyon Lasanble se pou osi ed Gouvernman dan sa prosesis avek *Air Seychelles*, pou garanti poudir sa larzan.

Demen sa bann *bond holders* oubyen *any creditors* ek *Air Seychelles* i pa vin rod *claim* lo sa larzan pou pey sa bann det.

Akoz Gouvernman in vin la pou Lasanble pou demann laprouvasyon pou servi sa larzan pou pey saler sa bann travayer.

So sa ki enportan ki nou pe koz menm langaz nou anvi *safeguard* pou peyman travayer me pa sa bann *bond holders* oubyen *any creditors* i le pran si ou dir priyorite lo sa larzan. Mersi.

MR SPEAKER

Mersi. Onorab Georges.

HON BERNARD GEORGES

Efektivman Mr Chair mersi. Lespri deryer mon propozisyon se ki personn pa krwar ki le moman ki nou vot R133milyon pou *Air Seychelles*, ki sa larzan i al lo en kont ki zot pou kapab sezi si zot en kreansye.

Mon anvi fer li kler ki se, se pa sa. Sa ki nou pe sa ki Lasanble pou fer ler i vot sa Bidze se donn pouvwar Gouvernman si i santi ki i apropiye a moman ki i santi ki i apropiye pou li donn *Air Seychelles* en larzan.

Me napa ni en lobligasyon lo Gouvernman pou peye ni en lobligasyon lo *Air Seychelles* pou resevwar. Mon le ki sa i kler akoz mon pa anvi ki apre tou sa travay ki nou'n fer, e apre tou sa sipor ki Gouvernman pe donn *Air Seychelles* pou kapab fer li re anvole ankor ki en dimoun i pas devan e i pran sa bann, i pran sa larzan e i anpes sa arive.

Mon ti pe menm anvi akoz la nou pa pe koz avek Seselwa la, nou pe koz avek bann *bond holders* laba deor. Mon mon ti anvi menm me mon ava ganny gide par ou Mr Chair, mon ti anvi menm ki sa bann kondisyon ki mon pe mete la, i ganny *read into the proceedings of the Assembly* pou ki tou

dimoun i kler i konnen ki sa Lasanble ozordi pa'n donn *Air Seychelles* en *cheque* R133mil ki zot kapab sezi pou zot fer sa ki zot anvi avek.

Sa ki nou pe fer se nou pe dir avek Gouvernman ou annan en alokasyon R133mil (*sorry* R133milyon, ki ou kapab a ou diskresyon servi pou pey saler Gouvernman saler bann eskiz mon saler bann travayer *Air Seychelles*, selman.

Si ou anvi servi sa larzan pou okenn lezot rezon ou bezwen retourn isi devan sa Lasanble avan ki ou fer li. Ou napa menm diskresyon pou ou kapab fer li. E pou reponn *PS Thesee* Lasanble i kapab a nenport ki moman met ki kondisyon ki i anvi lo okenn peyman lo okenn apropiyasyon ki i fer.

Napa okenn apropiyasyon ki *open ended*. E *in any event* Lalwa i donn permisyon avek Minister Finans menm si Gouvernman menm si Lasanble in apropiir en sonm larzan, ki'n donn avek Gouvernman Minister Finans i kapab li osi pa peye e pa swiv sa pou enn sa bann rezon ki *PS Thesee* in fer ozordi.

Donk i annan sa ki mon anvi fer ozordi, se ki nou Lasanble i *ring-fence* sa larzan e ki dezyenman Minister

Finans i ava *ring-fence* li sak fwa ki i fer en peyman pou en rezon spesifik ki nou, nou'n otoriz li ozordi. Mersi Mr Chair.

MR SPEAKER

Mersi. Wi Onorab oule adres sa pwen.

HON SEBASTIEN PILLAY

Wi Mr Chairman. Mon krwar i, i byen ki pe ganny dir me selman nou napa sa bann konplikasyon aköz son term sa, sa larzan se en sibvansyon. E kontrol pou *disburse* sa sibvansyon i toultan reste avek sa dimoun ki pe donn sa sibvansyon e se Minister Finans.

Sa ki enportan selman se ki lefe ki *LGB* son Gouvernman in dakor avek sa ki'n ganny dir, son Gouvernman i bezwen *post-haste* letan nou sorti Lasanble, fer sorti en *Policy document* ki dir "la, la *in regards to* sa sibvansyon la, la ki zot pe dir."

Koumsa *no one* i kapab vin dir apre ki Gouvernman in, in i pe zwen en kouk avek zot. *I think it has to be done as soon* ki nou fini ek Lasanble.

MR SPEAKER

Minis.

**THE DESIGNATED MINISTER
JEAN-FRANCOIS FERRARI**

Wi non mersi Mr Speaker. I pa zis nou Gouvernman li. I ou Gouvernman tou. Non, ou'n dir son Gouvernman, so en Gouvernman pou nou tou sa.

(APPLAUSE)

MR SPEAKER

Ale annou pas lo la.

**THE DESIGNATED MINISTER
JEAN-FRANCOIS FERRARI**

So, so mon pa konnen. Enn bann keksoz ki mon'n war, en pratik ki nou annan parey ler ti nou, nou ti vot pou *FA4JR*, nou ti mete dan Bidze "*it's for salary support.*"

Ler nou vot pou *13th month IOT workers gratuity* nou mete ki son *purpose*, ok?

E avek *Air Seychelles subventions to Air Seychelles* i pa devret *for salary support*? Konmsi mon pe zis dir sa. Wi konmsi zis pou fer sir poudir i osi *for salary support and whatever*, ok?

Donk sa i enn mon en be dan sa ka si *Leader* Lopozisyon in dakor e nou isi lo *panel* nou'n dakor, mon krwar nou kapab *proceed*. E ou ti anvi met en keksoz dan - ou ti anvi dir en keksoz spesifik ki antre dan *verbatim* Lasanble Onorab?

(Off-mic)

**THE DESIGNATED MINISTER
JEAN-FRANCOIS FERRARI**

In fini antre.

MR SPEAKER

In fini antre wi. Wi Onorab Georges.

HON BERNARD GEORGES

Efektivman Mr Chair in fini antre dan *proceedings* Lasanble. Me sa ki Minis fek dir i en pwen enteresan. Akoz sa i dan *proceedings* Lasanble.

Me sa *Bill* ki nou pe pase i met zis *Air Seychelles*. E mon demann mwan si avek ou permisyon mon pa devret propoz en amannman avek sa latab lo pti paz 36 anba *heading "subvention to public enterprises, Air Seychelles."*

Propoz en amannman avek ou permisyon anba *Standing Order* ki permet mwan fer en amannman ki pa sibstansyel.

And that is Order 72 fer en propozisyon pou *amend the sa premye item anba "subventions to public enterprises"* kot i met '*Air Seychelles*' azoute apre sa *in brackets (for salary support)*.

Mon krwar sa ti ava pli apropiye *at least* i a antre dan *Bill*. Donk Mr Chair avek ou

permisyon anba *Order 72 (1)* anba *proviso 72 (1) Standing Orders* ki dir "*provided the Chairperson may relax this provision*" setadir 72erdtan "*in favor of simple amendments or emergency Bills,*" mon propoze ki anba "*subventions to public enterprises*" lo paz 36 of the *Schedule* anba premye *item* kot i met *Air Seychelles to add the following words in bracket – open bracket {for salary support}*."}

MR SPEAKER

Mersi. Nou a ganny en segonnman. Eskiz mwan *PS Thesee* i le fer en remark avan.

PS DAMIEN THESEE

Mersi Mr Chair. Zis pou note ki i annan de lasistans anba sa *line*, 103milyon pou saler apre i annan en 30milyon ki tou le lannen nou donn li as son *subsidy*.

MR SPEAKER

Wi Onorab Georges.

HON BERNARD GEORGES

Mon pa anvi al ladan Mr Chair akoz i pe ouver en laport. Annefe nou'n demande avan ki ou depans sa 30milyon *come back here* e nou ava fer nou ava donn ou en Lotorite spesyal pou sa sonm larzan e nou ava

ring-fence li pou sa *purpose*.
Mersi.

MR SPEAKER

Wi so oule *secure* sa 103milyon
ki pou saler *salary support*.

HON BERNARD GEORGES

Wi nou pe vot tou le 133milyon,
me nou pe otoriz peyman zis
103 pou le moman, dapre bann
kondisyon ki mon'n lir e ki
mon'n met dan *record*.

MR SPEAKER

Wi *ok*. Mosyon *LGB* ava ganny
segonde. Wi Onorab Pillay wi.

HON SEBASTIEN PILLAY

Mon krwar ki *LGB* i le
abundance of caution mon
konpran li. Me selman sa ki i
pe fer i riske met nou dan
problenm. I riske met nou dan
en problenm akoz la nou pe fer
en prosedir, me sa ki *PS* Finans
in dir vizavi pouwar *PFM Act*
sirtou par lefe ki sa i en
sibvansyon mon krwar i ase
pou kouver.

Akoz ou pe sey nou pe sey
tir sa bout 30milyon - mon
konpran ki ou pe sey fer. Mon
konpran. Me selman petet i
riske pe met nou dan en
sityasyon kot nou tou nou
konnen poudir lotorizasyon pou
depanse *once* nou'n vot sa Bidze
nou napa annan kontrol lo la.

So mon krwar petet ou
devret konsider sa pwen. Mon
krwar *PFM Act* i ase pou kouver
nou. E finalman Gouvernman
li i annan son sa. E mon krwar
petet sa ki devret ganny fer se
Gouvernman i devret annan en
lagreman ek *Air Seychelles*, ki
ava fer ki sa i kler vi ki *Air
Seychelles* i en konpanyen
anba mon krwar *Companies
Ordinance Act*, si mon pa
tronpe.

Koriz mwan si mon mal.
Si en konpanyen *then* i ava
annan en lagreman ki ganny
sinyen ant Gouvernman avek
Air Seychelles an relasyon avek
sa larzan ki mon pe donn ou, e
sa i ava *ring-fence* li pli for
ankor ki personn pa pe kapab
touse dan sa konteks.

Mon pa konnen si ou
konpran mwan akoz mon en pti
pe enkyet ler en dimoun pou vin
gete e en dimoun ki entelizan
ler i pou get prosedir Lasanble,
i pou war poudir sa zafer
Lasanble, pou donn permisyon
pou refer pou re depans larzan
i pa en keksoz ki'n ekri
anywhere.

So sa i kapab vin en
problenm pou nou. Mersi Mr
Chair

MR SPEAKER

Wi *LGB* pou adres sa. Me
selman en kestyon ki'n leve pou

mwan lo pwen Onorab Pillay. Se ki eski sa *wordings* in kapab dan Bidze to *begin with?* Ki letan nou konsidere si nou pe konsider sa sibvansyon” i va zis pou *Air Seychelles blank*” me “pou *Air Seychelles salary support.*”

Eski PS Thesee ti’n kapab ekri Bidze avek sa *wording* oubyen sa i en kestyon obtis? Wi Onorab Georges.

HON BERNARD GEORGES

Mersi Mr Chair. Mr Chair mon pa pe propoze ki nou vot zis 103milyon mwan, mon pe propoze ki nou vot tou le 133milyon. Me eski, mon pa anvi- mon pa anvi dir sa ki mwan mon pe al dir. Eski mon kapab koz *off-mic* pou eksplik zot mon pa anvi ki i al lo *record*.

MR SPEAKER

Si i nesaser wi.

(technical adjournment)

HON BERNARD GEORGES

Ok wi, wi Mr Chair mersi pou sa *technical adjournment* ki ou’n donn nou. E sa in permet nou reflexir en pti pe lo sa pwen. Mon *withdraw* sa propozisyon pou mwan met dan *budget* dan *Schedule* sa trwa mo “*for salary support*”

Mon pe retir sa pou pa, pou pa annan okenn problem.

MR SPEAKER

Ok byen. Be avek sa nou kapab vot lo Bidze pou *Subvention to Public Enterprises* ki dan seksyon 2 paz 36 pou en total R220milyon 788mil.

Manm ki vot pou lev lanmen silvouple? Wi okenn Manm ki kont? Tou Manm in vote. Mersi. Bon Bidze pou *Subvention to Public Enterprises* dan seksyon 2 paz 36 pou en total R220milyon 788mil in ganny 33 vot pour, 0 kont e 0 abstansyon. Alor Bidze in aprouve par Lasanble.

Well nou zis lo pwen 4er nou annan de antite ki nou pou pran ankor ozordi. Me selman nou a pran en poz la e nou a retournen 4er30. Mersi e nou a orevwar e mersi Mr Tirant akoz i pa pou la ek apre *break*. Mersi.

(BREAK)

OTHERS

MR SPEAKER

Bon nou a pran en pti seksyon la ki annan de laliny ladan ‘*Others*’ seksyon 2 paz 38 pou en Bidze R34milyon 936mil. E osi *Development Grants to*

Public Enterprises lo paz 39 pou en Bidze R180milyon 841mil.

Wi Onorab Gill ou kapab konmanse.

HON CHURCHILL GILL

Mersi Mr Chair. Mon kestyon i lo sibvansyon pou bann organizasyon enternasyonal - *subscription rather*. I annan 3an depi ler i annan en alokasyon R31milyon.

Dan sizyenm Lasanble mon'n deza leve sa, kot mon'n dir eski tou sa bann lorganizasyon enternasyonal ki nou pe peye eski tousala Sesel i santi i pe benefisye avek e eski zot ankor relevan?

Mon war pou 2021, nou ankor fer provizyon pou menm sonm, eski nou sa letan mon ti, mon ti demande ki nou fer en revizyon, pou nou war si vreman nou pe benefisye pou sa kantite larzan ki nou pe peye?

Sa letan nou ti ganny dir wi nou a ganny fer? Mon kestyon si *PS* i annan lenformasyon si sa legzersis in konmans fer, oubyen si in konmans fer ki zistans i ete.

Akoz mon omwen si i kapab dir nou si tou sa bann lorganizasyon ki nou pe peye anba sa vot, i ankor relevan pou Sesel e Sesel i ankor pe benefisye avek?

Mon dezyenm kestyon se vi ki i annan ogmantasyon dan pri *foreign exchange*, mon war sonm i parey, eski nou pou fer sa bann peyman pou sa bann lorganizasyon an *currency* respektif ki pei zot ladan? Se sa mon de kestyon.

MR SPEAKER

Mersi Onorab Gill. *PS* Thesee.

PS DAMIEN THESEE

Mersi Mr Chair. Annefe sa legzersis i pa enn ki'n fini konplete, anvi difikilte pou ganny bann langazman bann Minister pou deside lekel sa bann *subscription* ki enportan pou zot.

E bokou zot i annan kekfwa milti lorganizasyon ki zot *subscribed to*. Isi en difikilte fer bann Minister *let go of*. So sa difikilte ki nou pe gannyen avek. E rezon ki nou'n dir Bidze sanmenm sonm *even though* ou annan sa depresyasyon dan Roupri se prezizeman se pou pous en pe sa legzersis pou ganny fer.

Nou ti fer en dernyen sesyon lannen pase, tar lannen pase avek Departman Zafer Etranzer lo la. Me selman *still* i ankor o. Me parkont i bon note i annan bokou bann lorganizasyon ki otomatikman

ler ou zwenn enn, ou bezwen zwenn larestan ki vini.

Parey *UN* oubyen *SADC* oubyen *EU* ki dek ki ou zwenn *the main organisation* dan bann *affiliated organisation*, ki ou zwenn avek ki otomatikman fer ou bezwen kontinyen peye.

Sa ki ou war nou pa'n fini. Alor lapel ki nou pe met devan, se pou bann lorganizasyon selman swazir son bann lorganizasyon ki vremen kritik pou li e si i war i annan diferan lorganizasyon ki pe afilye avek, *then* petet i swazir lekel son priyore. Mersi.

MR SPEAKER

Byen. Onorab Gill wi.

HON CHURCHILL GILL

I annan enn konsernan peyman si dapre ki kalite *currency* ki i servi. Mersi.

MR SPEAKER

Mersi. Wi *PS*.

PS DAMIEN THESEE

Mersi Mr Chair. Son *currency* i pou baze lo ki sa lorganizasyon i sarz ou ;- i kapab Ero, Dolar, *Pounds* dapre lokasyon osi sa lorganizasyon.

E i annan serten *payment plan* ki nou'n tonm dakor avek serten, akoz avek sityasyon *COVID* mon krwar zafer

etranzer in ekri serten lorganizasyon, pou demann en rediksyon dan kotizasyon. Me malerezman sa i pa en keksoz ki bann lorganizasyon in dakor.

So par egzantp *EU* nou annan en *payment plan* ek li, e li osi i annan en *increase* dan kotizasyon ki in konmans sarz Sesel. E nou'n fer en *payment plan* 3an pou sey kapab kouver en pe sa sonm ki nou kapab peye *upfront*. Mersi.

MR SPEAKER

Minis wi.

**THE DESIGNATED MINISTER
JEAN-FRANCOIS FERRARI**

Wi mersi Mr Speaker. Mon pran sa lokasyon pou mon re ensiste lo sa pwen ki *PS* in fek fer. In annan *COVID* lannen pase nou pa'n kapab met pey tou tou bann lobligasyon.

Nou'n fer *payment plan*, napa enn sa lorganizasyon ki'n dir avek nou ou kapab reste dan nou lorganizasyon pa bezwen peye. Napa ki'n dir !

Ler ou annan en lobligasyon parey ler ou annan en Kontra ou pe lwe en landrwa, ou pe pey en lakaz ou bezwen peye! Ki i lokal, ki i enternasyonal, konmsi se sa, sa mesaz ki nou ti a kontan fer pase pou ki tou dimoun i annan son responsabilite e i konnen

kot son responsabilite i ete.
Mersi.

MR SPEAKER

Mersi tre byen. Onorab
Cosgrow.

HON WALLACE COSGROW

Mersi Chair. Chair de pti
kestyon enn konsernan
“*international organisations*” i
annan en lot laliny par anba ki
appl “*capital subscription*”.
Mon ti a zis kontan en pti
leksplikasyon lo ki sa i entail?

Apre lo *Development
Grants* nou war ki *PUC* son
Bidze, son Bidze pou
Development Grants in sorti
61milyon pou vin 40milyon
anvi nou konnen sa kantite
capital project ki *PUC* i fer.

E *PUC* i en lorganizasyon
gouvernmental e bann proze ki
i fer i benefisye pei pep Seselwa
pou distribye elektrisite, delo e
*sewage network across Mahe,
Praslin, La Digue*.

So akoz sa diminisyon dan
sa alokasyon? E eski zot pe
anvizaze ki i annan serten
difikilte pou *PUC* termin son
bann proze? Mersi.

MR SPEAKER

Mersi Onorab. *Panel* wi *PS*.

PS DAMIEN THESEE

Mersi Mr Chair. Lo ‘*capital
subscription*’ sa i plizoumwen
tous si Sesel pou aste serten
shares dan serten
lorganizasyon. Par egzanp *TDB*
ki nou annan poursantaz ladan
si nou anvi ogmant nou *share
holding* ladan nou kapab aste.

E pou 2020 par egzanp si
napa okenn depans anba sa
laliny e pou 2021 i zis en
provizyon *in case* nou annan.
Par egzanp 2019 osi fer peyman
pou *Afri Tax Out*, sa i en brans
IMF dan rezyon Losean Endyen
ki donn *training* lo *PFM* zesyon
finans piblik.

E ki Sesel i aktivman
involve avek. So i zis en
provizyon pou, pou lenstan an
ka i annan demann ki vini. E lo
sa mon krwar nou pe tous
“*Others*” la zis pou le moman
nou ava tous sa *issue PUC* ler
nou ariv anba. Mersi.

MR SPEAKER

Mersi. Onorab William.

HON WAVEN WILLIAM

Mersi Mr Chairman. Mon ti a
kontan demann avek *PS* si i
kapab eklersi sa en pti pe pou
nou, an menm tan avek
lenformasyon Manm Lasanble
avek piblik, letan nou pe koz sa
alokasyon pou *payment “under
subscription to international*

organisations” eski sa fon i baze kot Minister Finans?

E si bann diferan brans gouvernans ouswa bann lezot MDAs zot anvi fer serten demann, baze lo lenportans zot partisipasyon, si i kapab eksplik en pti pe prosedir? Mersi.

E dezyenmman anba sa lot *heading*, mon ti a kontan osi si zot ti kapab eklersi nou en pti pe ki sa i sinifi sa sa *heading* la? Mersi.

MR SPEAKER

Mersi Onorab. PS.

PS DAMIEN THESEE

Mersi Mr Chair. Prosedir pou zwenn okenn lorganizasyon enternasyonal, se ou bezwen apros Departman Zafer Etranzer, akoz li ki *hold* sa *portfolio*.

E apre sa mon sipoze ou bezwen aprouvasyon Konsey Minis, an vi ki i pe fer ki Sesel pe zwenn en lorganizasyon enternasyonal. So zafer etranzer swivi par pou fer son *assessment* pou gete lo benefis ki nou bezwen zwenn sa lorganizasyon.

E apre la nou ganny laprouvasyon Konsey Minis. E mon sipoze si parey Lezislatur avek Zidisyer osi, an vi ki son lotonomi as brans Gouvernman

i en pe pli fleksib pou li konpare avek bann Lazans Gouvernman ki bezwen laprouvasyon Konsey Minis.

E dezyenmman sa “*capital subscription*” parey mon’n fek eksplike li i plizoumwen si nou anvi aste *shares* dan serten bann lorganizasyon ki nou form par. Par egzanp *TDB the Trade Development Bank* ki lannen ki’n vini ki zot in vann.

Me selman pa tou kou ki nou aste, akoz nou pa neserman kapab *afford* sa bann peyman *shares* ki nou annan. E nou osi fer peyman pou *Afri Tax Out* parey mon’n eksplike, ki en lorganizasyon baze *Mauritius* - en brans *IMF* ki fer bann *capacity building* pou *PFM* seksyon zesyon finans piblik, ki nou peye ladan.

E an 2019 ti annan bann peyman parey nou ti fer pou en *African Training Institution, then for international settlement* e *African Development Bank* anba *ADB* osi tou, pou bann 7 *installment* ki zot bann diferan fasilite ki zot annan ankour. Mersi.

MR SPEAKER

Mersi PS. Onorab Aglae.

HON EGBERT AGLAE

Mersi Mr Chair. PS ouswa Minis zis ki mon anvi konnen

anba sa bann afilyasyon ek sa bann lorganizasyon enternasyonal la, si tou nou *actively* akoz nou pe peye? Me selman pa zis peye selman ou bezwen partisipe tou, si i annan rapor ki ou bezwen soumet si ou bezwen al reprezante eski tou nou pe aktiv ladan?

Dezyenm se sa antite ki responsab pou pey sa bann lorganizasyon enternasyonal. Mon konnen poudir *Foreign Affairs* a en pwen li se li ki pe, se li ki zere pou fer sa peyman.

Parey avek Lasanble avek bann soumisyon ki nou annan SADC lot, lot, me selman ti annan serten konsern ki ti ganny poze oparavan akoz ti annan bann dele ki souskripsyon pa ganny peye.

E i koz en konsern ler sa lorganizasyon i al reprezant enternasyonal, i al aprann poudir be ou pei pa'n peye? Eski tousala in ganny ankadre byen pou fer ki *as and when the due date is*, sa lorganizasyon sa pei, i ki sipoze pe peye i konnen poudir be mon'n fini peye mon bann keksoz. Mersi.

MR SPEAKER

Minis wi.

**THE DESIGNATED MINISTER
JEAN-FRANCOIS FERRARI**

Mr Speaker larepons pou premye parti kestyon se ki i annan gran lendikasyon ki pa tou bann lorganizasyon ki nou'n pran en *membership* ladan ki nou aktiv.

E se pou sa ki *PS* in dir ki nou pe fer en revi, pou nou gete akoz i kout ser. *I mean* R31milyon *it's-* i pa lsou. E alors i enportan ki nou, nou gete lekel ki nou pe aktiv ladan sa legzersis pe ganny fer.

E la avek enn bann loportinite ki *COVID* in donn nou se pou, se pou war ki nou kapab parler partisip dan bokou *forum* san ki nou, san ki nou, nou bezwen deplase san ki nou bezwen antre konman en *full member*.

Nou kapab aprann nou kapab zot ofer loportinite pou nou partisipe menm ler ou pa lo en *full membership*. Donk i annan sa bann nouvo loportinite ki pe arive e Lasanble Nasyonal osi mon mazine a en serten moman zot a fer en *assessment*, lekel bann lorganizasyon ki vreman vo lapenn.

E lekel ki nou kapab dispense pou le moman. Mersi.

MR SPEAKER

Mersi. *PS* pou azout keksoz.

PS DAMIEN THESEE

Mersi Chair. Ankor lo premye kestyon son lefikasite ;- par egzantp ennler ler ou get sa bann zistifikasyon pou sa bann kotizasyon, ou war ennler son sel benefis se sa lorganizasyon i *attend* en miting par lannen.

Sanmenm sa ki ennler nou met devan Minister si ou pe *attend* en miting par lannen ki benefis ou pe vremen gannyen ;- si ou pa pe ganny *capacity building* si i pa pe donn ou tro gran benefis so napa *point* ou ladan, ou *might as well* sorti.

Oubyen dezyenmman si ou dan sa lorganizasyon ou natirelman ou forse reste dan en lot, par egzantp si ou get *EU* par egzantp ou annan *the EU Peace Fund* osi petet nou pa vremen nesedit en kontribisyon dan en *EU Peace Fund*.

Me selman ou *membership* avek *EU* son Konstitisyon i fer ki otomatikman ki tou Manm i osi bezwen kontribye dan sa *Peace Fund*. So sa i enn bann dilenm ki nou annan.

E dezyenmman nou war osi lo *settlement* bann *invoices* ;- *invoicing* i en *issue*. Bokou fwa nou pa pe ganny sa *invoice* atan osi ek sa bann lorganizasyon. Akoz prosedir se tou bann *invoice* i bezwen al kot *Foreign Affairs*, ki li i verifie ki nou

officially part of sa bann lorganizasyon.

E osi pou li kit son rikord azour, pou konnen lekel ki nou drwa lekel ki nou pa drwa e nou, nou zis fer peyman.

Be nou annan *issue invoicing* ki bokou fwa sa bann landrwa pa pe neserman donn nou sa bann *invoice* azour pou nou peye.

E lannen pase osi avek sityasyon osi mannyer i ete i annan serten pozman ki'n ganny mete avek peyman sa bann kotizasyon kot *Foreign Affairs* in ekri laplipar bann lorganizasyon pou sey demann zot en *payment plan* oubyen en rediksyon dan *fees*.

Me natirelman laplipar zot pa'n dakor pou fer okenn rediksyon. Mersi.

MR SPEAKER

Mersi PS. Onorab Pillay.

HON SEBASTIEN PILLAY

Mersi Mr Chairman. Mr Chairman mon krwar lamazorite kestyon ki'n ganny demande mon krwar PS in nobou eksplike lo sa *head*.

Me selman sel keksoz mon ti a kontan demann avek PS Finans sa travay ki'n konmans fer vizavi sa bann *subscription* i bezwen travay ki'n akoz i pa fer premye kwa ki Lasanble in *raise*

sa kestyon in deza arive la avan nou *raise* sa kestyon.

Eski *mid-year* nou pou ganny en apersi ankor lo- zot pou kapab donn nou en apersi lo kote zot ete avek bann revizyon ki zot pe fer vizavi sa bann *subscription*? Mersi Mr Chairman.

MR SPEAKER

Mersi Onorab. *PS* ou adres sa.

PS DAMIEN THESEE

Mersi Mr Chair. Wi nou pa pe bouz ase vit lo sa legzersis si ou gete. Akoz *total contribution* ki nou annan i 48milyon total. Baze premye legzersis ki tou ti annan apepre 52milyon.

So nou war anvi serten plizoumwenn rezistans Minister pou pa kapab neseserman deside si zot anvi sorti oubyen nesesite pou zot sorti i fer ki i difisil.

So mon sipoze nou ava donn progre kot nou'n arive *mid-year* avek sa legzersis parey ou'n demande. Mersi.

MR SPEAKER

Mersi *PS*. Byen avek sa nou ava *move* lo vot. *PS* eski ou bezwen ki nou vot lo sa de laliny separe oubyen nou fer tou lede ansanm, separe en ? Byen.

Ok premye vot lo Bidze pou '*Others*' dan seksyon 2 paz

38 ki pou en total R34milyon 936mil. Manm ki an faver lev lanmen silvouple? Mersi. Okenn Manm ki kont? Byen.

Vot lo Bidze pou sa '*Others*' lo paz dan seksyon 2 paz 38 pou en total R34milyon 936mil in ganny 31 vot pour, 0 kont e 1 abstansyon. Alor Bidze, Bidze in aprouve par Lasanble. Mersi.

DEVELOPMENT GRANTS TO PUBLIC ENTERPRISES

MR SPEAKER

Nou a pran kestyon Manm lo *Development Grants to Public Enterprises* ki mon fek lir.

Wi Onorab Uranie ou kapab konmanse.

HON ROCKY URANIE

Mersi Mr Chair. Bonn apre midi ankor *DM* ek *PS*. *Minister* Digwa i soufer bokou avek koupir elektrisite. Ler i annan *peak season* kot bokou touris i lo zil, nou war ki sa i kre lanbarasman pou nou dimoun lokal bann operater dan lendistri touristik e pou bann touris zot menm.

Mon war ki i annan en provizyon 40milyon dan Bidze pou *PUC*. Eski zot kapab dir nou ki plan nou nouvo Gouvernman pou ed *PUC*

delivre en meyer servis lo La Digue? Mersi.

MR SPEAKER

Mersi Onorab. Lekel, Minis oule adrese.

**THE DESIGNATED MINISTER
JEAN-FRANCOIS FERRARI**

Mersi Mr Speaker. Mon riske napa tou bann repons pou, pou keston Onorab Uranie. Me mon konnen ki i annan plizyer, i annan plizyer proze ki *PUC* i *involve* ladan La Digue e notaman proze drenaz proze *waste water treatment* sa i en proze ki vreman, ki vreman en pe letan i pe ganny i anrout.

Me bann lotorite pe fer fason pou, pou fer li ariv a en ariv a en *completion* ase rapidman. Nou konnen osi Onorab ki pou an sa ki konsern elektrisite pou le moman, zenerasyon elektrisite i sorti Praslin.

E nou'n ganny difikilte avek bann, bann kab elektrik soumaren e i en problem ki'n ariv detrwa fwa e ki nou pe rod en solisyon en pe pli lonterm.

E proze ti pe al demare la me en aksidan in arive parey ou konnen avek en roulo kab esansyel ki'n met retar. E ki *PUC* in anonse ki sa proze pou war son lafen lannen prosenn selman.

Alors sa se de proze mazer ki annan. E nou espekite ki ler sa de proze i ava konplete, i ava fer lavi bann, bann biznes lo La Digue enpe pli an sekirite. *At least* ou konnen poudir ou kapab *rely* lo bann servis *PUC* dan en fason en pe pli meyer. Mersi Mr Speaker.

MR SPEAKER

Mersi Minis. Onorab Esparon.

HON REGINA ESPARON

Mersi Mr Chair. Mr Chair mon pe regarde la lo *local Grant* la ti annan en sonm 61milyon lannen pase sa lannen mon war zis 40milyon akoz sa rediksyon?

Mr Chair i annan, i annan bann *issue* ki kontinyen vin a nou latansyon kot *PUC* en *issue* se *mismanagement of funds*. Mon menm annan travayer ki'n apros mon pou demande ki Minister Finans vin en kou kot *PUC* vin gete ki pe pase.

Akoz zot santi ki i annan en kantite koripsyon ki i pe vire *around* zot travay, ki zot pa kapab dir nanryen pangar zot a ganny pouse. Petet *PS Thesee* ou ava fer en komanter lo la.

Dezyenmman i kontinyen annan sa *issue* kot *PUC* i vini i plant en (pye elektrik) - en poto elektrik dan milye en propriyete, apre letan sa

dimoun pou tire letan sa dimoun i demande pou tire i bezwen pey en gro sonm R21mil, R37mil an montan.

Zot mete zot pa demann permisyon, me apre ler pou zot tire ler sa dimoun pe al fer son konstriksyon pou tir sa pou anlev sa poto, i ganny demande pou pey en gro sonm larzan. Petet en pe leklersisman lo la. Mr Chair mersi.

MR SPEAKER

Mersi. Likel ki adres sa. Minis.

**THE DESIGNATED MINISTER
JEAN-FRANCOIS FERRARI**

Wi Onorab. Pou ou dezyenm kestyon sa size in lev, in lev tre souvan dan Lasanble menm ler mon ti la. E Gouvernman in aktyelman sey rod en solisyon pou sa. E i parler i mank konsiltasyon ant PUC ek bann propriyeter later e sa i domaz.

Lanfaz ki Gouvernman pe mete se ki sa prosesis konsiltasyon i mars pli byen. PUC i annan en *unit Customer Care* avek *Customer Liaison* ki devret pe mars pli byen ki i pe marse pou le moman.

E i regretab ki sa bann sityasyon i ankor pe arive. Me selman sa bann sityasyon i souvan bann ki dat en bon pe lannen. Dernyerman mon'n ganny mon'n fer fas avek sa

kalite sityasyon e dan mon enteraksyon avek PUC zot in dir mon poudir wi-wi sa dan lepase sa ti ariv tre, tre souvan me la i annan mwens sa.

So nou ava kontinyen met presyon lo PUC pou fer ki i annan konsiltasyon pli pre avek bann zabitan ler sa keksoz pe arive. Mon pa konnen si PS ti annan, ti annan repons lo ou premye bout kestyon.

MR SPEAKER

PS ou a adrese ?

PS DAMIEN THESEE

Mersi Mr Chair. Bon anvi nou sityasyon la pou 2021 nou war li neser pou nou fer rediksyon a son alokasyon, ki nou ti pe donn li konpare avek bann lannen avan. Ou a war ki 2022 parkont nou'n remet ankor sa alokasyon sa 60milyon.

Akoz nou bezwen *bear in mind* osi ki bann proze PUC sa bann proze kapital i kout bokou. Si nou mazin bomaten nou'n sey aprouv Bidze anba "*Net Lending*" kot i annan apepre pros R500milyon ki al atraver bann *loan* ki *on land* pou PUC.

So nou pa kapab neserman kapab *match* sa bann *extend* sa bann *loan*. E parey ou'n dir nou osi santi ki i annan bann mezir ki PUC i

bezwen fer lo li menm bann *cost saving measures* ki i bezwen kapab sey fer swa lo rediksyon son bann transpor lo son size li menm ki i été. Eski son model i en keksoz ki ankor efektiv.

So sa i bann *review* ki zot bezwen fer e sa i pou en keksoz ki *Public Enterprise Monitoring Commission* - mon pa *aware* ki in deza annan okenn revi lo zot, pou le moman in touzour *about Air Seychelles* oubyen *SPTC*.

So dan lefitir fodre *PEMC* i met sa lo son *audit plan* pou li antre laba pou li gete, si i en lorganizasyon ki i pe *operate efficiently*. Mersi.

MR SPEAKER

Mersi *PS*. Onorab Cosgrow.

HON WALLACE COSGROW

Mersi Mr Chair. Mr Chair zis pou mon repran lo mon kestyon pli boner aköz *PS* i dir letan nou ariv lo sa *head* pou nou pran. Konsernan *PUC* son *Grant* pou sa lannen i 40milyon nou'n war poudir pandan sa dernyen 3an 40milyon ler mon pe get pou *next* de lezot lannen i pou ankor 60milyon.

Akoz sa *drop* dan sa alokasyon sa lannen? E anvi bann proze kapital ki *PUC* i annan, tre enportan pou pei pou distribisyon delo, elektrisite ek *sewage*. Eski zot

pa krwar ki sa i kapab afekte delivre fason ki *PUC* i delivre son *capital projects*?

Apré zis poudir *PS* poudir *PEMC* si mon pa tronpe lannen pase ti antre dan *PUC* pou fer en *audit* lo *PUC*, so petet sa bann rezilta i ava sorti tre byento.

Apré dezyenm Mr Speaker en kestyon ki'n *arise* an term *Grants* mon pe gete petet i pa anba sa laliny me *Grant* pou lopital La Digue kote i tonbe eski i *feature* ladan dan sa Bidze ouswa *elsewhere*? Mersi bokou Mr Speaker.

MR SPEAKER

Mersi. *Panel*, Minis ou adrese wi.

THE DESIGNATED MINISTER JEAN-FRANCOIS FERRARI

Bonzour, (mon konmans fatigue.) Mersi Onorab Cosgrow pou ou kestyon. Mon krwar premye kestyon in sete menm kestyon ki Onorab Esparon in demande.

E *PS* in eksplike ki pou balans sa bes sorti 60milyon pou ariv 40milyon in ganny balanse par lefe ki i annan pros R500milyon bann "*Net Lending*".

Akoz Gouvernman napa, napa plis ki sa, sa lannen. Parey zot konnen pa reste bokou larzan dan kof e nou'n

kapab rod sa *bear minimum* ki *PUC* in demande, pou zot kapab termin detrw a zot bann lezot proze. Donk sa i leka pou *PUC*. Ou dezyenm kestyon sete?

Wi lopital La Digue nou'n fini vote Bidze Lasante oubyen ...? Wi be se sa alors in pase bann *capital projects* in fini pase. Mersi.

MR SPEAKER

Mersi. *PS* napa nanryen pou azoute la. Mersi *ok*. Nou a kontinyen Onorab Andre.

HON CLIFFORD ANDRE

Mersi Mr Chair. Mr Chair mon pe, mon pe get dan sa *heading* i met "*Development Grant*"s selman ler nou get *SPTC* i annan *loan Grants* menm *PUC* anba i annan *foreign loan Grants*.

Konmsi zis pou eklersi nou *PS* pou nou konpran si son *heading* i *Grants*? Akoz *Grants* normalman larzan ki i donn ou, ou pa rann i donn ou en kado me *loan* ou bezwen rann, so mon oule en leklersisman lo sa ?

Aprè letan nou get lo paz 39 i annan *PEMC* i annan 62milyon ki'n mete, me selman taler nou ti aprouv dan *social programme* i annan *PEMC Loan Repayment Scheme* ki 15milyon.

Konmsi pou nou konpran oubyen pou dimoun konpran osi, akoz i annan enn si i tonm anba programm sosyal ki Gouvernman ki pe repeye pou serten dimoun, oubyen ki mannyer i pe marse? Mersi.

MR SPEAKER

Mersi Onorab. *PS*.

PS DAMIEN THESEE

Mersi Mr Chair. Sa laliny i apel *Development Grants to Public Enterprise* ;- savedir i larzan ki sorti dan Bidze pou donn bann *SOEs*. E sa *loan/Grants* nou fer provizyon an ka i annan.

E pou sa ka la *SPTC* sa sonm ki ou war la i pou kouver anba sa *Indian line of credit* ki nou pe fer provizyon pou *SPTC* aste 55 bis. So nou bezwen rikord li anvi ki larzan in ganny donner ek Gouvernman apre nou donn *SPTC*.

E *SPTC* pa rann nou sa enn kekfwa *on land so i from the budget granted to the SOE*.

Dezyenmman lo *PEMC* nou a war sa larzan i la preski tou le lannen son diferans avek "*social programmes, ek social programmes* sa pe ganny sibvansyonnen pou bann endividi ki pe pran bann *loan*.

E Gouvernman i *subsidies* li. Sa ki la detrw lannen pase nou a rapel Gouvernman ti

pran bann fasilite avek *Nouvobanq e Pension Fund* ki pou nou akseler bann proze lakaz. Nou ti napa ase larzan dan *capital budget* nou ti pran bann *loan* ek sa de lenstisyon pou nou finans en pe plis bann proze lakaz ki nou annan.

E nou osi i annan apepre 10milyon ki tou le lannen nou donn *PEMC* pou fer zot bann *roofing works* oubyen bann reparasyon lo lakaz oubyen bann travay lo bann *STPs* ki zot annan. Mersi.

MR SPEAKER

Tre byen. Onorab William.

HON WAVEN WILLIAM

Mersi Mr Chairman. Mon ti anvi demann *PS* si anba sa *foreign Grant* la. *SPTC* ti annan sa lanons poudir pou annan 10 *electrical buses* pou deservi Victoria ziska Anse Aux Pins eski sa bann bis dan sa 55 ki zot pe fer vini wi ouswa non?

Epi dezyenman vizavi *PEMC* sa 62 ekek milyon ki dan Bidze la sa i prensipalman i pou bann reparasyon kot bann lakaz Gouvernman pirman pou reparasyon sa? Mersi.

MR SPEAKER

Mersi. *PS*.

PS DAMIEN THESEE

Mersi Mr Chair. Premye lo *SPTC* sa i pirman anba *Indian line of credit* pou sa 55 bis ki nou'n fer provizyon anba la sa 10 bis ti sipoze pe ganny finanse par Gouvernman Lasin. E mon pa okouran son *status* i mon *aware* i annan serten *delay* lo la.

Lo sa *PEMC* selman 10milyon dan 62milyon ki alokasyon Gouvernman pou li fer reparasyon lo bann lakaz ek *PEMC*.

Sa diferans 52milyon parey mon'n dir i kouver sa de *loan* ki nou annan avek *Nouvobanq ek Pension Fund* ki nou ti pran detrwa lannen pase pou bann detrwa konstriksyon lakaz ki nou ti annan dan detrwa *estate* dan Mahe, oubyen 24/24 pou akseler en pe sa bann *capital projects* ki Gouvernman ki ti annan, me ki Bidze kapital pa ti ase pou nou kapab fer li.

E ler nou ti pran en *loan* i ti redwir en pe sa *load* ki ti annan lo *budget* pou bann *upfront payment*. Mersi.

MR SPEAKER

Tre byen. Onorab Aglae.

HON EGBERT AGLAE

Mersi Mr Chair. Minis mon kontan ou'n dir poudir kof i preski vid savedir i pa vid.

Minis ouswa *PS* an menm tan ou'n dir poudir ou pou get avek *PEMC* pou *PEMC*, pou zot kapab fer sir ki *PUC* i ganny zere *efficiently ok?*

So baze lo sa Minis akoz i annan de konponan i annan sa konponan "*Net Lending*" avek konponan *Grant* ki *PUC* i pou bezwen mon konpran i bezwen son proze.

So fas a sa bann *Master Plan* ki *PUC* i annan ki annan en koupir *sewage 33KV*, zot lo *water network* kan petet eski *PUC* li menm li nou kapab war li petet avek sa bann demann proze gro proze kapital pou zot kapab dir be *ok by* ankor dan 5an ouswa 10an, nou ava fini akonplir sa bann plan?

E la nou a *rely* plito lo *maintenance* sa ki egziste? Pou fer ki akoz *tax payers money* pe al bokou ver menm si i annan en konponan ki zot rann dan "*Net Lending*". Me selman nou ti a kontan sitye nou akoz depi sizyenm Lasanble nou pe war larzan pe ale pou *PUC*.

So donn nou en lide la si dan ankor 10an petet *PUC* i ava akonpli sa ki i sipoze pe fer, ouswa i pou plitar ankor i pou kontinyen *borrow, borrow and borrow*. Mersi.

MR SPEAKER

Minis wi.

THE DESIGNATED MINISTER JEAN-FRANCOIS FERRARI

Mersi Onorab. Onorab enn bann kontrent, kontrent ki *PUC* i annan se son kapasite pou li enplimante *in fact* i pa zis *SPTC*, i pa zis *PUC* sa. Tou bann Departman Gouvernman i annan, i annan difikilte pou, pou zot enplimant bann proze ki *online*.

E se pou sa ki nou pou war pandan sa 10an ki pe vini sa 20an ki pe vini, tou sa lannen pou annan en pe proze ki pou ganny fer. *Otherwise* si nou, si nou sey *front-load* li nou pou nou pa pou kapab, nou pa pou kapab reisi zot konnen poudir enn zot kontrent osi se *project management* bann dimoun ki spesyaliz dan sa domenn.

Alors *PUC* i bezwen, i bezwen *stagger* son bann proze devlopman. E, e an menm tan i bon akoz tou le lannen nou met en pe larzan dan Bidze pou fer pou, pou fer en proze oubyen pou konmans enn pou fini enn.

Alors i donn nou sa lespas pou nou respire. Alors mon pa krwar ou devret enkyet ler ou war lefe ki i annan proze toultan e pou annan toultan proze.

E ler sa bann pou fini pou annan lezot ankor ki pou vin *online* akoz nou pou bezwen al

get bann ki tro vye ranplase e kontinyen koumsa.

Alors i pou *ongoing* mon mazine toultan ki ki nou ankor vivan. Mersi.

MR SPEAKER

Wi Onorab.

HON EGBERT AGLAE

Mersi Minis. Zis petet pou ankor sitye nou dan sa plan sa *Master Plan* la ki pou etale parey ou pe dir *for so many years*, eski in annan en kou inisyal?

Petet ki nou bezwen *spread* li *for so many years*, eski *PUC* in soumet en Bidze inisyal sepa 1bilyon, 2bilyon eski in annan sa? Mersi.

MR SPEAKER

Mersi. *PS*.

PS DAMIEN THESEE

Mersi Mr Chair. *PUC* i annan son plan li e tou le lannen i prezant ek nou ler i sey negosye en Bidze avek nou, sa bann fasilite *loan* osi ki ganny pran i an konsiderasyon son kantite proze.

E petet sa i annan keksoz ki Lasanble i enterese, nou ava *share* avek zot e akoz mon pou napa ase detay ek mon la. E parey Minis in eksplike eski *PUC* son *extend* son bann

capital project i quite *extensiv*. e E parey Minis osi in dir ou pou bezwen *at some point* ranplas sa bann lekipman.

Parey nou konnen i annan de zenerater *at some point* i sipoze ganny ranplase. I annan bann nouvo proze pou bann *more energy efficient* sistenm, pou li kapab adopte so i pe kre keksoz kontinyel ki pou fer *over* bann lannen ki vini. Mersi.

MR SPEAKER

Mersi. Onorab Sandy Arissol.

HON SANDY ARISSOL

Mersi Mr Chair. Mr Chair mon ti anvi zis letan nou pe lo bann *loan*, lo bann depans ki nou pe fer, oubyen sa ki nou aprouve konman en Lasanble an relasyon avek bann lezot antite ki nou annan.

Par egzanp kot *SPTC* nou toultan osi fer referans avek bann servis osi ki zot rann. E nou konman bann reprezantan lepep, ki nou pou asire poudir servis ki nou dimoun i gannyen letan nou pe vot sa kantite larzan mon krwar i enportan.

Mon pe dir sa parske letan mon get *SPTC*, mon ti a kontan demann Minis Dezinyen kekfw ki la si lekip *Platinum* pe mazin revwar saler bis *SPTC* parske i kit 6er la?

Konmsi a lavenir anvi ki lekonomi i konmans *run* la Dolar mon krwar in ariv R17 personn pa oule, tou dimoun pe rod Roupi. So konmsi zis pou nou gete an mezir ki nou vot sa bann keksoz ki nou *SPTC* pou rann en bon servis Lepep Seselwa pou zot revwar en pti gin.

Parske 6er pa neseserman tou dimoun ki'n fini travay ouswa in fini ariv lo *stand so* zot mank bis ouswa i vin en kou an plis lo sa dimoun parske i bezwen war li pe pey en larzan pou li rod en transpor pou li al kot li. Sa i premye.

Dezyenmman mon kontan letan ou'n koz lo *PUC* taler an relasyon avek *customer care* lafason ki bann dimoun bann kliyan. Ou konnen avek sa zafer *bills* i ganny estimen i annan kantite nou dimoun ki'n en pe soufer, parske son *bill* pa neseserman i tonm parey letan sa dimoun i vin kot li.

So ou annan plizyer sa bann defi ki'n arive e sa tousala i vin en kou an plis lo sa dimoun. Be letan ou'n koz lo *customer care* Minis, mon krwar i enportan ler nou pe donn *PUC* nou fer konfyans *PUC* pou donn nou sa servis, mon krwar i enportan osi pou *PUC* koz ek son bann sa bann manmzel, sa bann madanm, sa bann

dimoun ki responsab sa bout *customer care* ki ou'n koz lo la.

Konmsi pou pa fer bann dimoun vin pli fristre an relasyon avek sa ki zot dir "ar ou *bill* ti kapab vin pli o." "La kontan ou'n ganny sa."

I pa kestyon mon kontan mon'n ganny sa, me nou kontan en pli bon servis se pou sa rezon ki nou vot tou sa kantite larzan pou zot pou asire ki tou nou dimoun deor, i ganny sa bon servis ki nou anvi. Sa mon pti komanter Mr Chair. Mersi bokou Minis.

MR SPEAKER

Mersi. Minis i ava adrese.

THE DESIGNATED MINISTER JEAN-FRANCOIS FERRARI

Mersi Onorab. Onorab mon krwar ki i en lobzektif Gouvernman pou dan tou son servis ki i ofer, ofer li avek en serten kalite kot i annan respe pou son kliyan.

Akoz finalman se zot e piblik an zeneral ki kliyan ki kliyan *PUC* e *SPTC* eksetera. Alors nou bezwen devlop sa kiltir, sa kiltir servis e nou pa devret de nou pa devret kontinyen avek en kiltir kot si mon demann ou en kestyon ou, ou ankoler. Konmsi mon napa drwa demann ou en kestyon.

Si mon kestyonn en, en keksoz dan en servis piblik tou dimoun i konmans redi nerv i konmans ankoler. Alors sa se en keksoz ki definitivman mon krwar ki i en keksoz ki nou bezwen kontinyen travay lo la toultan.

An sa ki konsern ler pou servis bis Onorab nou, nou santi mon krwar nou tou ki la e nou partaz sa fristrasyon ki annan dan dimoun, ki anvi sorti dan sa bann, dan sa bann kontrent ki *COVID* in met lo nou. I vremen, vremen tou dimoun i anvi. Mwan, mon anvi sorti ladan.

Mwan, mon ti a kontan kapab al, al bor lanmer e koz avek bann dimoun ki mon ti abitye al pran en bendmer avek ki ou pa pe kapab fer. Kantite dimoun i anvi sa.

E mon krwar ki keksoz pe bouz dan bon direksyon e kekfwa dan, dan pei ou konnen mon konman en zournalis dan mon premye, dan mon premye metye tanzantan ou ti tann dir ki *good news is not news*.

Be i annan en kantite *good news* la deor e ou fek donn nou enn. Nou war poudir nou, nou Roupri pe rebran valer sa se bann bon nouvel. Sa se nouvel ki devret premye lo nouvel *SBC* tanto ler bilten an Kreol i konmanse.

Me malerezman tanzantan li, li i ganny met deryer e bann move nouvel i ganny met devan. I annan en kantite keksoz ki pe arive ki bon. E Komite *Platinum* in larg en pe presyon e si keksoz i kontinyen amelyore i pou larg ankor presyon pou ogmant bann diferan servis bis e lezot servis partou dan pei.

E mon krwar ki avek lagras nou pou byento retourn dan en lavi preski normal. E Gouvernman i eksite pou apiye pou fer ki sa bann keksoz i arive. So mon swete ki zot osi zot partaz sa lantouzyazm, sa pozitivite ki annan dan ler konmela.

E ki nou tou nou form parti sa sanzman nou form parti sa sikse ki Sesel pe fer la ozordi. Mersi Mr Speaker.

MR SPEAKER

Ok. Onorab Henrie.

HON GERVAIS HENRIE

Mersi Mr Chair. Bonn apre midi tou dimoun. Mr Chair i annan de Manm ki'n koz lo en size ki mon santi pa'n ganny mon pa'n ganny en larepons ki mon ti ava kontan tande.

Konsernan sa bann *Grant* ki nou pe donn sa bann *public enterprises*. E i annan de konponan la pou *PUC* en *foreign loan Grant* avek enn pou lokal.

Now PUC i en antite ki depans en kantite larzan li dan bann zafer proze.

E menm letan Minis Dezinyen in dir nou, nou pa devret enkyet ler nou war proze akoz toultan pou annan proze. I vre. Be selman konman en Lasanble e mesaz ki nou bezwen dir avek Gouvernman se ki nou anvi war plis *oversight* dan sa bann proze, pou evite ki i annan en pti group dimoun ki kre en lanpir dan nou pei e detourn fon piblik.

E *PUC* i en landrwa kot ozordi enn bann antite ki annan sa repitasyon. Depi 2005 premye fwa an Avril 2005 ti annan en rapor ki ti pibliye dan journal *NASYON* konsernan alegasyon frod dan *procurement* dan *PUC* 2005.

E la 2020, 2021 in annan ankor alegasyon koripsyon dan *PUC* kot medya lokal in ekri lo la e proze parey en proze kot zot pe dir i annan bann labi ki kapab pe arive dan sa 33, 33kv dan sid Mahe zafer *sub station* Au Cap, Port Glaud, Anse Royale, Baie Lazare.

Akoz sa bann proze i gro o kompleks i annan bann kolizyon ki ganny fer ant kontrakter avek bann dimoun avek *PUC*. Sa ki mon pe demande se ki donn nou en garanti poudir Gouvernman i okouran i pe

ekoute, i pe gete e i pou kit en lizye.

Parske letan nou pe get lakantite larzan par egzans ki *PUC* in depanse lo *procurement* an 2019 par lao 316milyon li pli gro. E dezyenm pli gro i Minister Later, Lakaz ki 200milyon par anba li.

So ou war sa kalite larzan ki nou pe koze la e letan nou pe donn li sa bann ed li avek sa bann *loan* bann *Grant*, pou li kontinyen fer sa bann proze, mon anvi zot reasir nou konman en Lasanble ki nou *on top of things*, pou asire ki sa bann labi risk detourn fon piblik pa arive. Mersi Mr Chair.

MR SPEAKER

Mersi Onorab. Minis.

THE DESIGNATED MINISTER JEAN-FRANCOIS FERRARI

Mersi Onorab. Onorab mon pli kontan sa mo ki ou'n servi dernyen, ki mannyer nou kapab kontrol sa bann risk. Risk i annan en kantite. Labi nou toultan tann koz lo la. Me selman parey ou konnen i pa toultan fasil pou ou annan, annan laprev i annan en keksoz ki pe i annan dimoun ki toultan par devan ou ler ou pe tay par deryer par devan ou.

Mwan, mon ti a pli kontan koz lo risk e mon pa anvi *imput*

okenn motiv ki negativ lo *management PUC* oubyen lo bann travayer *PUC*. Mon respe zot pou zot travay ki zot fer.

Nou konman en, konman en Gouvernman e atraver bann lorganizasyon parey *PEMC*, nou ki bezwen pran nou responsabilite.

Nou ki bezwen travay e fer sir poudir nou pe fer sa *oversight*. La kot nou *fail* parler se ler nou *fail* pou nou annan son rol *oversight*. Gouvernman i annan son rol *oversight*, e partou Lakour, ACCS, tou dimoun i annan son rol *oversight* ki nou bezwen zwe byen.

E si nou fer li mon mazine poudir nou pou annan bann *outcomes* ki vreman enteresan.

Nou koz lo *PUC* souvan akoz *PUC* i gro e ler i gro si i pa mank si i mank en larzan i pa pou mank 25sou i pou mank 25mil. Alors se akoz i gro ki i anba kekfwa i anba en *microscope* en pe pli souvan.

Me mon krwar ki *management PUC* i okouran sa bann *challenge* ki zot annan i parler zot annan bann sityasyon kot ki difisil pou *manage*.

Me zot konnen poudir Gouvernman pe demann bokou

plis latransparans, bokou plis *accountability*.

E mon mazine si in annan bann lensidan dan lepase i pou de mwen an mwens, akoz i lentansyon Gouvernman pou fer sir ki sak rounpi ki *PUC* e lezot lorganizasyon paraetik oubyen bann *SOEs*, tousala i ganny fer dan respe larzan piblik e dan *accountability*.

Alors mon pa kapab dir ou plis ki sa Onorab me mon krwar ki avek bonn volonte e avek tou dimoun ki pran en nouvo, en nouvo depar en nouvo fason get keksoz ki larzan piblik i en keksoz ki sakre ki ou pa anvi zwe avek ou pa, ou pa pran en transpor Gouvernman pou ou fer sa ki ou anvi ladan.

Ou pa pran en larzan Gouvernman mon pa pran en kont Gouvernman si sa i kapab antre dan lespri tou Seselwa mon mazine nou pou al dan en bon semen.

Alors setou ki mon kapab dir ou pou le moman Onorab. Mersi.

MR SPEAKER

Mersi Minis. Onorab Pillay.

HON SEBASTIEN PILLAY

Mersi Mr Chairman. Mr Chairman avan mon al lo mon kestyon mon oule zis *remind*

Minis en keksoz ki in dir. In dir ler ou kestyonn en travayer i pa devret ankoler i zis parey ler ou kestyonn en Minis i osi i pa devret ankoler.

Akoz si en Minis i ankoler ler i ganny en kestyon i nerve ek sa kestyon travayer osi dan Gouvernman pou fer parey.

A de repriz ou ganny de kestyon sorti kot sa kote Onorab Cosgrow in demann ou en kestyon parfetman inosan lo en *Grant* pou Lopital, ou'n prefere reponn li dan en fason sarkastik.

Bomaten mon ti demann ou en kestyon vizavi bann *billing PUC* akoz i relevan avek sa ki pe arive ek piblik la an deor e zot pe koz lo la. Ou en Minis enportan dan Gouvernman ou trwazyenm dimoun pli enportan dan Gouvernman aktyel e ou la nou ti le konnen si ou okouran e si bann keksoz Gouvernman pe fer.

Me *anyway* nou ava kit sa avek ou. Mwan mon kestyon an relasyon avek sa, avek sa *head*, mon konnen nou kontinyen koz lo sa konponan *domestic financing*. E nou, nou annan en persepsyon *domestic financing* ki mannyer i bezwen ale, me sa bann antite ki la i bann antite ki annan en fonksyon ekstrememan enportan pou pei.

PUC son rol se *provide utilities*, delo, elektrisite e sa i vremen enportan. E nou'n koz en kantite lo *managing manage* efikasite *PUC* eksetera bann lezot keksoz.

Be an relasyon ek sa, i annan bann konsern ki ganny eksprimen vizavi bann travayer ki kontinyen leve, i kontinyen leve me souvandfwa ou pa war personn vin devan pou vremen donn levidans.

La nou'n tann bann alegasyon ki dir i annan koripsyon, me personn pa le donn levidans kote kan in arive keler in arive. So pou kapab reasir piblik e bann travayer ki pe fer zot louvraz byen dan *PUC*, ki Gouvernman i annan lentansyon fer, pou asire ki konfidans sa bann travayer pa ganny afekte zot - zot moral pa ganny afekte ler bann alegasyon i ganny fer.

Kot i annan bann ki pe devoue pe donn tou zot letan pou kapab delivre pou sa lorganizasyon, akoz zot annan en kantite proze pou zot delivre lo la.

E difikilte ki zot annan se akonpli tou sa ki sa bann proze i demann zot vizavi sa bann groser Bidze ki zot pe gannyen.

E nou tou nou konnen apre nou pou demann kestyon ki zot in fer ek sa larzan? Sa i

mon premye kestyon si Gouvernman i annan, i annan kek travay i pe fer lo la.

Dezyenmman an relasyon avek *Property Management Corporation*, mon konpran byen ki PS Thesee in eksplike be anba son, son Bidze pou li PS ki kantite larzan ki i annan pou par egzanp pou PMC fer bann travay parey sa travay ki ti konsern sanz sa bann *roof tiles* lo bann lakaz ki'n koule.

Eski i ankor *on target* eski i *on target* pou li kapab fer sa bann travay, oubyen eski i pou annan bann sipor bidzeter adisyonnèl ki *public enterprise, Property Management Corporation* i pou bezwen pou li kapab fer sa travay?

E mon dernyen kestyon sa *foreign loan* oubyen *Grant* i en *Indian line of credit* oubyen i *from* Lasin, *Indian line of credit*? Akoz mon'n tann, mon'n tann PS dir i sorti Lasin, *Indian line of credit*.

Eski nou, nou konnen kan sa bann keksoz anba sa *Indian line of credit* pou materyalize akoz nou'n annan sironstans dan lepase kot nou'n met li dan Bidze, me i pa'n materyalize *and then* nou'n bezwen *offset* li so klarifye sa pou mon Mr Chairman. Mersi bokou.

MR SPEAKER

Mersi. Lekel ki pran PS.

PS DAMIEN THESEE

Mersi Mr Chair. Lo sa 55 bis i annan en *tender* inisyal ki'n ganny fer e i annan 3 lakonpanyen ki'n ganny *short list*, e ki Lenn in anvoy kot *SPTC* pou prezan li fer en *competitive bidding* ant sa 3 *short listed companies*.

E i annan li 12 mwan pou li fer sa *process*. So wi nou *aware* i annan serten *delay* ek sa egzekisyon proze selman nou pe esey pous li *at least* la in ariv dan staz *tender*. E nou ava kapab konnen *by* lafen lannen si i pou *achieve* sa lobzektif oubyen non.

E si nou pa kapab atenn li sa lannen priyorite se ki nou kontinyen donn li priyorite 2022 pou kapab fer sa. Akoz parey nou war sa bann *Grants* osi i pran konsiderasyon dan nou *fiscal space even if* i en *line of credit*.

Si ou permet mwan donn mon en pti pe letan mon ava rod sa bann lenformasyon lo sa detay PMC an menm tan Minis i reponn premye kestyon. Mersi.

**THE DESIGNATED MINISTER
JEAN-FRANCOIS FERRARI**

Mersi Mr Speaker. Lo premye kestyon Onorab *Leader* Lopoziyon. Mon krwar ki son

larepons i devret ki sa landrwa kot ki nou ladan ozordi, se la ki nou bezwen eksprim nou bann lopinyon.

E demann bann kestyon parler sa bann kestyon i enpe deranzan, i en pe i kapab fer serten dimoun pa tro kontan ler ou pe kestyonn kredibilite en lorganizasyon.

Son travay i osi ganny afekte, me selman mon krwar piblik an zeneral i bezwen konpran ki se travay Lasanble pou fer sa bann keksoz koumsa. E mwan Onorab Pillay mon pa ankoler. Mon pa ankoler akoz ou demann mwan en kestyon.

Mon sel Minis ki mon ti war ankoler isi se Mr Meriton ki ti kas en kreyon en zour anvole partou la. Be apard sa, apard sa nou, nou ganny bann kestyon e nou reponn.

I dan lapolites e nou fer sa dan, dan en fason byen. Alors mesaz ki mon anvi anvoye pou bann, pou bann anplwaye dan bann lorganizasyon deor, se ki pa bezwen pran li mal ler okenn kestyon i ganny demande lo en lorganizasyon. Se rol Lasanble pou fer sa, *ok?*

I pa vedir ki tou dimoun i malonnet tou dimoun i pa rann kont. I bann kestyon ki lezitim e Lasanble son rol se pou met sa devan.

Alors mon si nou fer li dan respe, si nou fer li avek tou bann prekosyon neserer ki nou pa akiz bann dimoun direkteman kan nou napa laprev, tou lezot keksoz tou lezot kestyon i neserer pou nou mete, pou koz lo la e pou nou eklersi, eklersi sityasyon.

Donk mon *welcome* nenport ki kestyon ki ganny anvoye, be selman ler mon pe koze mon pa kontan ler mon pe koze mon pa enteronp personner ler mon pe koze, mon pa kontan en dimoun i enteronp mon.

Sa si en dimoun i krwar sa i en lakoler i pa en lakoler, i zis en fason travay ki mon krwar i devret nou tou nou devret aksepte. Mersi.

MR SPEAKER

Mersi. Ou ankor, *PS* wi.

PS DAMIEN THESEE

Wi Mr Chair. Mon pou napa detay lo *capital budget PMC*. Nou ava *share* li avek Lasanble dan lasemenn. Mersi.

MR SPEAKER

Mersi byen. Ou'n terminen?

HON SEBASTIEN PILLAY

Mersi Mr Chairman. Mr Chairman larepons Minis i, i byen akoz i savedir pou napa nanryen mal si parey ler mon ti

pou demann Minis Hassan ki i dir nou i kof i vid, me apre Prezidan i dir nou R3milyon i pa bokou larzan i annan larzan dan sa kof vid, pou nou al en vizit lo zil.

I pa devret ofans personn i devret en keksoz ki Lasanble i annan drwa demande. E parey bomaten ler ou'n dir mon poudir ou plito ou ale ou pa'n montre lakoler. Selman mon kontan sa lespri ki ou pe, ki ou pe vin avek ki savedir ler ou kestyonnen napa nanryen mal ek kestyonnen i en keksoz ki byen.

So *PS* i annan en keksoz ki *raise* en *issue* prezan. La ou konnen lenpresyon ki ou pou donn piblik se ki nou pe donn *PMC* R60milyon, ou konpran sa? Me lefe ki sa larzan i *tie-in* avek enl ot langazman i kapab kre en distorsyon dan lenpresyon lenterpretasyon.

So mon krwar nou bezwen sezi loportinite pou fer kler ki i pou annan en travay ki pou ganny fer ki sa R60milyon pa pe al ver strikteman bann proze, me i al ver langazman ki deza annan vizavi bann finansman ki *PMC* ti pe pran *from* bann lezot sours. Mersi Mr Chairman.

MR SPEAKER

Mersi. *PS* ou *ok* avek sa mersi. Onorab Georges ou annan entervansyon.

HON BERNARD GEORGES

Tre bref Mr Chair. Mr Chair mon anvi mon konpran tre byen ki sa Bidze lo *PMC* mon retourn lo sa size *PMC*. E mon anvi koz direkteman avek *PMC* konman *MNA* Les Mamelles.

PMC zot annan detrwa tre bon travayer e ler mon *clerk* i telefonn zot pou vin fer en serten travay, zot toultan lapel zot vini e zot fer zot mye pou zot kapab fer sa ki zot bezwen fer.

Me zeneralman mon pa dakor ditou avek lafason ki *PMC* i travay. Bann zoli blok apartman i ganny fer *maintenance* strikteman nil. Bann tenk dan plafon i koule, mon konnen mon pa pe koz zis pou mwan, mon pe koz pou preski tou bann distrik.

Bann tenk dan plafon i koule sa bann pov dimoun i bezwen reste dan delo. *Tiles* i kase e i monte partou. E la mon bezwen mansyonn de non Dan ek Danick kanmenm zot pa'n vot pou mwan la mon pe dir zot i pa byen, i pa byen zot *tiles* dan zot lakaz mannyer in arive avek madanm, manmzel Fatima osi mon pe koz pou ou la pou ou *tiles*.

Bann twa bann *tiles UCPS* ki sipoze ganny sanze sa osi, sa osi pa ankor fer. *Slab* deor bann flat ki kase e nou telefonnen i pa ganny aranze. Silvouple lo lapar en distrik ki'n ganny bokou neglize par en pe tou bann servis Gouvernman dan leparse, malgre tou keksoz ki nou'n sey fer, donn nou ankor en pti pe plis latansyon silvouple.

Nou pou vot zot Bidze ozordi la pou zot *Development Grants* aköz nou bezwen, me silvouple regard en pti pe zot lobligrasyon anver bann dimoun ki zot deservi. Mersi Mr Chair.

MR SPEAKER

Wi Minis.

THE DESIGNATED MINISTER JEAN-FRANCOIS FERRARI

Mersi Mr Speaker. Tre brefman en komanter lo sa ki Onorab Georges in fer. Mon krwar ki dan en, dan en gran parti i annan rezon. Me selman *PUC* i fer fas *PMC* i fer fas avek en defi enorm. Se kalite louvraz ki ganny fer dan konstriksyon sa bann lakaz. E sa i en defi ki Gouvernman i annan lentansyon adrese.

Akoz i annan tro bokou sa bann proze ki ganny fer ki son kalite i pa lo nivo ;- i pa lo nivo. Sirtou ki nou konnen ki dan

bokou sa bann lakaz i annan bokou dimoun ki reste.

I annan bokou ... aköz i annan bann gran fanmir ki reste ladan. Alors i enportan ki zot ganny fer dan, dan avek en bon kalite pou li kapab dire.

Alors si i annan en Departman ki Gouvernman i anvi met lanfaz lo la se lo *quality control* sa bann proze. Parler nou ganny, nou ganny bann proze ki ganny finanse anba en *Grant* nou dir mersi.

Akoz si nou ti napa en twa lo nou latet nou ganny en twa i nou, nou kontan. Me selman parler sa, sa bann proze apre i vin en, i vin en kosmar.

Donk nou bezwen kapab lev nou standar e ensiste ki nou annan en pli bon kalite konstriksyon ki nou pe gannyen pou le moman. Mersi Mr Speaker.

MR SPEAKER

Mersi Minis. Byen nou'n termin entervansyon lo sa Bidze. Nou a kapab vote prezan. Bidze pou *Development Grants to Public Enterprises* dan seksyon 2 lo paz 39 pou en total R180milyon 841mil. Manm ki vot pour lev lanmen silvouple.

Mersi. Vot pou *Development Grants to Public Enterprises* dan seksyon 2 lo paz 39 pou total R180milyon

841mil in ganny 33 vot pour, 0 vot kont e 0 abstansyon. Bidze in aprouve par Lasanble.

CONTINGENCY

MR SPEAKER

Bon mon annan de *item* la pou pas lo la mon a fer li separe kanmenm zot dan menm seksyon. *Contingency* dan seksyon 2 lo paz 39 pou Bidze R50milyon. Eski *PS* eski Minis i bezwen adres sa oubyen nou pas direkteman lo kestyon. Wi Minis.

THE DESIGNATED MINISTER JEAN-FRANCOIS FERRARI

Mr Speaker dan *Contingency* nou kapab, i kapab annan nenport keksoz ki en depans ki pa'n ganny prevwar tousala i kapab antre ladan.

Alors tou bann kestyon lo la pou valab si ou pou demande si i annan en, en i fer provizyon pou sa, in fer provizyon pou sa.

Donk mon ti a zis gid en pe bann Manm poudir pran kont ki dan sa lannen *COVID* ki nou dan sa lannen 2021, Gouvernman ti'n deza anonse ki bann konpansasyon, bann konpansasyon pa pe ganny peye sa lannen.

So mon krwar sa in deza i ava deza reponn, reponn en kestyon e i annan plizyer sa

bann konpansasyon ki'n ganny met *on-hold* pou le moman.

Apard sa mon pare e *PS* i pare pou ekout okenn lot kestyon ki zot santi poudir i esansyel ki en preparasyon i ganny fer. Mersi.

MR SPEAKER

Alor nou kapab vot lo sa Bidze. Onorab Pillay ale wi.

HON SEBASTIEN PILLAY

Mersi Mr Chairman. Mr Chairman zis en kestyon pou *PS*. Lartik 156 Konstitisyon i prevwar ki nou annan en *Contingency Fund* anba en Lalwa. Nou fason fer li se ki nou met li anba *Appropriation Act*.

Eski Minister Finans *going forward* i annan lentansyon revwar sa provizyon par lefe ki ler ou fer en *disbursement from Contingency Fund* i sipoze vin konman en *Supplementary Appropriation* devan Lasanble Nasyonal?

Current Article 156 "provision must be made in an Act for the establishment of the Contingencies Fund." Sa ki nou pe koz lo la se en *Contingency* so eski Minister Finans pou, pou regulariz sa sityasyon pou fer ki ler Lasanble i fer *oversight*, i ava annan en set dokiman pou bann depans ki

vini anba *Contingency Fund* as oppose to as it is now?

Nou pou napa vreman sa *breakdown* until ki Minister Finans i *provide* li apre *review*?
Mersi Mr Chairman.

MR SPEAKER

Mersi. *PS* kestyon pou.

PS DAMIEN THESEE

Mersi Mr Chair. Ler nou ti reviz nou *PFM Act* an 2012 an norm avek *best practice* nou ti war ki i pliferab annan zis en *fund* e sa i *Consolidated Fund*.

E menm avan sa dan Bidze nou ti annan pratik annan osi en *Development Fund* dan nou *charter of accounts* ki tou bann proze kapital ti ganny sarz anba la.

Me vi ki Konstitisyon i annan presedans plizoumwèn dan lankadreman Lalwa, in fer provizyon pou annan dan *Contingency Fund* sa in touzour reste la. Selman nou pa vreman servi li nou pou, nou plizoumwèn plifere annan en laliny en *appropriated* anba Bidze dan *Consolidated Fund* ki donn sa larzan.

Ki fer li pou nou pli prop, akoz ou pli kapab apre konn ou pozisyon fiskal. Akoz ler dan en *fund* apar i pa pe pran kont ou, ou bann depans dan ou *Consolidated Fund*.

So sanmenm sa ki nou'n kit li la. Be selman dan Konstitisyon i annan sa. I pa vedir demen ki ou pa kapab *activate* sa *Contingency Fund* ki annan dan Lalwa me selman mon krwar dapre Konstitisyon osi ou bezwen vin kot Lasanble pou ou *replenish* sa kont.

So mon krwar sa i ava dan en sironstans petet nou annan en dezaz oubyen katastrof enorm dan term petet bann depans ki nou bezwen fer. I ava la as en *second* plizoumwèn opsyon pou nou *activate* li, si nou pa kapab al dan nou *main Consolidated Fund*.

Selman *at the end of the day*, i pou *still* annan lenpak lo nou 1401. akoz sa ki nou bezwen get li se sa 1401 i *still* en kont. Sa *Development Fund* ek sa plizoumwèn sa *Contingency Fund* apre sa *Consolidated Fund* i zis de fason ki mannyer ou, ou organiz ou larzan.

Be selman i *still* sorti dan en menm kont labank. So pou le moman nou prefere ki i *appropriate* ladan e nou kapab *still* donn Lasanble sa bann detay. Mersi.

MR SPEAKER

Wi Onorab Pillay.

HON SEBASTIEN PILLAY

Mersi Mr Chairman. Mr Chairman mon ti apepre konnen poudir larepons ki Minis pou donn nou so ki *PS* pou donn nou. Kestyon *which begs itself* prezan se ki nou pe kree bann lezot fon.

Nou pe par egzanp nou'n kree en *COVID Fund* la nou pe kree en *La Digue Hospital Fund*. Pou le moman Lasanble pa konn napa okenn detay lo *COVID Fund* e i *off the books so to speak*, akoz i pa pas anba 1401 i pas anba son prop, son prop *account*. Mon prezimen si i pou en *Suspense Account* koriz mwan.

So ki mannyer Lasanble vi ki sa i en, vi ki nou'n war poudir i meyer pou fer *Contingency Fund* vin koumsa, ki mannyer ki Lasanble pou annan *sight* oubyen *oversight* dan sa ki pe pase dan sa *COVID Fund* bann donasyon kot pe antre kot i sorti?

Akoz i enportan pou nou konnen tousala e parey dan sa La Digue dan sa *La Digue Hospital Fund* pou nou konnen ki pe pase dan sa bann kont, akoz zisteman pou nou asire ki napa en lenpak lo 1401 parey ou'n dir lo kont Gouvernman lo *Consolidated Fund*.

Me osi lo lafason ki Gouvernman i zer son depans. So eski Minis i kapab dir nou lo

son kote si i pou annan en *attempt*, oubyen kan eski Lasanble pou kapab ganny detay lo, lo sa de fon *from* perspektiv Polisi. Mersi Mr Chairman.

MR SPEAKER

Mersi. *PS* wi.

PS DAMIEN THESEE

Mersi Mr Chair. I annan en diferans ant sa bann fon. Anba *PFM Act* parey nou konnen i pa *allow creation of other funds*. Ki *I mean* anba sa se si ou bezwen prezan fer en *Act* - en *Act* separe par egzanp ki pou etabli sa fon legalman anba, anba en *Act*.

Me parkont sa bann fon ki nou pe kree la i pe ganny kree atraver bann *special accounts* dan *Central Bank*. Savedir i pa antre dan ou *main 1401 account* ki ou *main Consolidated Fund* e bann *special accounts*.

Savedir i bann, i bann fon administratif pou en *purpose* spesifik parey sa de ka *COVID Fund* avek, avek sa *Logan Hospital new hospital*. E parey tou kont Gouvernman nou bezwen en odit lo la.

So nou pe travay lo en, lo en *framework* avek Minister Lasante, pou ganny plizoumwèn en Polisi kalite

depans sipoze ganny depanse dan sa, dan sa *COVID Fund*.

E parey i ti ganny anonse Prezidan ti fer sa *COVID Fund* pou *the vaccination campaign* e si nesosite pou *extend* en pe pou son osi pou son bann kanpany debat en pe bann depans ki annan pou fer avek konbat sa pandemik li menm.

So nou pou *come* avek en Polisi. Nou pou bezwen fer li ganny odite tou le lannen e nou ava fer li a laporte Lasanble Nasyonal. E *FPAC* i kapab demann a nenport ler, pou nou vin devan osi pou nou vin prezant sa bann kont oubyen okenn keksoz ki nou annan lo la. Mersi.

MR SPEAKER

Mersi. Bon avek sa nou a pare pou vot lo sa Bidze pou *Contingency* dan seksyon 2 paz 39 pou en total R50milyon. Manm ki an faver lev lanmen silvouple.

Mersi tou Manm in vote. Bidze pou *Contingency* dan seksyon 2 lo paz 39 pou total R50milyon in ganny 33 vot pour, 0 vot kont e 0 abstansyon. Bidze in aprouve par Lasanble.

TAX EXEMPTION (VAT EXEMPTION, TRADE EXEMPTION)

MR SPEAKER

Tax Exemption (VAT Exemption, Trade Exemption) i dan seksyon 2 paz 5 ek 6 pou en total R20milyon. Minis oubyen *PS* eski i annan okenn leksplikasyon pou donnen lo la avan nou pran kestyon bann Manm?

PS DAMIEN THESEE

Mersi Mr Chair. Parey ou'n dir ou annan sa 5milyon pou *trade tax exemption* e 15milyon pou *VAT exemption*. Sa i la *in case* plizoumwenn si ti annan bann lagreman oubyen bann donasyon ki Gouvernman i gannyen, ki parey nou konnen nou Lalwa Taks i fer provizyon ki tou, tou asa, tou lenportasyon oubyen tou komodite ki antre dan pei ou bezwen pey sa taks lo la pou rezon kontabilite.

So la Gouvernman ti annan sa bann donasyon ki antre la, ki pa neserman annan en lagreman ki'n ganny sinyen. I annan de fwa bann Minister i ganny bann donasyon.

La nou fer sa peyman avek *SRC* lo la so i zis en *double entry* dan liv Gouvernman kot sa nou fer sa peyman e i antre *back* ek *SRC*. Mersi.

MR SPEAKER

Mersi. Alor nou a kapab vot lo sa laliny. Bidze pou *Tax Exemption*, *VAT* ek *Trade Exemption* dan seksyon 2 lo paz 5 ek 6 pou total R20milyon. Manm ki an faver lev lanmen silvouple.

Mersi. Lo Bidze pou *Tax Exemption*, dan seksyon 2 lo paz 5 ek 6 pou total R20milyon in ganny 33 vot pour, 0 vot kont e 0 abstansyon. Alor sa Bidze in aprouve par Lasanble.

PUBLIC SERVICE APPEALS BOARD**MR SPEAKER**

Nou annan de pti antite ki nou'n aksepte pou vot lo la e son deba e parey nou'n fer avan mon a zis demann *PS* poudir en fraz pou nou piblik konnen kisisa sa bann antite i konpri.

Premye *Public Service Appeals Board* lo paz 96 ziska 97 pou en total R1milyon 126mil. Minis oubyen *PS* kekfwa *PS* i konn pli byen sa bann laliny avek tou sa lannen leksperyans. *PS*?

PS DAMIEN THESEE

Mersi Mr Chair. Mon a eseye. *PSAB* i annan manda plizoumwèn pou asire ki bann travayer piblik dan Gouvernman, i annan rekour si

zot war li zot annan bann *grievance against* Gouvernman lo bann ka disipliner.

En keksoz tre komen par egzanp isi petet en travayer Gouvernman in ganny fer *terminated* ki sa travayer i santi li *aggrieved*.

Alor i annan en rekour pou bann travayer dan Gouvernman al kot sa *PSAB* pou atann son *case* e pou li donn en zizman fer transparan lo la. Mersi.

MR SPEAKER

Mersi *PS*. Alor nou a apel bann Manm pou vot lo Bidze *Public Service Appeals Board*. Wi, wi Onorab Pillay.

HON SEBASTIEN PILLAY

Mersi Mr Chairman. Mr Chairman avan nou pran en vot lo sa, lo sa provizyon bidzeter pou *PSAB*. *Whilst* son provizyon bidzeter i ptipti, me i annan en rol enportan pou li zwe sa lorganizasyon.

E nou ti konpran serten difikilte ek sa lorganizasyon i ti pe gannyen pou vin devan pou prezant zot Bidze. Me sa ki nou oule met lanfaz lo la i se ki Lasanble i bezwen ganny en rapor *from PSAB as soon as possible*, lo lakantite ka ki'n vin devan li lakantite ka ki i pe *go through* son sistenm.

E pou nou kapab osi zwenn avek li pou nou kapab ganny en apersi lo lafason ki bann prosis lo bann ka i ale, sirtou an se ki konsern bann *grievance* pou bann dimoun i annan dan servis piblik.

Nou konpran *PSAB* i pa *deal* avek bann sityasyon Kontra terminasyon Kontra, me i *deal* plito avek bann sityasyon bann anplwaye ki'n ganny *terminated*, so i pou enportan ki sa bann lenformasyon i ganny met a dispozisyon Lasanble *as soon as possible*.

E ki loportinite pou gannyen, pou nou kapab kriy *PSAB* pou vin devan Lasanble pou donn nou en kontrandi lo son bann travay. Mersi Mr Chairman.

MR SPEAKER

Mersi. Wi nou a note. E nou ava apros *PSAB* pou ganny sa rapor ki *Leader* Lopozisyon in demande. Bon prezan nou a vot lo son Bidze *Public Service Appeals Board* lo paz 96 ziska 97 pou en total R1milyon 126mil. Manm ki an faver lev lanmen silvouple? Byen okenn Manm ki kont.

Bidze pou *Public Service Appeals Board* lo paz 96 ziska 97 pou en total R1milyon 126mil in ganny 32 vot pour, 0

vot kont e 1 abstansyon. Bidze in aprouve par Lasanble.

PUBLIC OFFICERS ETHICS COMMISSION

MR SPEAKER

Public Officers Ethics Commission Minis enn de fraz ? *PS sorry*.

PS DAMIEN THESEE

Mersi Mr Chair. *Public Ethics Commission* parey nou konnen i responsab pou bann travayer Gouvernman ki lo en Kontra pou zot soumet en deklarasyon avek li lo zot bann *asset* oubyen lezot detay personnel ki zot annan tou le lannen dapre, dapre Lalwa.

E i responsab pou fer sir si i annan okenn *investigation* ki ganny *call* oubyen okenn konplent ki ganny mete lo en travayer Gouvernman, i sipoze bann *high officials* ki lo *PSC contract*. I kapab prezan servi sa bann deklarasyon, ki sa bann travayer in donner dan son lenvestigasyon pou asire ki bann travayer i pe *operate* dan en fason onnet dan zot louvraz. Mersi.

MR SPEAKER

Mersi *PS*. Bidze pou *Public Officers Ethics Commission* i lo paz 106 ziska 108 pou en total

R2milyon 655mil. Manm ki an faver lev lanmen silvouple? Mersi Bidze pou *Public Officers Ethics Commission* lo paz 108, 106 ziska 108 pou total R2milyon 655mil in ganny 33 vot pour, 0 vot kont e 0 abstansyon. Alor Bidze in aprouve par Lasanble.

E avek nou'n ariv a lafen Staz Komite lo *Appropriation Bill*. I reste mwan pou remersye bann Manm pou konplet sa maraton mon menm mon, mon'n bliye konbyen zour nou'n ale lo la.

In en long travay e mon krwar en kantite pwen in ganny fer resorti pou nou Lasanble e pou piblik. I reste nou pou fer *Third Reading* lo sa *Bill* ki nou pou fer demen matin.

E demen matin nou pou konmans *sitting* 11er e sa pou permet en serten norm nou bann Manm partisip dan en seremoni kot Minister Ledikasyon. Mon poudir mersi Minis ki la e sirtou mersi *PS Thesee* ki'n akonpany nou pou tou sa ki mon apel en maraton e osi son bann zofisye ozordi nou annan Madanm Irene Croisee ki'n avek nou pou bokou sa letan.

Bon me avek sa nou a pas dan Staz Lasanble pou nou *adjourn* e nou a rezwenn demen

matin 11er. Mersi bokou e mersi Minis ek *PS Thesee*.

(ADJOURNMENT)